

Enc.

159

End. 159.

~~Hind. lit. solid libr. 350.~~

DAN. GEORGII MORHOFII,
DE
LEGENDIS, IMITANDIS
ET
EXCERPENDIS
AUCTORIBUS,
LIBELLUS POSTHUMUS,
QUEM
IN SUPPLEMENTUM POLYHISTORIS
MORHOFIANI,

EX ACCURATO QUODAM MANUSCRIPTO

LUCI NUNC PRIMUM TRADIT,

JOH. PETR. KOHLIUS, P.P.


HAMBURGI,

Apud CHRISTIAN WILHELM BRANDT.

1731.

81





Præfatio

Novum tibi librum trado, Amice Lector, in lucem e tenebris a me prætractum, exiguum illum quidem, sed a magni ingenii Viro, Polyhistoro ac Professore quondam Kiloniensi celeberrimo, literis consignatum, nec minori, ut videbis, elegantia, quam utilitate commendabilem. Exponit enim illa, quæ in feliciter assequenda bene dicendi arte, plane admirabili, tamque paucis ætate hæc nostra contingenti, proram quod ajunt, puppemque constituunt, facemque iis præfert, quibus in hac arte consilium est excellere. Legendis namque melioris notæ auctoribus, iisdemque dextre imitandis, seduloque excerptis, eloquentia demum omnis comparatur. Unica propemodum hæc discendi ratio, unica hæc via est, qua, ut ad eruditionem omnem, ita ad extremam illam eloquendi facultatem, facillimo gradu pervenitur. Hinc sedulo instituta optimorum auctorum lectioni, accurataque

Præfatio.

interpretationi tantum tribuit Rollinus, Rhetor eloquentiæq; magister apud Gallos hodie celeberrimus, ut in libro Gallice conscripto, cui index est, La Maniere d'enseigner & d'étudier les belles lettres () his eam verbis commendet; I' ai déjà, inquit, remarqué en l'éloquence, que cette Partie étoit une des plus essentielles, & qu'on pouvoit dire en un sens, qu'elle renfermoit toutes les autres. Multum autem interest, Amice Lector, quomodo quove ordine hæc a te lectio institatur, quæ non tumultuaria, non præpostera, non indiligens, aut superficiaria, sed quam maxime ordinata, rite disposita, atque accurata esse debet. Recte propterea, in epistolis suis, monens Seneca, Vide, inquit, ne lectio illa multorum librorum & omnis generis voluminum habeat aliquid instabile. Certis ingeniis immorari & innutrirî oportet, si velis aliquid trahere, quod in animo fideliter sedeât; nusquam enim est qui ubique est &c. Nec parum in eo situm existimes, quales cujusque generis auctores legas; ne vel dictio, vel legentis etiam animus sordium quidquam trahat. (**)* Tales enim plerumque reddimur, quales auctores sunt, quos quotidie evolvimus

[*] Edit. Paris. anni 1728. Tom. II. Cap. III. de la Lecture & de l'Explication des auteurs, p. 74.

[**] Quæ verba Sallustii sunt in tractatu de libris.

Præfatio.

vimus ac tractamus. Neque enim tam facile ciborum natura in corpus transit, quam lectio in animum moresque legentium commutatur. Ille verissima illa sint Theognidis.

Εσθλῶν μὲν γὰρ ἀπ' ἐσθλα μαθησεαι ἢν δὲ
κακῶϊς

Συμμιχθῆς, ἀπολοις καὶ τον εἶουσα νοῶν.

*Lectiōnem comitetur oportet Imitatio, seu studium, auctoris stilum, ejusque ideam sine plagii suspitione exprimendi. (***) Vix autem utrumque, Lectio scilicet & Imitatio, feliciter succedet, nisi tertio denique loco sedula prudensque, optima quæque excerpenti industria adjungatur. Eximia quidem (ut clarissimi Saldeni verbis utar) humanæ memoriæ vis est, penetrale amplum, sed haud infinita tamen. Certos enim limites habet & fines, ultra quos progredi sæpe non datur. Diversarum in ea rerum imagines certis quasi cellulis reponuntur, quibus nisi custodes addas, qui sollicite servant iis recepta, & recondita, nullo negotio effringent sæpe & aufugient, atque ita omnis lectiō-*

)(3

nis

[**] Hanc imitationis circumscriptionem dat non minus veram quam concinnam Celeberr. Hemecius in libro de Fundamentis stili, eo, ubi de imitatione agit, capite,

Præfatio.

nis peribit fructus. Ergo occurrendum imbecillitati. &c. *Huic excerpendi studio non multum temporis se dedisse Morhofius ipse non dissimulat Lib. III. Polyb. Cap. 1. sic scribens : Ego certe excerptis congerendis non multum operæ me impendisse fateor, etsi aliorum diligentiam laudo, meæque in his negligentia succenseo, magno tamen in lucro reputaturus, si aliorum mihi opera uti concessum fuerit : nihilo secius tam apte, luculenter, ac perspicue in hoc libro laudatam hanc excerpendi, ut & imitandi auctores eosque excerpendi artem, quatenus ad Oratoriam Rhetoricamque illa spectat, tradit, ut, ab omnibus ad germanam eloquentiam laudem adspirantibus, non sine eximio fructu quodam legi inque consilium adhiberi queat. Infinitus propemodum fateor, eorum numerus est, qui quomodo legendum, quomodo sit imitandum & excerpendum, studiose doctoque praeceperunt. Generatim alii de lectione librorum, ut Guilielmus Saldenus in elegantissimo suo de libris Commentario, Thomas Bartholinus de libris legendis, Franciscus Sacchini, Iesuita Italus, de ratione librorum cum profectu legendi ; Jo. Frider. Hoddannus in Dissertatione de libris legendis. Amandus Polanus a Polansdorff, in tractatu de ratione legendi cum fructu auctores, imprimis Sacros. Alii speciatim vel de cauta librorum lectione, ut Jo. Guiliel. Bergerus,*
in

Præfatio.

in peculiari dissertatione quadam, Jo. Bapt. Crispus de Ethnicis Philosophis caute legendis (Rom. 1594. fol.) vel de desultoria variorum auctorum lectione, ut Rol. Maresius in certa quadam epistola, vel de Romana Historia scriptoribus legendis, ut Carolus Sigonius, vel de lectione sacri codicis, ut Heervartus, Frankius, Præsius, alique multi; vel de lectione librorum gentilium, ut Jo. Christoph. Otto, in disputatione de gentilium auctorum lectione & usu, Claudius Espenæus de profectu e gentilium librorum lectione percipiendo alique, quos Vir πολυμαθής ατος Jo. Christoph. Krüske, nuper in Vindemiarum Litterariarum Specimine II. Cap. III. pag. 30. sqq. erudito indice exposuit, vel de lectione auctorum Classicorum, quo ordine illa quæve methodo instituenda sit, egerunt. Postremis annumerandus Morbosi hic libellus est: qui tamen inter omnes, praeceptorum breuitate, nitore stili, concinnitate ordinis, iudicii acrimonia, sermonisque perspicuitate præcipue se commendat: ad minimum his auctoribus, qui vel superiori ævo, vel hac nostra ætate, materiam hanc de industria, nec infeliciter pertraxerunt, ut celeberrimus Tanaquillus Faber, in libro Gallice conscripto Salmurique 1672. edito: sub tit: Methode pour commencer les humanités Greques & Latines, doctissimus item Io. Gottl. Heineccius in libro satis noto, quem stili caltioris fundamenta vocat, cuius in Parte III. Cap. I. & seq. de auctorum lectione & imitatione

Præfatio.

agit, quique non postremus est, cariss. Joa. Nicolaus Funccius, in eo quem ante annum & quod excurrit, Lemgovia typis exscribendum curavit, libro, de Lectione Auctorum Clasicorum, paulo licet, quam opus erat, prolixiori, utilissimo tamen neutiquam postponendus. At esse posthumum hoc scriptum inquires, nec eo habitu circumpositum, quo auctor fortasse ipse superstes induisset. Consilium hoc fateor edendi meum initio non modo retardavit, sed prope modum intervertit: non id ideo, quasi vel luce publica, vel tuo, amice Lector, conspectu minus dignum eum judicarem, sed quod ab auctore jam ferme moriente, ut nuperrime etiam Vir quidam celeberrimus per literas mihi nunciavit, prohibitum esse scirem, ne quid eorum, quæ in literas ipse retulisset, at extrema, per mortem impeditus, lima non donasset, post mortem ederetur. Nec contra ego, quam celeberrimus Vir e vita decedens voluit, fecissem, nisi ejusmodi esse hoc scriptum deprehenderem, ut non omnium tantum conspectum sed & ætatem ipsam ferre posse videatur. Communi deinde omnium utilitati consulendum potius, ut Claudiani illa monent,

Consule cunctis.

Non tibi: nec tua te moveant sed publica vota. quam privato cujusquam studio, ac voluntati obsequendum, Celeberrimique illius Jurisconsulti, Andreae Hyperii exemplum imitandum existimo, qui Justo Vultejo alicubi testante, ideo post mortem tandem sua prædixit scripta voluit,

Præfatio.

luit, ne aliquam sibi gloriam plausumque vulgi
vivus captare velle videretur. Fuerint enim non-
nulla in hoc opusculo, omnibus adeo numeris non
absoluta, supplenda aliqua, non pauca deni-
que accuratius recognoscenda: non rejiciendum
propterea, ut opinor, perpetuisque devoen-
dum tenebris, sed sua quoque in pretio ha-
bendum, sicque cogitandum est, Viro occupa-
tissimo, cui Vivere, Ciceronis verbo, Cogitare,
(de literis & scientiarum accessionibus) fuisse
novimus, facile quædam, extemporalibus præser-
tim operis, cum partim ex scripto, partim ex
memoria (videatur Præfatio Morhofiana in Po-
lyhystorem) Auditoribus meditata in calamum di-
ctaret, excidere potuisse (id quod in omnibus ejus
ingenii posthumis, apud equos rerum judices vali-
tutum speramus) quæ posterioribus cogitatis e-
mendaturus, ut ipse promiserat, fuisset. Misera
plerumque fateor ac pertenuis librorum æque, au-
ctoris post mortem in lucem prodeuntium, quam
librorum immatura ætate parentes amittentium
est conditio: quorum illos sæpenumero minime
elaboratos, sed valde rudes ac impolitos, innu-
merisque defectibus laborantes, hos parum feli-
citer educatos, vestitu sordidos, moribus agre-
stes, omnibusque vitiis squalidos ac contaminatos,
in lucem publicumque vitæ hujus theatrum pro-
deuntes videmus. Hujusmodi qui non premunt
tantum sed & supprimunt luce publica indigna,
suisque auctoribus turpitudini cessura scripta, non
minus circumspicite, ac providenter, ut nos qui-

Præfatio.

dem judicamus, agunt, quam impingere illi videntur, qui nihil in lucem emitti, nisi quod gloriam & famam mortuorum immensum quantum augeat, & amplifcet, volunt. (****) At non eadem omnium, quæ posthuma dicuntur, scriptorum ratio, non idem de omnibus frendum est judicium. Alia sunt plane rudia, imperfecta, nullamque limam experta, alia ejusmodi ut non perfectissima licet omnibusque numeris absoluta, cum industria tamen curaque sint confecta; eoque consilio mandata literis, ut si non omnium, plurimorum tamen, ab auctoris præsertim ore pendentium inserviant utilitati. Hujusce postremi generis sunt Collegia, quæ vocant Academica: subito licet plerumque vel in literas conjecta, vel in calamus dictata auditoribus, non sine meditatione tamen, cum plurimorum in conspectum veniant, multoque studio composita. Præsens certe, quod cum accurato quodam Clarissimi Christiani, Rectoris quondam Tönningensis in Holsatia bene meriti dignissimique Morhofii auditoris autographo, typis nunc fideliter collatum evulgamus, ut celeberrimi Morhofii nostri omnia, Doctissimi auctoris sui industriam baud vulgarem, admirabilem doctrinam, inque præceptis eloquentia tradendis dexteritatem summam aperte satis,

lo.

[****] Vid. Petri Burmanni præfat. Collectioni Epistolarum, quam Syllogen inscribit, Tom. V. & ultimo præmissam.

Præfatio.

loquitur. In tanto igitur librorum quotidie fere in lucem exeuntium, plane inutilium ineptorumque numero, quis tandem vitio nobis vertet, si, post tam multa alia Morhofio fatis functo ab eruditis passim prolata scripta, Delicias nempe Oratorias non semel typis traditas, Doctrinam item de argutiis, Collegium Epistolicum ut & de pura dictione librum, ante aliquot annos a Celeberrimo Moshemio typis datum, utilissimam hanc quoque, multisque doctrina Critica ac Literaria flosculis conspersam, multaque elegantia, nec minori æxposita ac judicio confectam commentatiunculam, his præsertim, nimirum anno 1675. publice, anno 1685. privatim ab Auctore prælectam in publicum proferamus? cum præsertim Polyhistori ejus, quem Celeberrimus, omniq; laude major FABRICIUS, Amicus ac Fautor noster eximie Venerandus, Polyhistor ipse auctiorem ornatoremque nunc emittit, supplemento non plane nulli esse queat. Neque enim ea qua in Polyhistore typis jam vulgata extant denuo hic repetuntur, sed singula, qua hic occurrunt, sive auctorum latinorum in certas classes divisionem, sive varios dicendi characteres, sive prolata de latinis auctoribus judicia, sive denique illa, qua vel ad imitationem, vel excerptendi artem referuntur, spectes, in Polyhistore omnino non leguntur, sic, ut, qua in recentissima Polyhistoris editione lib. IV. Cap. XI.

Præfatio.

§ XII. de linguæ latinæ auctoribus reperiuntur tradita, diverso plane ordine digesta, alio habita induta hic compareant, hæcque potius, quam illa Morhofium auctorem habere videantur. Mentionem quidem Collegii hujus manuscripti facit in Prolegomenis Polyhistoris, a se adornati clarissimus Möllerus, p. 62. sub hoc titulo, *Lectiones Methodico-Præcticæ, de legendis, imitandis & excerpendis linguæ latinæ auctoribus: in manibus tamen minime illud habuisse, declarant illa, quæ p. 63. in fine recensionis scriptorum Morhofii ineditorum subjungit.*

Interea his quæso utere, amice Lector, hæcque impoſterum, si ad palatum tuum hædapes fuerint, collegia Morhofii, quæ sic satis accurate scripta, cunque aliis exemplis studioſe collata poſſidemus, expecta. nimirum

I. Collegium de periodo, a Clarissimo Möllero, sub hoc titulo recensitum. *Periodologia, sive Tr. de Periodo Oratoria & Poetica*, quem publicis anno 1686 & 1687. lectionibus proposuit, cujusque editionem Heredes in Catologis Nundinalibus, Vernali A. 1694. p. 13. & A. 1696. p. 40. expectari a se jusserunt.

II. *Prælectiones Oratoria, sive Manu ductio ad artem Oratoriam*, 254 scriptis paginis constans, annoque post Nat. Chr. 1669. publice ab auctore prælectum, quod quidem ab eo, quod laudatus Möllerus sub indice Collegii Oratorio Theoretico-Præctici citat, minime diversum esse conjicimus.

III.

Corrigenda.

Ut alia Typographi incuria intrusa menda taceamus, a prudenti facile lectore corrigenda: pro Nic. Baxio, aliquoties Baccius, a pag. it. 81. & sequent. in superiori paginæ parte *De legendis auctoribus*, pro *excerpendis* male positum invenies.

THE

LIBRARY

OF THE

UNIVERSITY

OF CALIFORNIA

Præfatio.

III. Collegium Pathologicum, a clariss. Möllero sub hoc titulo memoratum. p. 63. Pathologia Oratoria XVI. Capitibus comprehensa & A. 1676. Auditoribus dictata publicis, cujus editionem Ao. 1683. in programme ad Lect. Acroamat. invitatorio promisit. Hujus Contenta quæ sint ut scias Lector, singulorum ecce Capitum indiculum. Caput I. agit de necessitate atque utilitate Pathologiae. II. De eo quod apud auctores veteres & recentiores in doctrina Pathologica scriptum est, & quomodo ea uti in oratione possimus. III. De Affectibus eorumque ordine & numero. IV. De admiratione. V. De Amore & odio. VI. De affectu cupiditatis. VII. De affectu spei & metus. VIII. De fluctuatione animi. IX. De affectu Animositatis & Pusillanimitatis. X. De affectu Gaudii & Doloris. XI. De Invidia. XII. De Misericordia & Commiseratione. XIII. De Favore & Gratitude. XIV. De affectu gloria & Doloris. XV. De Poenitentia, Desiderio, Fastidio, Hilaritate, Acquiescentia.

IV. Collegium eloquentia civilis, De quo ita Möllerus. p. 63. Manuductio ad Eloquentiam Civilem, sive Orator, & Præceptis & Exemplis perpetuis lectissimisque adornatus, cujus spem fecit A. 1683. in progr. Inuit. ad Lect. Acroamat. 96. paginis scriptis constans,

V. Tra-

Præfatio.

V. Tractatus de Germanorum in rem literariam meritis, multis numeris perfectior, atque ex autographo Auctoris mirum quantum locupletatus, præter ceteros omnes dignus, quæ luce publica fruatur.

Quod reliquum est, monitum te velim, Lector, observationibus, quibus in supplementum eorum quæ de editionibus auctorum melioribus a Morhofio sunt allata, instrui ac illustrari præsens libellus potuisset, de industria nos supersedisse, cum facillimo negotio hac omnia e Celeberrimæ Fabricii nostri Bibliotheca Latina peti queant. Vale.

Scrib. Hamb. 1731. d. 12. Jun.

EXIMIAE EXPECTATIONIS ET
APPRIME

NOBILIBUS ADOLESCEN-
TIBUS,

BARTHOLDO HEN-
RICO BROCKES,

ET

JOANNI BERNHAR-
DO BROCKES,

CELEBERRIMI HAMBURGENSIS
GYMNASII NON PRIDEM ALUMNIS,

INGENIIS, MORUMQUE CULTU
FLORENTISSIMIS

S. P. D.

EDITOR.

Si

EXTRAORDINARY

APRIL

NOVEMBER

THIRTY

THIRTY

THIRTY

THIRTY

THIRTY

THIRTY

THIRTY

THIRTY

THIRTY

THIRTY

THIRTY



i verum est,
quod tritum
Græcorum
illud, *φιλομαθής*
πολυμαθής, non
minus, quam
experientia ipsa com-
probat; qui discere mul-
ta scireque cupit, mul-
tarum eum rerum scien-
tiam sibi comparare: Vos
sine dubio, Adolescentes
Humanissimi, nulla non
liberali, Patriæque fru-
ctuosa doctrina aliquan-
do perpolitos fore, non
tam auguror, quam cer-
tissime jam prospicio.
Namque perbreui illo
tem-

tempore, quo studiis vestris, a Viro plurimum Reverendo, ac Doctissimo, Ministro Sacrorum Oxenwærdiano Dexterrimo ac Meritisimo Dom: P. L. SCRIBA egregie jam tum proVectis, præesse me voluit Illustris Parens Vester, tanta Vos discendi cupiditate, incensos, tanto opere ad virtutem, omniumque præclarissimarum rerum studium inflammatos vidi, per paucos ut in hoc pares habeatis, superiorem, quod sciam, neminem. Quæ quidem navitas, industria, & assidui-


duitas Vestra, cum & ingeniis, ad præclara quæque natis adjuvetur, & Pietatem in DEum, Parentes, Doctores, una cum omnis generis virtute, suavisimisque moribus conjuncta habeat: quid non egregium ac singulare ex eo, Divina prosperante gratia, exiturum speremus & auguremur? præsertim, cum propitius Vester Parens, non amplissimi tantum Senatus Hamburgensis, sed etiam totius Civitatis, atque adeo orbis eruditi Decus, Germaniæ nostræ
FLOT lumen,

lumen , Delicium Musarum, Principum Virorum Amor , Literarum Præsidium, æternumque splendidissimæ gentis Vestræ ornamentum , ut animo pro Reipublicæ salute communibusque commodis excubat, ita magnam curarum & vigilantiaë partem in vestra institutione fixam & locatam habet. Quare non dubitans , publicam institutionem, ad dextre formanda ingenia vel solam sufficere , vel certe cum privata conjungi, magnoque Christianæ rei-

reipublicæ emolumento
modis omnibus ali fove-
rique & ornari oportere:
celeberrimis inclyti Jo-
annei Gymnafii Profeflo-
ribus in disciplinam vos
tradidit & commendavit.
In quo cum latinitatis &
Eloquentiæ ftudium, lite-
ratis hominibus, qui fuis
ingenii monumentis ex-
traneis quoque prodeffe
volunt, in vita non depo-
nendum, ftrenue perfe-
quendum habeatis: ty-
pis expreffum hoc τὸ πρῶτον
MORHOFII noſtri ſche-
diaſma vobis inſcribere
& dedicare nullus dubi-
tavi; tum quod hujusmo-
di

di deliciis delectari vos
novi, tum etiam ut vestri
in me amoris studiique,
& mei in vos mutui, docu-
mentum aliquod extaret.

Valete candidissima
Pectora, ingenia cultis-
sima! mihi que eum, quo
semper adhuc in me fui-
stis, animum conservan-
tes: ut conceptam de
vobis spem atque exspe-
ctationem, non expleatis
tantum, sed etiam, quæ
vestra est virtus & con-
stantia, Divino præsidio
fulti, superetis, contendi-
te! Scribebam, Hambur-
gi Anno MDCCXXXI.



PARS PRIMA.
DE
LEGENDIS
AUCTORIBUS.

CAP. I.

§. I.

Cum potissima eruditionis pars in
Latinorum Auctorum cognitione
& usu consistat ; in iis autem le-
gendis non recto consilio omnes
versentur : manuuctione nostra
viam illam regiam, & quomodo ipso usu
& exercitio frequentanda sit, ostendemus.

§. 2.

Circa Auctores itaque latinos veteres
versabimur, quatenus scilicet ex iis & ser-
monis cultura institui, & rerum notitia ha-
beri, ideoque unâ eâdemque opera &
elo-

eloquentiæ & doctrinæ usus comparari possit.

§. 3.

Triplici ratione in toto hoc negotio nobis versandum erit. Primum enim nosse debemus, quomodo legendi Auctores; deinde quomodo ex iis excerpendum; postremo qua ratione per imitationem ad usum transferendum. Prima pars Auctorum notitiam subministrat: secunda media ad usum proponit: tertia usum ipsum. Prima pars quasi sylvam aliquam ostendit: altera quomodo ex illa sylva habilia ligna comportanda: tertia quomodo inde opus exstruendum.

§. 4.

Ad notitiam Auctorum Latinorum parandam multa concurrunt. Ita enim nosse debemus illos, ut & discernere possimus, & cum iudicio in illis versari. Dispersi autem Auctores Latini possunt, 1) *Ratione Latinitatis*, 2.) *Ratione usus in disciplinis Theoreticis & practicis*.

§. 5.

Quando Auctores ratione Latinitatis consideramus: seponimus tantisper, quæ ad usum in disciplinis spectant: sermonis enim cura rebus ipsis præmittenda est: atque ubi illius lineamenta duxerimus: ita res tractanda sunt, ut verborum & eloquentiæ

quentiæ cura simul suscipiatur; quæ ad perfectionem orationis latinæ, quam pro scopo nobis proponimus, ambo jungenda sunt.

§. 6.

Lectio non debet esse tumultuaria. nihil enim magis ad styli nitorem obest. sed maxime illa secundum varias suas partes ordinanda. non enim vel diversarum ætatum vel diversorum characterum auctores miscendi. Ita nunquam obtinebitur illa in scribendo ἀφελεια (simplicitas), semperque aliquæ sordes, vel saltem aliqua peregrinitas & ἀσυμμετρία (iæqualitas) in stylo hærebit; quod à prima juventute usque vitandum est; cum teneris mentibus altius illa impressa sedeant, & ætatis successu non facile corrigantur.

§. 7.

Diversitas in Latinitate maxima est. alia scilicet est ratione ætatum. Nam illa, quam auream vocant, sine controversia omnium optima est, & præ ceteris omnibus sectanda, ut ex ejus scriptoribus corpus eloquentiæ formemus. Quod qua in re consistat postea dicemus. Præterea & certi characteres sermonis sunt, etiam in ipsa ætate aurea, unde & dignosci latinitas debet: cum non omnes phrasæ omni argumento convenient, sed sermo interdum aliquid à typo materiæ & characteris trahat, quod

non omni civili orationi simplici & puræ conveniat. Qua in re summa requiritur & prælegentis & legentis cura ac attentio. Dici enim non potest quam ipsæ singulæ phrasæ, epitetha, nomina, verba, e sermonis caractere colorem aliquem sibi inducant. *Aliam formam habet sermo interruptus & familiaris, qualis in Dialogis: aliam illi ideam circumponit sermo comicus, facetus, & ad risum compositus: aliam Satyricus, panegyricus, & sic deinceps: in quibus non solum translata alia, sed tota etiam facies sermonis diversa est.* Nos illam primo considerabimus ratione ætatum.

CAP. II.

De Auctoribus Latinis secundum ætates distinctis.

§. I.

Quemadmodum omnium linguarum certæ quædam periodi sunt: ita & latinæ. Ut enim homo suis ætatibus constat, & unâ, quâ potissimum ingenio & robore viget: ita Respublica ut potentiâ, ita sapientiâ & eloquentia certos gradus ac incrementa habet. Ut vigor hominis sum-

mus

mus tam ratione corporis quam imperii in quædam decennia : ita reipublicæ vigor ratione potentia & eloquentia in unam hominis ætatem compingitur. Ita Latina lingua præcipue circa Ciceronis tempora effloruit, neque ultra unam hominis ætatem duravit.

§. 2.

Solent vulgo quatuor ætates Latinæ linguæ constitui : aurea, argentea, ænea, & ferrea. quibus plumbeam ac luteam addit *SCIOPPIUS*. Convenientius eam secundum ætates divisit *BORRICHIIUS* in cogitationibus suis de Latina lingua. Nam ut in ætate hominis à summa perfectione non proceditur : ita nec in latina lingua. Ideoque infantia ac pueritia in *PACUVIO*, *ENNIO* similibusque Auctoribus quærenda. Juventus in *PLAUTO*, sed virilis & succiplena ætas in *CICERONE* & illis qui ipsi junguntur.

§. 3.

Postquam ad summam perfectionem pervenit latina lingua; concinnius illi imponuntur ætates à metallis. Ut enim aurum inter metalla præstantissimum, in omnibus partibus homogeneous & purissimum corpus est : ita lingua illa Romana, quæ Ciceronis tempore floruit omnium optima; quæ succedentibus temporibus semper degeneravit. In *argentea* quidem ali-

quid labis contraxit : sed tamen ab *aurea* ætate, in cujus confinio posita, multum trahit. *Ænea* & vocibus & phrasibus plus æruginis habet, & translatis sonoris ac argutis plus tinnit. *Ferrea* rubiginosa tota est. *plumbea* tota in luto hæret.

§. 4.

In prima ætate, quæ primum imbuitur latinis literis, non concedatur ulli ex *ænea* aut *ferrea* ætate Auctori locus : ne sermo statim in ipsis primordiis, ut Cantherius in porta, titubet. Formandus tamen erit sermo *πεφυκῶς ἢ πεπλασμένος* : simplex & elaboratus. *πεφυκῶς* est in Dialogo & narratione simplici : *πεπλασμένος* in orationibus, epistolis & historia. Ad utramque orationis formam mature manuduci debet *tyro* ; simplex sermo præmittendus est elaborato, ideoque a Dialogis & brevibus narratiunculis initium est faciendum. Non habemus istius commatis scriptores in ætate *aurea* pro juventutis usu, nisi vel *CORDERI* aut *PONTANI* colloquia aut *COMENII* januam & similia in defectu illorum substituiamus. Verum non sunt temere recentioris ætatis scripta in exemplum admittenda. Facile enim ex illis aliquid sordium hæret. etsi *CORDERI* colloquia non sunt omnino pro pueris contemnenda. In usum tamen dialogisticum proponenda *TERENTII* comœdiæ ; pro narrationum
exem-

exemplis inserviant fabulæ *PHOEDRI*: in historico stylo *JUL. CÆSAR* & *CORN. NEPOS* primum proponendi. Qui auctores quamquam plura in recessu habeant, quam quæ capere possit prima ætas, inprimis *TERENTIUS*, *NEPOS* ac *CÆSAR*; & sermo in illis suo quoque modo *πεπλασμένος* sit: tamen defectu simpliciorum ex illis, à prudente magistro pueris inculcandum est, quantum ad sermonis structuram pertinet, & continuis imitationibus, quæ magis ad puerilem captum sunt, planum faciendum: reliquæ adultiori ætati reservanda. *πεπλασμένος* sermo ille qui simplicior est, in minoribus Ciceronis epistolis primum formandus: ut paulatim tyro adsuescat ordinatiori periodo, & numerosæ ac copiosæ dictioni, quo quasi fundamentum aliquod torosæ & masculæ orationi substernitur.

§. 5.

Summus itaque & *ὁ πᾶν* in aurea ætate *CICERO* est, qui primus è Romanis illum sermonem vere *πεπλασμένον*, & ad Græcorum artificia elaboratam orationem formavit. Ejus orationi quasi per gradus adsuescere debemus. Primum, ut dixi, minutiores epistolæ de rebus domesticis & quotidianis legendæ sunt, quas collegit *STURMIUS*: tum quæ magis elaboratæ sunt, & in aliquo causarum genere versantur, quales

quales *MELCHIOR JUNIUS* sub certis classibus collegit: postea majores illæ orationes legendæ sunt, & attento ad omnes partes & omnia membra, eorumque connexiones animo expendendæ. In iis tamen etiam a facilibus ad difficiliore progressus instituendus est. Inter primas sunt oratio *Pro Archia*, *Pro Lege Manilia*, *Post reditum ad Quirites*, & similes, quas uno volumine collegit *CELLARIUS* cum brevibus annotationibus; reliquæ orationes, quæ in judiciali genere versantur, & contentiosum orationis genus, ac vehementiorem typum exprimunt, majori ætati reservandæ. Prolixiores quidem annotationes in *CICERONIS* orationes scriptæ sunt, quas è variis Auctoribus uno volumine collectas, & sub titulo *Bibliotheca commentariorum in orationes Ciceronis* editas habemus. In his artificium orationis ostenditur, & Præceptorum illæ potius, quam discipulo usurpandæ. Quibus addi potest Doctissimi *NICOLAI ABRAHAM* Commentarius in plerasque orationes Ciceronis, quibus philologica & historica uberrime explicantur. Neque ad artificium Rhetoricum omitti debet *MARTINUS CRONE* in analysi orationum Ciceronis. Ad epistolarum interpretationem & analysin *STEPHANI RICII* notulæ tribus tomis collectæ non sunt spernendæ: faciunt enim ad planum verborum sensum, & ad captum tyro-

tyronum se accommodant, germanica latinis miscendo, & historica epistolarum illustrando. Artificii oratorii in illis specimina quædam ad methodum *SCHRADERIANAM* laudabili conatu ostendit *PAPENIUS*, ConRector scholæ Brunsvicensis. Majores illi Commentarii, quos è variis collegit Clarissimus *GRÆVIUS*, eloquentiæ studium morantur, neque tam discipulis quam præceptoribus pro textus illustratione adhibendæ sunt. Rhetorica Ciceroniana orationibus ipsisungi possunt. Etsi enim compendia ordinatiora & breviora videntur, neque negligenda: tamen illa *Ciceronis* præcepta & uberiora & majori apparatu scripta, una cum ipsis præceptis typum aliquem familiaris eloquentiæ ob oculos ponunt. Plus enim Artificis manus & penicillus informant, quam hominis inexercitati jejuna & aliunde sumpta præcepta. quæ tamen si mediocriter formata oratio est, ex iis fontibus, unde *Cicero* hausit, *Aristotele* scilicet, reliquisque Græcis Rhetoribus depromi possunt. Philosophica *Ciceronis* tum legenda, cum accrescente judicio rerum cognitione paulatim imbuendus est animus: ita eveniet, ut non nuda tantum & strigosa philosophiæ præcepta, sed flore elegantis orationis vestita animo insideant: & cum ad eloquentiam rerum apparatus requiritur (ut fete semper) ea omnia lecta, velut loci

quidam communes animo obversentur, & identidem recurrant. quo consilio etiam *Freigius* in Ciceroniano suo Philosophiam omnem Theoreticam & Practicam sub certis rerum classibus & titulis, puris *Ciceronis* verbis delineavit, quæ magno usui futura sunt in ipsius orationis elaboratione, quæ semper in Loco aliquo communi philosophico vel versatur vel ad illum tendit, aut ex eo aliquid ad rem probandam assumit, amplificat, illustrat. Epistolæ ad Atticum plane non habent sermonem *πεπλασμένον*: sine enim artificio periodico pleræque scriptæ sunt, ut solet in familiari sermone sine ulla mensura incedere oratio, nisi quam fortassis casus & fortuna largitur: ideoque non legendæ illæ nisi jam tum maturo iudicio, cum & ipsa rerum obscuritas removeretur Lectorem.

§. 6.

TERENTIUS purissimæ latinitatis scriptor probe in succum sanguinemque vertendus, perpetuis ex eo imitationibus propositis. Proprietas vocum in illo mira est, phrasium nitor & puritas. Non spernendus est *Stephani Riccii* ad illum Commentarius. nam Critici illi, quos magno numero habemus, commentatores plus pompæ habent, quam primæ ætati convenit: cuius unicum esse debet, circa proprietatem vocum, & phrasium & membrorum juncturam

ram negotium, ubi tamen corrupta exemplaria negotium facessunt, quare consulti a Præceptoribus commentatores illi possunt. Sufficere hic mea quidem sententia *Bæcleri* editio posset, ejusque adjungi *χρησολογία*, neque omnino index contemnendus est *Kockerti*, qui primæ ætati utilior esse potest. Majores illi commentarii Præceptoribus potius quam discipulis legendi; paraphrases tamen illæ quæ habentur in Gallicis editionibus, in gratiam Delphini adornatis, alicujus usus: ceteræ enim notæ ex aliis plurimum descriptæ.

§. 7.

PHOEDRUS in fabulis plus nitoris Romani habet, quam aliquibus creditur, de cujus nos stylo plenius egimus libro de Patavinis. Liviana c. 10. Hæ prima ætate ita legendæ, ut pene memoriæ mandari debeant. Habent enim prudentiam civilem reconditam, cujus semina una cum iis instillantur. Legendæ sunt illæ cum Commentario Clarissimi *Schefferi*, qui *Freinsheimiana*, *Rigaltiana* aliorumque Auctorum notata simul etiam tetigit, & copiosum illum *Freinsheimii* indicem suæ quoque editioni adjunxit. In usum quoque eorum, qui gallicam linguam latinæ jungunt, versionem gallicam nitidissimam Domini *de Saint Aubin* adjecit. Non quidem referendus est inter primos aureæ ætatis scriptores; (vixit enim circa extrema tempora Augusti; ob quam

quam causam in argentea ætate à nonnullis reponitur; Trax quoque natione fuit) sed plus ille nitore Romani habet, quam multi ejusdem ætatis scriptores. Optandum vero, ut ex illo omnia menda essent sublata.

§. 8.

CORNELII NEPOTIS liquidissima & purissima Latinitas, quæ ad historiæ corpus formandum præ ceteris commendanda est. Verba, phrasæ, junctura, connexio periodorum in narrationibus, quæ singularem curam requirit, hic sollicitè expendenda. Nam quasi medio modo inter Cæsarem & Livium se habet. *Livius* plenioris & majoris historiæ auctor est, eamque omni ornatu, quem in historia desiderabat Cicero (Libro III. de Oratore) & in Cæsare requirebat, expolivit. Periodus moderatior; neque oratoris more exardet dictio in concionibus, descriptionibus &c: quibus in brevi vitarum historia opus non erat. Liquidæ itaque simplicisque narrationis idea, quæ tamen aliquid ab oratorio cultu, sed non valde quæsito habet, ex illo delineari potest. Ne quid dicam de nitore urbanitatis admirabili. Editio *Rosiana* omnium optima est, cui index ille *Bœclerianus* à *Vorstio* & *Rosio* auctus jungitur.

§. 9.

JULII CÆSARIS Historia simplex est & nitida, ideoque quâ phrasæologiam accens-

consensus *Cornelio Nepoti* est; modo exemplaria satis essent emendata: de quo passim *Lipsius* aliique queruntur, sed puto illos morosiores esse interdum, quam est necesse: iudicio tamen opus erit, ut abstineamus ab eius imitatione in locis, quorum dubia lectio est, neque temere phrasen usurpemus, circa quas exemplarium est dissensio. quæ perpetua debet esse observatio. Stulti enim sunt, qui voces rariores & phrasen in ostentationem ridiculam usurpant. rectius faciunt, qui τὰ ἀπαξ λεγόμενα, etiam cum non variant exemplaria, sed vel suspicio alicujus corruptionis esse possit, vel illa lectorem ut insolita offendant, velut scopulos fugiendos sibi existimant. Nam vel ex eo patet vocis insolentia, si non communis usus; & ab aliis nitidè scribentibus non usurpetur. *Julii Caesaris* editionem non adeo elimatam à Criticis habemus; omnium tamen optima *Jungermanniana* est, cui subjungi potest, quæ pleraque inde excerpt, *Arnoldi Montani*.

§. 10.

SALUSTIUS etsi in aurea ætate vixit & *Ciceroni* æqualis fuit: classicis tamen & ordinariis lectionibus adhibendus non est; nec prima ætate, antequam certa styli lineamenta duxeris; legendus: affectator enim in vocibus & phrasi est, neque semper legibus historiæ satisfacit; aliquando obscurus &

& brevis; aliquando plus quam opus est, prolixus, ut patet ex illa tædiosa conjurationis Catilinariæ præfatione, quæ gemino ab ovo historiam hanc orditur; multæ tamen ejus sunt & laudandæ virtutes, ut qui *Thucididis* esse æmulator voluit. optima editio variarum est, quæ in Belgio prodiit.

§. II.

PLAUTI Comœdiæ prima ætate non legendæ, nisi peritus præceptor judicii defectum suppleat. Est enim in Plauto latinæ linguæ penus: occurrunt omnium generum phrasæ: propria earum & accurata usurpatio est; nisi ubi ex comœdiæ lege sermo fingitur. quæ probè discerni debent omnia. Diligentissimus in illum commentator est *Taubmannus*. *Paræus*, qui *Lexicon Plautinum*, scripta & electa Plautina edidit, nugator est & sedens aliena ad pabula fucus, ineptissimus compiler. Plautina phrasi optime utetur, qui jam plurimum in stylo profecit.

§. 12.

LUCRETIUS, etsi purus ac Romanus scriptor, Quintiliano iudice; non facit ad corpus eloquentiæ formandum. Sermo enim ejus neque civiliter neque poetice *πεπλασμένος*, sed quia argumento didactico se accommodat, format interdum voces & phrasæ, quæ non nisi certa ratione
locum

locum in civili oratione habent. Quicquid autem in illo vocum ac phrasium, extra argumenti necessitatem occurrit, non est ab usu etiam civili segregandum, modo ab obsoletis & poëtismis abstineamus. Ejus optimam editionem dedit *Obertus Giphanius* cum præstantissimo indice : unde *Lexicon* suum *Lucretianum* plagiaris *Paræus* compilavit.

§. 13.

TITUS LIVIUS Romanæ historiæ Princeps merito habetur. Dictio in illo pura satis est, quicquid *Pollio* cavilletur. Ornatus historiæ summus, quo nullus nec *Nepos* nec *Cæsar* aut quisvis alius ipsi comparandus est. Conciones ejus gravioris & civilis eloquentiæ ideam repræsentant, unde ad exercitia oratoria præclara suppeditari argumenta possunt. Ad absolutum perfectæ historiæ exemplar unice commendari debet. Sero tamen ac maturiore ætate legendus est. nam præter stylum & historiam profunda civilis prudentiæ arcana hic latitant, quæ aureo plane libro detexit *Machiavellus*. Editio optima à *Gronovio* in Belgio procurata est, cujus perpetuæ in illum emendationes & notæ sunt. Ante aliquot annos in Gallia prodiit *Livius* quinque tomis in 4to à *Donatio* editus, qui *Gronoviana* pleraque transtulit; adjecit supplementa

menta integra Freinshemiana, & indicem absolutissimum ejusdem Auctoris, ab heredibus Freinshemii redempta. De ceteris quæ ad Livium pertinent, vid. dissertatio nostra de Patavinitate Livianâ.

§. 14.

TERENTII VARRONIS de re rustica, & lingua latina commentarii, vel Criticis vel qui de quotidianis & rusticis rebus loquuntur, commendandi sunt. nam illa scripta ad eloquentiæ corpus formandum non adeo pertinent. hic *Scaligeri* commentarii omne ferunt punctum.

§. 15.

CATULLUS, TIBULLUS, PROPERTIUS elegantissimi nequitiarum architecti. pleni enim rebus amorum sunt. ideoque delectus quidam ex istorum poematibus pro adolescentibus instituendus est. *Catullo* nil fieri tersius & elegantius potest. pleræque enim ejus phrasæ vel extra carmen & poetismum in soluta oratione adhiberi possunt. Editiones eorum auctorum & junctim & seorsim publicatorum variæ. Uno fasciculo meliores commentarios collegit, suasque notas adjecit *Grævius*. In *Catullum* seorsim *Isaacus Vossius* commentarium doctissimum scripsit, diligentissimus rerum & phrasum venerearum interpres. In *Propertium* absolutissimum commentarium edidit

edidit in folio *Passeratius* cum locupletissimo indice.

§. 16.

VIRGILIUS Poetarum Latinarum Phoenix, statim ex quo numeris & poemati adfuescat, tyroni legendus. Phrasis ejus extra poetismum civilis etiam usus, dictio poetica purissima, & longa cura exasciata, cujus genium à soluta diversum jam tum nosse discat discipulus. ejus Eclogæ primum legendæ, in quas *Stephani Riccii* notulæ non contemnendæ. Georgica & libri *Æneidos* cum paraphrasi *Frischlini*, vel omnia ejus opera cum perpetua paraphrasi, *Caroli Ruei*, qui in usum Delphini edidit Virgilium, legi possunt: unde gemina utilitas proficiscitur: ut statim ante oculos habeatur styli poetici & soluti differentia, qua in re sæpe peccari ab ipsis magistris solet. *Taubmanni* commentarius sufficere potest ad Auctoris intelligentiam. Qui artificia in illo poetica ostenderit hætenus, nemo fuit: quæ sunt tamen maxima. Oratori quantum conveniat *Virgilius*, dici non potest τὸ ἡθικὸν & παθητικὸν omne absolvit hic punctum. *Erythrai* in illum index utilisissimus est. Videantur *Rapini* observationes in poemata *Homeri* & *Virgilii* è Gallico Latine redditæ & *Ultrajecti* hoc anno editæ.

B

§. 17.

§. 17.

HORATIUS , Poëta terfissimus , ita Poeta est, ut non minor ejus usus in oratione soluta sit. Libri sermonum & epistolarum vel prima ætate pueris prælegendi; multa in illis ad vitam communem spectantia præcepta, & insignis urbanitatis character, ex acutis sententiosisque dictis efflorescens. e quibus ego multa ad verbum edisci vellem , quorum usus sponte se ingeret, ubi accreverit judicium. pleraque ex illis, si numerum demas, in oratione soluta usurpari possunt; quare *paraphrasis Lubini* utiliter cum illis conferri potest, & acuit præterea satyra mirifice ingenium. In odis plane se Poetam Lyricum præstat, qui vel Græcis ipsis palmam præripiat. argumenta pleraque moralia. quam ob causam odæ insigniores memoriæ mandari possunt, & poetismo sublato in orationem solutam transferri, vel in aliud carminis genus commutari, quod pro stylo poetico formando commodum est exercitium. cujus illustria exempla sunt apud *Wallium* in poematibus, & *Carolus de la Rue* in Idylliis. Earum artificium poeticum multa diligentia detexit *Bernhardinus Parthenius*. *Spielenbergius* in elegantissimo & rarissimo super illum Poetam commentario, in quo simul & Scaligeri censura super *Horatiana* loca, retene-

retunditur. Idem Auctor simili ratione artificium poeticum in *Virgilio* detegere voluit, verum non vidit lucem iste liber. Commentariorum in *Horatium* magna farrago est, quæ magis onerant legentes quam juvant. *Ad Satyras* ego commendarem *Rapportum*. Ad epistolas *Claudii Minois* commentarium. In odis, ubi difficiliora loca sunt, consuli potest vel *Torrentius* vel *Lambinus*, satis plana alioquin omnia, & paraphrastico commentatore, vel *Minellio*, vel *Bondio* absolventur. *Chabocius* vasto libro multa inutilia congescit, & *Torrentium* pene totum exscripsit. *Tretteri index accuratissimus est*, quem *Avenarius* ad omnes editiones accommodavit.

§. 18.

OVIDIUS aureæ ætati accensendus omnino est, quicquid etiam morosulis nonnullis videatur, qui ab illo primo linguæ latinæ pitorem corruptum esse existimant. Sed contemnendi illi sunt cum hoc suo iudicio, quos in dissertatione de *Patavinitate Liviana* p. 65. 155. 197. refutavi. Illud in eo unice reprehendendum videtur, quod copiosior & foecundior videatur, quam est necesse, neque manum de tabula tollere sciat. Verum hoc ingenii ubertati adscribendum, in dictione ipsa nihil impuri. liquida omnia & sincera. In exornatione si modum ex-

dit: sumamus ex illo cumulo, quantum est
 necesse, & ex fonte illo tantum derivemus,
 quantum fonticulus noster capere possit. Id
 in primis notandum est, Poetae hujus car-
 mina, quam optime cum soluta oratione
 commutari posse. Libri Tristium primum
 juventuti sunt legendi; pleni sunt affectuum
 & elegantissimarum expressionum, ac
 omnis generis figurarum Rhetoricarum.
 Nullus Poeta felicius & copiosius exercet
 Oratoriam quam *Ovidius*, praesertim in libris
 Tristium, & in epistolis *Heroidum*. Has
 Rapius vocat florem elegantiae Romanae,
 observatione in *Homerum* & *Virgilium* pag. 77.
 In Fastorum libris, quos senex scripsit, lu-
 xuries illa aetatis junioris jam est consumpta.
 Libri Metamorphoseon, fabulas poeticas &
 Deorum seriem proponunt, in quibus mi-
 rabilis connexio est. legi debent ob notitiam
 fabularum poeticarum. ad poema vero Epi-
 cum formandum unice commendandus est
Virgilius. Nam *Ovidius* paulo est abjectior,
 neque cultum illum in poemate Heroico at-
 tingit, qui in eo est necessarius. Legendus est
Ovidius cum commentario *Nicolai Heinsii*, qui
 in illo emaculando summam diligentiam
 impendit. ejus commentarius editus est
 seorsim (in duodecimo) & cum notis vario-
 rum (in octavo) tribus tomis.

§. 19.

GRATIUS Poeta sub Augusto Octavio
 floruit

floruit, qui Cynegetica scripsit, non est contemnendus, neque adeo ob dictionem, quamquam & illa non sit contemnenda, quam argumentum legendus, ubi nimirum vocum & phrasium venaticarum cognitione indigemus. ad dictionem poëticam formandam & omnem ejus ornatum cœteri sufficiunt. In eum extat *Flitii* Commentarius (in 12.) qui passim in *Barbium*, hujus *Gratii* commentatorem, invehitur: quem postea singulari libello vindicavit *Matthæus Lagus*.

§. 20.

MANILIUM alii ad auream, alii ad argenteam ætatem retulere. sub Augusto tamen vixit. Ejus exemplo ad stilum poëticum formandum opus non est, cum habeamus meliores. Is enim in argumento didactico & Scholastico versatur, quod à sermonis nitore longius abest. Explicanda enim erat Astrologia, omnesque illi termini poetica dictione exprimendi, quorum usus in sermone poetico nullus est. siquidem illic non tam ad doctrinam, quam ad eloquentiæ ornatum respicitur. In illum extat *Josephi Scaligeri* doctissimus commentarius, quem recudi fecit Argentorati *Bæclerus* cum *Ismaëlis Bulialdi*, Astrologi clarissimi, additionibus.

§. 21.

VITRUVIUS rei architectonicæ scriptor, aureæ licet ætatis : tamen ob argumentum multum plebeitatis habet. Artem enim docenti utendum erat artificum terminis familiaribus , quibus locus non est in eloquentia civili. Multum tamen confert ad Nomenclaturam Veteris linguæ latinæ ; ut ex eo discamus voces & phrascs huic arti peculiares , quas apud alios scriptores non facile invenimus. Ad eloquentiam parum inde adjuvamenti est , sed rei Geometricæ quatenus in praxi consistit , & illa antiquis cognita fuit , magna ex illo haberi potest notitia. Ideoque Mathematica discantibus autor ille impense proderit. Optima ejus editio Lugduni Bat. in folio prodiit cum commentario *Philandri & Bernardini Baldini* libro lexico de verborum Vitruvianorum significationibus.

§. 22.

HYGINUS à Borrichio ad aureæ ætatis scriptores refertur , ut qui tempore Augusti vixerit. *Schefferus* refert ad Antoninorum tempora , quod si verum est, ex aureæ ætatis serie deturbandus est. Libertus fuit. Scripsit fabulas astronomicas. Stylus aliquanto horridior est , & interdum pene *σολοικες*, quæ ratio tamen loquendi non

non adeo imputanda est corruptis exemplaribus, quam ipsi tempori quo scripsit. Fortassis etiam, ut fuit libertus, non adeo nitori linguæ studuit. Defendit tamen has ejus locutiones adversus illos qui suspectas habent, *Thomas Munckerus*. Non est ejus adeo magnus usus ad eloquentiam. Legendus est cum commentario *Schefferi*, qui editionem ejus publicavit anno 1674. in 8vo. una cum commentario *Munckeri*.

§. 23.

Qui supersunt ex aurea ætate, fragmenta potius aliqua, quam integra scripta sunt. Sunt *Caji Redonis* elegiæ duæ in obitum *Mœcenatis* scriptæ, quas *Mœcenati* suo adjunxit *Meibomius*. sunt *Cornelii Severi* & aliorum poëmata quæ edi solent cum *Virgilianis* operibus. sunt priapeja carmina, dictionis elegantissimæ, nisi quod in impuro argumento versantur. Quæ illustrare tamen commentario suo dignatus est *Scaliger*, & post *Scaligerum* *Scioppius*, homo ad illas elegantias factus. In quæ præterea Commentarium, si recte memini, promisit *Isaacus Vossius*.

CAP. III.

De Scriptoribus argenteæ ætatis.

§. I.

Non quidem opus erat operosa auctorum argenteæ ætatis recensione. Nam ex aureæ ætatis scriptoribus, quantum ad eloquentiam spectat, satis superque nostræ industriæ prospectum est. Quoniam tamen illis, qui jam robur aliquod civilis eloquentiæ acquisiverunt, elegantiam aliquam & acrimoniam superaddunt: non omnino negligendi sunt: sed postquam fundamenta è prioribus illis bene jacta, ad ornandum sermonem quasi in subsidium adhibendi. plerique enim hujus ætatis auctores, ut & sequentium magis de ornatu rerum & sententiarum solliciti sunt, quam de elegantiâ & nitore verborum. Hinc statim ad acumina & argutas sententias delapsi sunt, quæ illa ætate omne punctum ferebant: facem quasi prælucentibus declamatoribus, qui in controversiis suis tam scholasticis & umbraticis, quam forensibus isto deliciarum genere mirifice capiebantur. quare ex iis auctoribus si moderate ad usum transferantur nonnulla, neque adeo stipentur, commodè

de illis uti poterimus. nam luminibus quibusdam vestiunt orationem, quæ si è verbis & totius sermonis contextu cum ratione quadam efflorescunt, vehementer ornant, illustrent, amplificent orationem. Habent enim plerumque tales argutiæ aliquid in se enthymematis, è loco dialectico defumti. ideoque semper novam aliquam orationis speciem exhibent: modo illa moderatione in illis versemur, ne quid frigidi & affectati pelleat.

§. 2.

VELLEJUS PATERCULUS historiæ Romanæ, sed particularis scriptor elegans: in quo non multa occurrunt, quæ aurea ætas fastidiat: nisi quod nimium interdum videatur elegans. Nam ridiculi sunt, qui illum librum, ut minus latinum, repudiarunt: de quibus nos in *Patavinitate Liviana*. Illud in primis in eo notandum est, singulares illum characteres personarum proponere: qua ratione multum adjumenti ad prudentiam civilem confert. nam ex historia statim lineamenta moralia personarum apparent: quod quidem historico præcipue non est spectandum. Sed cum ille sollicitè hos characteres observavit, laudandus quam maxime ille auctor est; & exemplum Viro civili præbet in notitia personarum characteristicâ, quæ magni in prudentia

civili usus est. Multi sunt in illum commentarii scripti. Præ cæteris laudandus est ille variorum, curante *Antonio Thysio* editus, & quem *Bæclerus* edidit una cum dissertatione de characteribus *Vellejanis*.

§. 3.

SENECA Philosophus & Rhetor pulcherrima opera scripsit, non tam ad formandum stylum & sermonis contextum, quam ad ornatum sententiarum adhibenda, non enim est in illis libris sermo *πεπλασμένος*, & qui inter se cohæreat ac sibi respondeat: quam ob causam etiam veteres *calcem sine arena* vocarunt. perpetuæ sunt de argumentis, quæ tractat, sententiæ, quasi seorsim ita positæ, non ut corpus orationis conficiant. Scilicet ut meditantis impetus abripuit ingenium: ita sine connectione omnia prolata sunt: quæ tamen si recte adhibeantur, mirifice ornabunt orationem. ideoque ubi jam stylus formatus, assidua ejus lectio suadenda est: ut inhæreant animo sententiosi conceptus multi: quorum frequentia quo major est, eo minus destituet oratorem cum argumenti ratio illum in istos locos abripuit. Sed judicii moderatione opus est, ut ex illis tantum bellariis & condimentis tantum sumamus, quantum ad condiendum sermonem opus est. *Sacra eloquentia studiosis mirifice*

rificè proderit Seneca scripta legisse. Varii sunt commentarii. Est variorum, qui Parisiis in folio prodiit: est *Lipsii* & variorum, curante *Gronovio* edita, quæ & *Lipsianas* & *Gronovianas* notas integras habet.

§. 4.

SENECA TRAGICUS post veteres illos Romanos dudum deperditos Tragœdias scripsit, in quibus Hispanicum tumorem accusant nonnulli, inprimis *Lipsius*, meritò à *Scaligero* reprehensus. dictio enim in Tragœdia debet esse sublimior, neque meo iudicio quiquam magnopere in eo reprehendendum occurrit. Absque illo fuisset nulla fuisset Romanorum in Tragœdia gloria: quæ hoc auctore etiam cum Græcis incertamen descendere possit. Commentarii in eum varii sunt. sed optimus videtur variorum, qui curante *Gronovio* prodiit. Super ejus Tragœdiam hispanica lingua commentarium scripsit, quod ad ipsam artem attinet *Gonzalez de Sala*.

§. 5.

VALERIUS MAXIMUS non adeo spernendo stylo scripsit, etsi nonnulla in illo occurrunt, quæ non omnino auream ætatem deceant: cum *Lipsii*, *Caleri* & *Pighii* animadversionibus editus 1614. in 8vo. Est & alia editio variorum curante *Thyffio* edita. 8vo Lugd. Batav. 1670. sed tamen & *Vorstii* editio

editio notissima cum pleno Indice multa recentius in textu emaculavit; & *Rupertus* in commentario suo Moralia & Politica potissimum respexit.

§. 6.

JUSTINUS inter aureæ ætatis scriptores refertur *Scioppio*, merito ob id à *Borrichio* reprehenso. Fuit enim epitomator *Trogi*, scriptoris latinissimi ex aurea ætate. & verò epitomatores eadem verba Auctorum non retinent, ut videmus in *Floro*, qui *Livium* in compendium contraxit, multo in dictione *Livio* neglectior, & ætatis posterioris, quem admodum *Justinus*. sed verisimile tamen est, nitidiorem fuisse *Justini* stylum, quod ipsa dictio arguit, atque ausim ego affirmare, pleraque illum *Trogi* verba retinuisse: adeo parum abest ab aureæ ætatis dictione; si quædam duriuscula exceperis. In hunc *Berneggeri* extant notæ eruditæ, & variorum in Belgio editæ, quibus breviculas quasdam notas adjecit *Grævius*. *Vorstius* quoque cum commentario suo seorsim, tum & *Schefferus* edidit, in quibus singulis aliqua reperies quæ Auctorem illustrent. Apud *Berneggerum*, *Vorstium* & *Schefferum* indices laudantur.

§. 7.

CURTIUS qua ætate vixerit plane incertum est, ad argenteam tamen referri solet,

let, ac merito quidem. neque enim quicquam facile in dictione ejus reprehendendum occurrit. in concionibus argutus est, & quodammodo ultra ætatem auream, quæ in iis parciore esse solebat. Hinc sapissime illum nimium rhetoricari deprehendas. cujus exemplum esse possit in oratione Scytharum ad Alexandrum, quæ quasi in ludo declamatorio potius formata, quam à gravibus & seria tractantibus viris proposita videtur. Mensura dictionis moderata est, non nimium excurrrens & exsultans, neque nimium concisa & prærupta, ut *Taciti* dictio, sed quasi medio modo se habens: ideoque quoad periodum in exemplum præ aliis poni potest. In illum commentarius optimus est *Freinsheimii*, qui in hunc Auctorem diligentiam summam impendit. notæ ejus uberrimæ tam historicæ quam philologicæ, accedit index adeo luculentus, ut plenior esse non possit, præsertim in editione ultima in 4to edita. Unde pleraque excerpserit, qui in usum Delphini *Curtium* edidit. *Blanckhardus* tamen in Commentario suo non spernenda passim monuit.

§. 8.

PETRONIUS nequam scriptor, sed elegans, Neronis ætate scripsit, & flagitiorum ejus hoc quasi monumentum reliquit. In
rebus

rebus Venereis admodum disertus, ut abunde suppeditare possit materiam in his deliciis versantibus. *Scaliger* notabat phrasin ejus, ut quæ Neronianam ætatem exprimeret. Aridum enim & disinctum scribendi genus habet. latinitas tamen non conreminenda, sed judicio tamen usurpanda; cum non raro apud illum occurrant, quæ argumentum suum sapiant, & ex nequitio ingenio conficta. Fragmentum aliquod ejus nuper *Tragurii* in Dalmatia reperi-
tum est, de cujus integritate disputant hodieque inter se Critici. refertum enim est vocibus plebejis & in latina lingua inauditis: verum ego non suppositum esse existimo, sed genuinum, & sermone plebejo scriptum; qui tamen ad imitationem proponi non debet. In illud fragmentum sunt *Wagenseilii*, *Valesii*, *Rheinesii*, *Schæfferi* commentarii. in ipsum *Petronium* extant variorum commentarii, ab *Erhardo* in 8vo, editi; *Joann. Petri Lotichii* in illum commentarius Medicus, qui ad has nequitias etiam medicam symbolam contulit, præscribens remediorum formulas, & multa interserens longius petita. Accedunt etiam *Scioppii* notæ: qui, ut Autorem sedulo explanaret, venereas etiam dicendi formulas & phrasas in germanicam linguam convertit.

§. 9.

PERSII satyræ multum habent duri & rigidi; ut in argentea ætate pene ferreus dicendus sit. Unde patet non usque adeo perpetuum esse ex ætate iudicium; ac posse nonnunquam in bona ætate malos, in mala bonos nasci autores: quare Juvenalis, qui ipso ætate inferior est, longe ipsi est, quod dictionem attinet, præferendus. Mira ejus est obscuritas, quam summo studio affectavit. quam obscuritatem videns *Hieronymus*, abjecto libro, si non, inquit, vis intelligi debes negligi. Laboratum tamen in illo à doctissimi viris est. nam ut antiquiores commentarios omittam: extat in illum *Isaaci Casauboni* doctissimum opus: de quo non immerito *Josephus Scaliger* dixit, *condituram meliorem esse ipso cibo*. Est enim plenum omnis eruditionis. legi tamen potest auctor ille: quoniam nonnunquam occurrunt antiqua *παροιμῖαι*, quorum in sermone usus esse potest. Qui verborum intelligentiam tantum querit, legat paraphrases *Frischlini*, *Lubini*, & *Marginales Bondii*, *Wedderbornii*.

§. 10.

LUCANUS poemata scripsit de bellis civilibus, Oratori quam Poetæ propior. non destituitur quoque prudentia civili; sed nequo

que dictio satis pura est, neque moderata elocutio. iudicium passim vacillat. immodicus est in digressionibus: & characterem illum, qui ad carmen Epicum scribendum requiritur, plane negligit. unde *Scaligero non canere sed latrare dicitur*. Plane itaque in exemplum non est proponendus. atque hoc in se *præprimis* vitium habet, quod jam cum Cicero in poetis Cordubenfibus notabat, sonare illos aliquid pingue. Varii sunt in illum commentarii, ut *Grotii*, *Mycilli* & aliorum. index in eum extat *Theodori Pulmanni*. *Farnabius* cum paraphrasi marginali edidit.

§. II.

POMPONIUS MELA Geographus est. in illum extat eruditissimus *Isaaci Vossii* commentarius, in quo multa occurrunt notatu digna.

§. 12.

COLUMELLA, PALLADIUS, rei rusticæ scriptores, laudandi omnino sunt, & *pene Varroni præponendi*. eleganter enim de hoc argumento scribunt.

§. 13.

CORNELIUS CELSUS, medicus, elegans plane scriptor est, ut medicorum Cicero vocari meruerit. non habemus ejus editionem accuratam. Nam quæ Lugduni Batavorum anno 1592. in quarto prodit multis

multis scatet mendis. absolutissimum in illum commentarium parabat *Holstinus*, Medicus Tönningensis : sed mors huic consilio intercescit.

SCRIBONIUS LARGUS, in quem labores suos impendit Joh. *Rhodius*, CELSO longe postponendus est.

§. 14.

ASCONIUS PEDIANUS commentator, in aliquot *Ciceronis* orationes, ad hanc quoque ætatem spectat: ac magnam sæpe lucem ipsi *Ciceroni* accendit. Ceterum notandum hoc est, quod & *Borrichio* notatum videmus, multos esse in hac ætate auctores, qui cum illis, qui in ætate ænea scripserunt, comparari minime possunt: reperiuntur enim in hac nonnulli, qui argenteos illos Scriptores longe superant: cultura forsitan & studio eluente sordes illas, quas ab ætate contraxerat oratio: ut nonnunquam inter barbaros scriptores aliquos deprehendimus, qui ad veterum etiam temporum elegantiam quodammodo adspirant: ac nostro etiam tempore non pauci sunt, qui cum Augustei ævi scriptoribus conferri possunt, ceteros autem longe superant.

CAP. IV. De ætatis æneæ Scripto- ribus.

§. I.

Ad æneam ætatem, tinnulam magis & sonoram accedimus, quam est aurea ac argentea. vixerunt enim hic auctores magis argutiis & scholasticis quibusdam elegantissimis dediti. Nam epitheta arguta, breves sententiæ, omne hic punctum absolunt: in quibus etsi jam tum *Ovidius* & *Vellejus Paterculus* ex argentea ætate floruerint: magis tamen illi sibi temperarunt, atque ab illis quæ frigida & affectata sunt abstinerunt. Videatur de illis *Rapinus*, observationibus in poemata *Homeri* & *Virgilii* p. 71. 72. 73. editionis latinæ. *Lucanus* ex argentea ætate totus in his deliciis est, supra modum & sine ratione adhibitis: tum & *Tacitus* in historiis, qui ultra modum sententiosus est, quibus addi etiam potest *Seneca*. Stulti itaque omnino sunt, qui hos auctores, ut qui genus orationis *πικρασμένον* non habent, ad imitationem sibi proponunt: ut, si quis vel e *Tacito* vel e *Seneca* discat formare orationes & epistolas. nihil enim ineptius fingi potest. Nam totum hoc scribendi genus, non constat

stat partitione aliqua oratoria, non membris & periodis in orbem redeuntibus, sed solum ingenii ductum sequitur, qui in auctoribus, qui ita scribunt, elegantiam aliquam præ se fert, in imitationibus vero elumbis & exilis est, & in putidissimas & frigidas nánias convertitur, quibus semel admissis, dictionem omnem omni in genere corrumpi necesse est: cum sententiosum illud & argutum scribendi genus, ubi semel sermo *πεπλασμένος* in habitum concessit, facillimo negotio ab homine ingenioso exprimi possit. Recensebimus eorum præcipuos.

§. 2.

QUINTILIANUS inter principes hac in ætate merito poni debet, etsi Hispanus; nemo enim post *Ciceronem* elegantius & majore cum judicio de arte rhetorica scripsit: immo ipsum *Ciceronem* superavit: si plenitudinem praeceptorum spectamus. dictio concinna & nitida est, quæque adeo nihil habet peregrinitatis & tumoris hispanici: ut ineptus omnino sit *Philelphus*, qui in illo Hispanitatem nescio quam notavit. non solum itaque ob præcepta eloquentiæ, quæ sunt sapientiæ plena: sed & ob stylum legi debet. *Culpandus tamen in illo, quod Aristoteli interdum sine ratione adversetur.* Judicia, quæ de scriptoribus passim inspergit, magni sunt facien-

da, inprimis Lib. X., vel eam ob causam, quod, cum tot alios habuerit auctores, quos commendare potuerit, solum tamen normam & regulam eloquentiæ constituerit. *Ciceronem eumq; profecisse in eloquentia iudicaverit, cui Cicero placuerit.* Ubique reperiuntur ejus in sententiarum immoderatum usum declamationes. immo ipse *Seneca*, qui morbo hoc præ aliis laborabat, non dissimulat ætatis suæ intemperantiam. Editiones *Quintiliani* variæ sunt. Variorum illa, quæ in Batavis prodiit, veteris præferenda videtur. Edidit quidem etiam *Pareus*: sed ille solenne suum obtinet, omnis enim illi clamat pagina: fures; nam ex *Cresollii vacationibus autumnalibus & Theatro Rhetorum* pene omnia depromsit, nominato interdum, alias dissimulato auctore.

§. 3.

JUVENALIS Satiricus, inter meliores etiam hujus ætatis est, Horatio tamen longe inferior, si dictionem spectes, argutia interdum superior, concinniores etiam in carmine numerum observavit, quam fecit *Horatius*, qui studio culturam illam neglexit. Multa possunt ex illo depromi sententiosa & adagialia, quæ ad ornandam orationem etiam solutam suo loco & tempore faciunt. Habemus in illum Scholiastas veteres Grammaticos. Usui nostro infer-

vire

vire poterit vel editio variorum Batava, vel illa Lubini, qui paraphrasin & notas in illum scripsit, adjecta etiam Sciagraphia Dialectica & Rhetorica. Etiam *Farnabii* notæ marginales non omnino spernendæ.

§. 4.

SUETONIUS; neque hic contemnendus Scriptor est, & in historico certe stylo multum laudis meretur. intra fines enim historici se tenet, neque *Taciti* more luxuriatur nimis conjecturis & sententiis. Vitæ Imperatorum satis concinna serie ordinantur, & quæ in illis occurrunt, tum quod ad dictionem spectat, tum quod ad prudentiam civilem, non mediocrem cultum præ se ferunt, si pauca, quæ non satis latina ac pura quibusdam videntur, exceperis. Melius certe ad imitationem in historia scribenda proponi potest, quam *Tacitus*. Varii sunt in illum commentarii. Variorum editio Parisiis prodiit in folio anno 1620, ubi integræ habentur variorum notæ, inter quos præcipuæ sunt *Torrentii* & *Casauboni*. *Casauboni* commentarius seorsim editus est, curante *Bæclero*, Argentorati in 4to., cum indice locupletissimo. Novissima editio prodiit in Batavis, curante Grævio, cum notis integris *Casauboni* & *Torrentii*, additis etiam Grævianis. Si quis historiæ illustrationem præceteris desideret: laudanda

danda est editio Parisiensis, per *Carolus Patinum* procurata. in qua illud singulare est, quod singulis Cæsaribus, eorumque rebus gestis subjecerit *nummorum* imagines, qui mirifice illustrent historicam cognitionem. quam methodum etiam sequutus est *Grævius* in editione *Flori*. Extat insuper etiam *Schillii* commentarius in *Suetonium*, cum notis variorum, qui nonnunquam de suis aliqua erudita immiscet, ac legi dignus est.

§. 5.

PLINIUS uterque in hac ætate laudem merentur. Quod enim ad *Plinium* secundum attinet, gratulari nobis debemus de servato hoc opere, quod totam rerum naturam, ut antiquis illa cognita fuit, pulcherrimo compendio repræsentat. Optandum esset ut libri ejus *de bellis Germanicis* in manus nostras incidissent, sed illi fuerunt deperditi, incomparabili rerum Germanicarum jactura. Opus illud *Plinianum* multis scater mendis, nec in hunc diem inventus est, qui medicam illi manum adhibere vel potuerit vel voluerit. pauca enim illa, quæ *Dalechampius* & *Salmasius* commentario in *Solinum*, & *Gronovius* in editione variorum *Batava* notarunt, non tanti sunt, ut integrum nobis præstent hunc Auctorem, ad quem emaculandum opus esset Viro, non Critices tantum, sed omnis historiæ naturalis

ralis & Geographiæ perito. Multum sane in illo præstitit *Salmasius*, exercitationibus in *Solinum*: sed pauca habemus manuscripta exemplaria, unde corrigi textus possit. Magnus hujus Auctoris usus est in rebus naturalibus latino sermone efferendis. absque illo enim si fuisset: nomenclatura rerum naturalium in multis nos destituisset. Philosophi naturales multa in illo habent quæ agant. Nam indignum sane est, a Sciolis nonnullis interdum exagitari Plinium, ut mendaciorum & fabularum confarcinatorem: cum multa in eo reperiantur, quæ ad profundissimas naturæ speculationes fenestram aperiunt. Alter ille *Plinius*, cujus exstant Panegyricus & Epistolæ, sæpe vel seorsim vel junctim editæ, argutum & sententiosum dicendi genus in oratione & epistolis sequitur. Ejus Panegyricus pene omnes LLCC. de Principe exhaustit, adeoque syllogen quandam repræsentat omnium istarum rerum, quæ ad laudem Principis pertinent. plus certe dixit, quam debuit, & longe a Veterum in dicendo parsimonia remotus. Tota Principis formandi quasi idea, omnisque civilis prudentia, ad hoc argumentum spectans, in ista oratione repræsentatur. Epistolæ ejus quamvis argute satis scriptæ, longe tamen absunt ab illo artificio rhetorico, quo usus est *Cicero*. ne quid dicam de Symmetria periodorum, qua

in re totus defuit. non est itaque nisi post formatum jam stylum & matura ætate legendus : ut suppeditet interdum sententiosa aliqua, quorum in orationibus & epistolis usus esse potest, sed necessaria semper moderatio requiritur. In epistolis ejus emendandis & explicandis multam operam posuit *Buchnerus*, tum & alii nonnulli, post quos tamen *Buchnerus* scripsit. Panegyricus ejus in Trajanum seorsum editus est, cum notis uberrimis & copioso indice à *Berneggero*. Non desunt & alii commentatores. sed facile illis, quos commemoravi contenti esse possumus.

§. 6.

CORNELIUS TACITUS. Magnum hoc nomen est, & hodiernorum Politicorum idolum, qui magis de corruptæ reip. arcanis discendis docendisque, quam in rectæ reipublicæ doctrina percipienda solliciti sunt. Nihil derogo laudi vel famæ Taciti: ex ingenio tamen temporum suorum scripsit, & corruptissimam rempublicam proposuit suis suspicionibus, ut ingeniosior & sententiosior videretur: quædam Principum non male cogitata corrumpens. laudem tamen illam merebitur, quam Sophistæ inter Philosophos. Ut enim vitare discamus malas artes, quas *Tacitus* partim recenset,

set, partim etiam docet, cum non essent tam vafri Principes, quos ipse tamen vafros ingenio suo facit, magnopere prodest Tacitus. Nullum enim scelerum in republica genus est, nulla flagitiorum mysteria, quorum illic lineamenta non sint ducta. Dictio ejus singularis est, & in suo quidem genere elegans. sed qui illam, ut orationis ideam præscribunt, omnino stulti sunt. Nam singulare aliquid affectavit *Tacitus*, & a communi dictionis sensu abhorrens, quod, moderante *Taciti* judicio decorum quidem & pulchrum videtur, imitatione nonnisi ineptum fieri potest: inprimis si illa intempestiva sit & præmatura. neque enim omnino inimitabilis est *Tacitus*: sed illi demum imitationem hanc assequeuntur, qui jam tum styli artificium omne possident. Commentariorum in illum scriptorem integra bibliotheca est, quibus recensendis aliquot horæ impendendæ essent. Quod ad commentatores políticos attinet, plerumque alius alium exscribit. *Omniuni optimi sunt Forstnerus & Bæclerus*. Ad Historiam ipsam & verborum intellectum commendari unice debet illa variorum editio, quæ Lugduni Batavorum prodiit, curante *Gronovio*: in qua habentur Lipsianæ notæ integræ, ut & aliorum optimorum commentatorum, tum & Gronovianæ. adjectus quoque est index

Ber. eggerianus. Lectio ejus prima ætate plane separanda est, corrumpet enim stylum prava imitatione. nulla enim periodi in illo mensura est: quamvis tamen aliqua sit membrorum symmetria. quare fatiscentem & hiantem stylum formabit, qui ad ejus dictionem se componet. matura vero ætate cum rerum cognitione imbuedus est animus, tum ille, & quidem non negligenter, legendus. facit enim in versandis negotiis humanis calidum, suspicacem, circumspectum, & qui aliorum fucos facile animadvertat, & in animorum interiora penetret. Huic præcipue fini destinandus est *Tacitus*. Nam qui gerendæ reipublicæ regulas ad hæc exempla formare volunt, Tyrannidem inducunt. Quare non omnino contemnenda *Scioppii* illa cautela, qui e manibus principum excutendum esse *Tacitum* existimat. semper enim e corruptis exemplis aliquid hæret, & sub illarum recensione occulta quædam flagitiorum doctrina instillatur.

§. 7.

LUC. ANN. FLORUS, Panegyrista potius & declamator, quam Historicus, & cæteris omnibus ratione dictionis postponendus. Est enim usque ad ineptias sæpe poeticus, ut demonstrat in docta illa dissertatione præliminari de *Flori stylo Gravius*, ejus commen-

commentator. Quod si tumida illa exceperis, cetera non usque adeo sunt contemnenda. rerum enim Romanarum satis concinnum breviarium repræsentat. Variæ ejus editiones sunt. *Freinsbemiana* ob indicem commendanda: *Græviana*, quæ omnium recentissima est, ob illustrationem historiæ ex numismatibus.

§. 8.

STATIUS inter Poëtas hujus ætatis principem locum nonnullis habere videtur: tanti a nonnullis æstimatus, ut *Virgilio* etiam præferant. a quibus ego plane dissentio. quamvis enim haud negem, sublimem esse in descriptionibus, ceterisque ornamentis poëticis: dictio tamen ejus nescio quem tumorem habet, ac interdum etiam peregrinitatem: ut *Rapinus* eum furiosum appellet, *Famianus Strada* agyrtæ alicui comparet, variegatis plumis & versicoloribus ligulis ornato. v. g. privare aliquem oculis, reddidit ille per projicere diem, & similia. Dictio ejus interdum insolens est: phrasæ sæpe confictæ & ineptæ, magna translationum audacia, quæ ubique apparet, quare caveat sibi tiro ab immoderato ejus poetæ usu: ne dictionem suam inficiat. Cum è Poetis aureæ ætatis dictio formata est: ad colorandum poëma interdum adhiberi potest, sed majori id fieri judicio debet, quam ipse

ipse fecit. Immanem in illum commentarium scripsit *Barthius* : in quo multa sunt conglobata inanium allegationum. Gallicam in illum paraphrasin scripsit auctor, cujus nomen mihi jam non succurrit. *Gronovius* in eo emendando operosus fuit, cujus commentationes & seorsim prodierunt, & in editione variorum, quæ in Belgio procurata est.

§. 9.

MARTIALIS, Hispanus, acutissima scripsit epigrammata, quæ, quamvis venustatem Catullianam in verbis & figuris dictionis non repræsentent : acrimonia tamen longe vincunt. Est enim mirus in nonnullis lepor, sed & foeda in quibusdam spurcities: quam ob causam hoc sibi negotium datum esse crediderunt Jesuitæ, ut tanquam novi pudicitiae custodes, cœlo lapsi, auctorem hunc a sordibus illis repurgarent. E quibus *Raderus* commentarium in illum scripsit vastissimum in folio, omisis epigrammatibus illis quæ impuri argumenti sunt. Editionem variorum in illum procuravit *Petrus Scriverius*, qui in 12mo integras notas variorum edidit, suasque adjecit. Prodiit quoque variorum editio in Batavia. Index in illum plenissimus est *Josephi Langii*. Commentatus quoque in illum est, *Ramiretus de Prado*, Hispanus, homo

πολ.

πελλῆς φαντασίας, quem etiam ut plagiarium notat *Thomasius*, in dissertat. de Plag. §. 530. *Cesar Zarottus*, Philosophus & Medicus Venetus, in Martialis epigrammata commentarios medicos scripsit, Venetiis anno 1657. in 4to editos. *Farnabii paraphrases marginales non sunt contemnenda.*

§. IO.

VALERIUS FLACCUS Argonautica scripsit, cujus dictio ad poësin non usque adeo commendanda est, cum meliores habeamus. legendus præcipue ob argumentum est. In illum commentati sunt *Ludovicus Carrio*, *Zinzerlingius* & alii. Exiit & variorum editio in Batavia.

§. II.

Ejusdem commatis poëta est **SILIUS ITALICUS**, apud quem tamen interdum aliqua reperiantur elegantia, etsi judicium plerumque vacillet: Historico tamen propior est, quam Poeta, ut *Lucanus*, ideoque ob historiam potius, quam ob dictionem poeticam legendus. In illum crepundia scripsit *Dan. Heinsius* 14. annos natus. Ueberiores in illum notæ sunt *Claud. Dausquii* in 4to editæ.

§. 12.

SOLINUS, *Plinii* epitomator, & ipse parum ad dictionem formandam prodest. nam quæ apud illum bona sunt, omnia sunt

sunt & *Plinio* deprompta. Ignobilis certe auctor & *Plinii* umbra : nunc tamen aliquo precio habendus, postquam in illo omnem suam operam posuit *Salmasius*, qui in vastissimo volumine eruditissima ad cognitionem rerum naturalium Philologumena collegit, atque hac ratione *Plinium* ipsum illustravit, cui collatus *Solinus* interdum aliquid affert lucis.

§. 13.

JULIUS FRONTINUS, rerum militarium scriptor, de stratagematibus, & aquæ ductibus scripsit. Ex illo nihil capias, præter illa, quæ ad hoc argumentum spectant. Editus est cum notis variorum *Arnhemii*. Ceteri minutiores scriptores, si qui sunt, exigui momenti sunt.

CAP. V.

De ferreæ ætatis Scriptoribus.

§. I.

Relinquimus ætatem æneam, quæ plus tinnit, quam aurea & argentea, & procedimus ad ferream, quæ plus stridet & strepit, ac familiari quadam rubigine fucata

fucata est. Invenias hic monstra verborum, horridam syntaxin, numeros difficiles, periodorum ἀνακόλυφα, totum denique sermonem squalidum & horrentem. Occurrunt quidem in auctoribus nonnullis, præsertim Africanis & Hispanis, voces & verba insolita, quæ tamen esse latina negare quis non potest, & fortassis jam ab aurea ætate derivata, sed quoniam illa a Scriptoribus his neglecta fuerunt, inepti sunt, qui data opera illa reducere laborant. Nihil itaque ex illis hauriendum est ad dictionem latinam, quod novitatem aliquam & peregrinitatem sapiat: si non puriores scriptores adstipulantes habeamus. In formulis & rerum argumentis aliqua interdum occurrunt non spernenda: si deceniori orationis cultu vestiantur: dictio vero ipsa cum judicio adhibenda est, quamquam & hic Auctores secundum gradus differant. Sunt enim aliis alii meliores. Nos tamen rectius faciemus, si intra auream & argenteam ætatem nos teneamus. Quemadmodum enim qui auri naturam & affectiones novit, atque illas indagare didicit, facilius dehinc de imperfectioribus metallis judicat: ita quoque qui aureæ ætati in Latinitate adsuevit, statim ipso sono & habitu distinguet sordidiorem dictionem.

§. 2.

AULUS GELLIUS seu AGELLIUS, merito hic principem locum tenet. Namque ex illa ætate ceteris omnibus, quod ad dictionis puritatem attinet, præferendus. neque enim e sentina & face vulgi hauserat voces suas, sed per optimos puriorum ætatum scriptores lectione volutus, styllum ex illis formavit, non omnino veteribus dissimilem. Habentur apud illum præclaræ observationes grammaticæ & philologicæ, excerptæ e vetustis scriptoribus integræ, ut vel inter Criticos vel inter locorum communium scriptores censeretur possit. Id enim ipse titulus ostendit, cum Noctes Atticas vocat. Optima ejus editio variorum est, quæ in Belgio prodit.

§. 3.

APULEJUS AFER, plane aliquid peregrini & monstrosi alit. Criticis quibusdam in pretio est, ut qui multas habeat voces singulares, & ex antiquo Latio superstites. Verum abundant illi suo sensu, non sapiunt nostro palato hæ deliciæ: quas non invidemus illis, qui frugibus repertis, glandibus vesci malunt. Res ipsa loquitur, & verba & juncturam verborum multum habere peregrinitatis; qua de re plenius in dissert. de *Patavinitate Liviana*. In illum
varii

extant commentarii, *Stewechii*, *Beroaldi*, *Calvii*. Non memini autem variorum aliquam esse editionem procuratam.

§. 4.

Historiæ Augustæ Scriptores, qui uno volumine collecti sunt, vitas Imperatorum sui temporis recensent. Dictio in illis è genio seculi sui formata, interdum cultior, interdum rudior. ad historiam illorum temporum omnino legendi: & occurrunt interdum aliqua, quæ non aliena sunt à civili dictione, & à civilis prudentiæ interiori doctrina. In præcipuos ex illis *Isaacus Casaubonus* commentarium scripsit, & post illum *Salmasius*, cujus extant doctissimæ annotationes, junctim cum Casaubonianis, editis Parisiis in folio, recusis Lugduni Batavorum anno 1671. in 8.

§. 5.

CLAUDIANUS ultra seculi sui genium in carmine disertus. Nonnullis tanti æstimatur, *Barlaeo* inprimis, ut ejus imitationem Virgilianæ proponant, qua in re tamen vehementer falluntur. Quanquam enim dictio ejus non sit inelegans, quanquam numerosissimus sit Poëta, ac sonorus: vehementer tamen à Virgiliana Poësi discrepat. Est enim in carminis ejus mensura quid puerile & subsultans, quod

D

im-

imperitorum quidem aures titillat, sed orationis decoro, quod in convenientia rerum & verborum consistit, parum convenit. Non potest enim perpetuus in carmine tenor usurpari: sed debet is varia poeticarum periodorum mensura distinguere, quod pulcherrime observat *Virgilius*: cujus alia periodus, alia pedum compositio est in narrationibus, descriptionibus, orationibus, cujus alia est pedum mensura, ratione scilicet missionis spondæorum & dactylorum, cæsurarum, quæ diligentissime notarunt veteres nonnulli Grammatici. Verum Claudianus unum semper observat orationis cursum. In Claudianum prolixum commentarium scripsit *G. Barthius*, ut ille semper diffusus est; multa sunt in illo digna indigna relatu. Breviorem scripsit commentarium *Nic. Heinsius* in 12. qui sæpe data occasione *Barthium* vellicat. Est & aliqua Varrorum Batava, & alia in usum Delphini edita. Ceterum Poëta hic Oratori Pænegyrico multum adjumenti feret in ornando stylo encomiastico; est enim argutus & sententiosus.

§. 6.

AUSONIUS, Poëta itidem est hujus seculi. In epigrammatibus plerumque infelix; in dictione Poëtica non adeo cultus,

DE LEGENDIS AUCTORIBUS. SI

tus, nisi cum Centonem Virgilianum scripsit, in quo mire fuit ingeniosus. Primus enim, quantum constat, hoc poematis genere se exercuit. In illum extant *Josephi Scaligeri lectiones*, quæ seorsim in duodecimo editæ sunt & una cum *Elie Vineti* notis in 4to, *Burdigalii* editæ, quæ omnium optima est editio: nisi forte & *Variorum* aliqua prodiit, quod nunc non memini.

§. 7.

PRUDENTIUS, Poëta Christianus, satis cultus & elegans, qui vel ob argumentum sacrum legimeretur, sed tamen post antiquiores illos. Intempestiva enim hæc pietas est illorum, qui, rejectis vetustis Poëtis, hunc in scholas introduci volunt. In illum commentarius elegans est *Nic. Heinsii*, & in quadam poematia extant seorsim *Weizii* & *Buchneri* notæ. Edidit una & cum ceteris Christianis Poëtis junctim *Georgius Fabricius*, notis in fine adjectis, quorum tamen plerique ad hanc classem non pertinent, & *Prudentio* multis modis sunt postponendi, neque aliis usibus, quam historiæ Ecclesiasticæ inserviunt, quæ & illis interdum illustratur.

§. 8.

CALPHURNIUS & NEMESIANUS

D 2

Eclo-

Eclogas scripserunt, sed alius plane fli, quam sunt Virgilianæ. *Nemesianus* tamen, Afer ceteros suos populares elegantia vincit, & Africanam illam indolem quodammodo exuit. Sed apparent tamen in illo non raro quædam transmarinæ delicia, quas *Janus Vlisus* commentario illustravit, atque una cum *Gratio* edidit.

§. 9.

PANEGYRICI ANTIQUI, QUI DUODECIM numero hoc seculo scripserunt. Sunt in illis interdum, quæ non spernas, sed referti sunt tumore multo, & mirabilibus blanditiis ac adulationibus, quæ huic seculo familiares. Si quis ex illo furo tantum sumserit, quantum honestè fieri potest & per judicii rationes fieri licet, in orationibus ad principes, his tanquam luminibus uti interdum potest. Editi sunt junctim in Gallia, cum notis cujusdam *Livinei* (in 12.) duobus tomis. *Buchnerus* Plinianis exemplis adjunxit, *Schefferus Drepanium* seorsim edidit cum notis.

§. 10.

APICIUS etiam hic non omittendus, pene inter principes hujus ætatis, si tempus spectes. Si quis in culina Latine loqui velit: hunc adeat; hunc enim obsoniorum & eduliorum Magistrum habebit,

&

& coquum non ineruditum : ut & Musæ hanc redolere culinam velint. Notas in illum scripsit aliquis *G. Humelbergius* in 4to Tiguri an. 1642. editas.

§. II.

ARNOBIUS, Christianus Scriptor, Afer, ceteris suæ gentis melior, non omnino spernendus est, quod ad dictionem attingit. Qui tamen in usum latinitatis non facile adhibendus est. ipsius enim tempore plane jam corrupta fuit latinitas, ut patet è commentario ejus in Psalmos, quem *Erasmus* edidit, plebejo sermone scriptum, in quo innumerabiles sunt solœcismi & barbarismi. Editus est cum commentariis variorum integris Lugduni Batavorum anno 1651. in 4to, qui rem Ecclesiasticam illorum temporum non parum illustrent.

§. 12.

MINUTIUS FELIX, ejusdem commatiss scriptor, prodiit cum commentariis Variorum, curante *Ouzelio*, qui suas quoque adjecit, plagiarius. Malè enim eo nomine audit.

LACTANTIUS quoad latinitatem purior est, cujus editio cum notis Variorum prodiit Lugduni, anno 1660. in 8vo.

§. 13.

AMMIANUS MARCELLINUS res gestas scripsit Imperatorum, *Juliani, Joviani, Valen-*

lentini & *Valentis*, stylo horrido & non imitando, nam nec verba & phrascs, nec junctura membrorum talis est, qualis esse debet in civili & ornata oratione. Confusa omnia & trajecta, ideoque ejus in stylo formando nullus usus est, sed ad historiam tamen commendari debet. In illum commentatus est *Lindenbrogius* & post illum *Henricus Vallesius*, cujus extant in illum notæ eruditissimæ. nuper utriusque notæ in Gallia recusæ in Fol.

§. 14.

JULIUS OBSEQUENS de prodigiis scripsit, quem *Schefferus* cum notis edidit. exiguus libellus & ad dictionem non magni pretii.

MARTIANUS CAPELLA Africanum aliquid sapit, illustratus à *Grotio* notis: anno ætatis 14. scripsit nuptias philologiæ & Mercurii.

§. 15.

SULPITIUS SEVERUS, scriptor ecclesiasticus, supra ætatem elegans, prodiit cum notis *Job. Vorstii* in 12. Ejus extat editio Variorum Amstelodami anno 1674. procurata.

§. 16.

TERTULLIANUS, hujus quoque seculi est, Africanus scriptor Christianus, cujus extant varii libri sacri argumenti; pro dictione

ctione formanda non sunt legendi, sed ad antiquitates ecclesiasticas multum ferunt adjumenti. Varii extant in illum commentarii, tam in libros omnes, quam in aliquos. Commentatus est in illum *Ludovicus de la Cerda*, *Georg. Ambianus*, qui plenissimus variis ad antiquitatem pertinentibus observationibus. In tractatum de *pallio* commentatus est *Salmasius*, & in aliquot ejus libellos *JCtus*, *Jacobus Gothofredus*.

§. 17.

CASSIODORUS multum e Gothica fœce habet. Est enim ejus dictio horrida & quodammodo peregrina, rebus tamen ad civilem prudentiam & moralem disciplinam pertinentibus referta. Ejus aliquot editiones sunt, inter quos vulgatiores illa quæ *Frankfurti* in 8vo edita est.

§. 18.

VEGETIUS de re militari scripsit, non tam ob stylum, quam ob argūmentum legendus. Scripsit & *Mulomedicinam*. Illius editio optima est, quæ cum *Notis* variorum in *Belgio* prodiit.

CENSORINUS de die natali librum scripsit, qui antiquarios juvare poterit. In stylo & dictione, si pauca exceperis, non adeo reprehendendus. *Lindenbrogii*

in illum notæ extant optimæ, quæ prodierunt Lugduni Batavorum in 8vo.

AURELIUS VICTOR, qui de viris illustribus scripsit, reliquis purior esse videtur, proditque cum notis variorum integris in Belgio. Anno 1670.

§. 19.

SYMMACHUS præ ceteris notus est, cujus extant epistolæ, quas aliqui nimium imitari solent. Est vero ejus dictio plane non pura, nisi quod in formulis interdum ingeniosus sit. Ex iis aliqua ad usum transferri possunt, sed ea moderatione, ne inficiatur nitor linguæ. Notas in illum scripsit *Franc. Juretus*. Extant & in illum *Casparis Scioppii* Vero similia, seorsim edita.

§. 20.

SIDONIUS APOLLINARIS scripsit partim epistolas, partim poëmata, è quibus hæc illis sunt meliora. Notandum enim est, sermonem ligatum remansisse puriorem, quam solutum. Cum enim in sermone ligato delectus vocum major haberi soleat: è sollicita illius rei cura stylus quoque purior est. Multa sunt in illo infecta seculi sui rubigine, sed ad usum tamen philologicum & antiquarium multum confert: & extant super illum notæ eruditissimæ *Savaronis* & *Syrmondi*, virorum doctissimorum. seorsim tamen sunt edi-

tæ

tæ in Gallia, quibus carere non potest, qui eorum temporum historiam accuratorem nosse cupit.

§. 21.

Superfunt aliqui minutiores scriptores, vel ad ferream ætatem, vel ad illam, quæ ferrea indignior est, plumbeam, aut saxeam referendi, quos hic persequi nostri non est instituti. Sunt inter illos Auctores *Finium regundorum*, à *Boetio* ante aliquot annos cum pulcherrimo commentario editi. Medici nonnulli veteres, *Cælius Aurelianus*, *Marcellus Empiricus*. referendi & huc sunt pleraque Ictorum fragmenta, quæ in Pandectis supersunt, quæ nitidorem præ omnibus hujus ætatis Latinitatem servant. cum enim forensis eorum dictio esset, & formulæ actionum usitatæ jam ab antiquis temporibus retinerentur: melius custodiverunt puram latinitatem quam ceteri: ut non male judicavit *Laurentius Valla*: *latinitatem è digestis posse restitui*, quanquam *Franciscus Sanctius* hoc ejus judicium improbare videatur.

D 5

CAP.

CAP. IV.

De recentioribus quibusdam Scriptoribus.

§. I.

Mera post priora tempora barbaries invaluit. Nam per Monachos omnis latinitas corrupta fuit, postquam illa semel à Gothis cladem insignem acceperat. Elucebant tamen nonnunquam quædam veterum seculorum stricturæ; ut in *Saxone Grammatico*, cujus dictio non usque adeo contemnenda est, & in mediis tenebris non exilem eloquentiæ lucem spargit. Resuscitarunt in Italia primo literas *Petrarcha*, magni certe Vir ingenii, & merito tunc temporis magni æstimatus, & pauci quidam ei similes, qui principatum tunc temporis in eloquentia tam latinâ, quam patriâ tenebant, postquam illi viam aperuerunt felicioribus auspiciis: nitidior paulatim latinitas crevit, cum postea capta Constantinopoli, Græci novum literis nascentibus lumen accenderent. Ex iis aliquos in scenam producemus, qui non quidem ante puros atque classicos Auctores legendi sed postquam stylus ex iis formatus est, non infeliciter cum illis

lis jungi possunt. Ceteris sane ex aenea & ferrea aetate præferri debent.

§. 2.

Inter illos omnino recenseri debet *Victorius*, cujus præter epistolas nihil extat, ad Ciceronis genium omnino formatas. Primus enim ille Ciceronis opera è sordibus & squalore produxit, ac nova luce illustravit.

§. 3.

JULIUS CÆSAR SCALIGER tum vivebat, vir magni ingenii ac concitatæ dictionis. neq; enim vel ad elegantiam sermonis vel ad vehementiam quicquam ei deest: cujus epistolæ & orationes omnibus eloquentiæ floribus sunt vestitæ.

Vivebat iisdem temporibus *Bunellus* in Gallia, *Manutii* Præceptor, cujus paucae epistolæ una cum *Manutianis* edi solent. Is Ciceronis elegantiam in omnibus sequitur. *Manutius* certe hunc suum Præceptorem veneratur: qui se cum *Politianis* & *Erasmis* errantem in viam reduxit. Illos enim ut affectatores aspernari videtur: qua in re tamen non omnino probandus est. sunt enim in *Erasmo* multæ Veneres, & mirifica in omnibus est stili suavitas, neque illi quicquam deest, nisi quod interdum non satis pura sit ejus dictio; & *Politianus* quoque aliud quam Cice-

Ciceronianum dicendi genus sectatus est, quale ad *Plinianum* propius accedere videtur. *Manutius* vero totus, quantus quantus erat, *Ciceroni* se dederat, non tamen modo illo jejuno & puerili, quo in imitatione *Ciceronis* utebantur *Longolius*, *Bembus* & *Sadoletus*, sed virili plane & laudabili. Epistolis ejus nihil est delicatius & venustius, & inprimis formulas *Ciceronianas* adeo exprimit, ut nullus in variandis eis sit ingeniosior: quicquid certe *Manutius* fuit, formularum beneficio obtinuit, non ut totas à *Cicerone* describeret, quod alii faciunt; sed ut vario sermonis habitu aliter aliterque efferret.

MURETUS inter recentiores omnes oratoris numeros absolvit, purus & elegans in dictione, ordinatus in periodis totiusque sermonis *συμμετρία*: exardescit figuris ubi opus est, & me quidem iudice, cum *Cicerone* legi potest sine aliquo infectionis periculo, cum versetur in argumentis magis obviis, & ad usum nostrum accommodatis. In epistolis concisior est *Manutio*, & vel *Plinianum* aliquod sapit, vel *Ciceronem* Atticissimum in epistolis ad *Atticum*. præterea pleræque ejus epistolæ sunt argumenti Critici & scholastici: in quibus non est eloquentiæ locus, sed res ipsa, uti est, exponitur.

AONIUS PALEARIVS, Italus, orationes & epistolas scripsit, quæ adeo *Ciceronianis* sunt

sunt similes, ut ceteros penè omnes in illa imitatione superaverit. Fata hujus viri fuere lugubria: qui quidem ab adversariis heterodoxæ religionis insimulatus, igne crematus est, innocentissimus.

JOANNES CASA Episcopus, pauca quidem scripsit, sub monumentorum latinorum titulo, Florentiæ in 4to & in 8vo edita, sed latinissima, & plane auream ætatem spirantia.

Per id tempus quoque in Germania cultiora prodire cœperunt ingenia; in quibus *Melanchton* nullo modo præteriti debet. Ubi enim Orator esse voluit, parum illi ad eloquentiæ omnis complementum defuit, nisi quod interdum non satis sit concitatus, & humi serpere videatur. Primus tamen in Germania eloquentiam resuscitavit, & Rhetoris officium etiam præ ipsis Italis implevit, quanquam illum, ut Oratores, superent.

JOACHIMUS CAMERARIUS, maximus sane Vir, & nulli Italorum postponendus, imo multis præferendus, purissimam sectatus est eloquentiam, quam in epistolis ejus & orationibus passim deprehendas.

PERPINIANUS orationes scripsit nitidas & elegantes, atque ex Hispana gente pretium suo tempore eloquentiæ conciliavit. Ejus epistolæ posthumæ aliquot
ante

ante annos publicatæ, & adjunctæ *Vavassoris* poematibus, quæ in Gallia prodierunt sub titulo isto : *Vavassoris poësis multiplex*. Reperiuntur etiam quædam de latina lingua & eloquentia præcepta per ipsum tradita, quæ una cum *Vavassoris* poematibus sunt edita.

Neque laude eloquentiæ privandus est *Majoragius*, cujus extant orationes nitidæ, & ad optimæ latinitatis genium formatæ. Reperiuntur etiam nonnulli alii tum Oratores, tum alterius generis scriptores apud varias gentes, quorum non est dissimulanda in Latina lingua existimatio. Tulerunt etiam nostra hæc tempora viros illa laude minime privandos, inter eos Wittebergæ fuit

AUGUSTUS BUCHNERUS, & ante illum in eadem cathedra Prof. *Adamus Theodorus Siberus*, qui in linguam latinam bene excolendam omne studium industriamque contulerunt. Vixit etiam Romæ *Janus Nicus Erythræus*, vel, ut vero nomine appellatur, *Jo. Victorius Rossius*, cujus extant elegantissimæ & orationes & epistolæ, ne quid de reliquis ingenii monumentis dicam. In Gallia *Dionysius Petavius*, & *Jo. Vavassor*, Jesuitæ doctissimi orationes cultissimas scripserunt. Fuere etiam inter Batavos *Heinsius* & *Boxhornius*, quorum extant orationes floridæ satis & elegantes,
ad

ad illam dictionis mensuram, qua Itali incedere solent, non conscriptæ. Nam nec periodus plena & oratoria in Heinſianis orationibus est, & in *Boxhornio* aliquid poëtici tumoris; etsi quod ad argumentum attinet, multa in illis sunt laudabilia, & quæ ad varia orationum argumenta usui esse possunt. Itatorum vero dictio plane est ad orationis justæ figuram & normam bene instituta.

§. 3.

In historico stylo etiam inter recentiores habemus laude sua minime privandos. *Sleidanus* in illis mediocre & satis latinum dicendi genus sectatur; *Thuanus* faciem styli ex omnibus auctoribus induit; invenies enim apud illum quæ *αὐτολεξεί* ἐ *Chytrao*, *Sleidano*, aliisque depromuntur. *Famianus Strada* non contemnendus in historia scriptor est: si pauca quædam non satis Latina exceperis. Nam *Scioppius*, qui *Famiani* infamiam singulari libro assertum ivit, ipse merito in multis infamia notandus est; neque enim omnia illa, quæ in isto libro notavit, ex Apollinis tripode pronunciata sunt. *Buchananus* inter omnes purissimus scriptor est, ut nasutissimus *Scioppius* nihil in illo præter hæresin culpandum invenerit,

§. 4.

Poëtas inter recentiores habemus vel cum ipsis antiquis componendos. adeo enim hoc & superiori seculo exulta fuit poëtica dictio à Germanis, Gallis, Italis, Belgis, Scotis, ut numero longe superare antiquos, præstantia etiam contendere quodammodo possimus: si justum aliquod poëma epicum, quale Virgiliana est *Æneis*, exceperis. Et si enim non desunt, qui ad ejus imitationem opus integrum poeticum confecerint: ejus tamen castigatum judicium & sublimem industriam non assequuntur. In ceteris omnibus nihil habent antiqui, in quibus paria recentiores facere non possint: et si illis, ut prototypo, antiquitatis gloria & imitatio debeatur.

In Heroico carmine quid est *Rapini* poematibus elegantius? cujus eclogæ & libri de cultura hortorum, dictionem Virgilianam adeo exprimunt, ut nec ovum ovo fit similis. Non de superioris seculi scriptoribus dicam: inter quos habentur tum Itali, tum Galli, tum Scoti, qui in Heroicis miram sequuntur relegantiam. eorum multa sunt exempla, in *Buchanani* & reliquorum poetarum Scotorum, in *Scavola Samartani* de *παιδοτοφία*, in *Sannazarii* ac multorum aliorum poematibus, quos singulos recensere nunc non possumus. No-
stro tempore inter Germanos Heroico-
rum

rum scriptores laudandus omnino est *Buchnerus*, cujus extant pauca quidem in isto genere, sed eximia. In elegiacis nihil est *Lotichio*, Germano, suavius: quem ipsum pene Ovidium interdum vincere dixerunt. Sunt *Danielis* & *Nicolai Heinforum* cultissima in illo genere, quamquam & in cæteris, carmina. Nam *Barlæus* inter Batavos quodammodo loquacior est, etsi in Elegia, & *Scazonte* mire suavis & jucundus; in heroico autem carmine non satis castigatus. *Rapinus*, cujus ante meminimus, quam cultas & ipse elegias scripsit! In gallica gente nunc habemus, qui ad invidiam in quovis carminis genere felices sunt, ad antiquitatis genium accurate formato. In quorum numero sunt *Commirius*, *Car. Rueus*, *Vavassor*, *Hallaus*, *Menagius*, *Sangenefius* & plures alii.

In Italis & Germanis nostro tempore habuimus Poëtas mirifice ingeniosos & difertos. Sunt VII illustrium virorum poemata in Belgio ab *Elzeviriis* edita, in quibus præ ceteris eminent *Ferdinandi Furstenbergii Episcopi Monasteriensis*, Herois doctissimi poemata, & inter illa admirabilis ille in Pontificis *Alexandri VII.* natalem phæleucus. nam de cæteris nunc nihil dicam, Italis præcipuè, qui satis & ipsi elegantes sunt. in Satyricis & Lyricis omnino elegantissimum est ingenium *Baldei* Jesuitæ Germani,

E

cujus

cujus vasta extant poematum volumina. Pene omiseram *Wallium*, *Becanum*, & *Sidronium Hofchium*, poetas Brabantos Jesuitas, quorum elegiacis carminibus & phaleucis & ceteris nihil fingi formarique suavius, & ad omnem elegantiarum & antiquitatis saporem dulcius ac venustius potest. *Grocius*, qui ubivis magnus est, etiam in omni carminum genere quascunque ideas felicissimè exprimit. Et nunc in Batavis *Petrus Francius*, Professor Amstelodamensis, & *Janus Brockhusius* poeseos gloriam, quantum memini, soli tuentur; quorum cultissima sunt tam in elegia, quam in Heroico & ceteris omnibus carmina.

§. 5.

Non desunt inter recentiores scriptores quoque affectatores nonnulli, quorum dictionem ut scopulos fugere debemus. In his primum locum tenet *Lipsius*, vir quidem doctus, & cujus dictio suas quasdam habet & nativas Veneres, verum non publici saporis. ne enim hic recoquam illam *Scioppii* cramben, qui multos in illo neoterissimos & barbarissimos notavit: sermo in illo non est civiliter *πεπλασμένος*: nulla periodica dictio; sine qua nulla plane est & inutilis eloquentia: quæ in epistolis quodammodo laudem aliquam ferat, in solida vero & civili oratione plane sit ridicula. Arcendi itaque adolescentuli sunt primo illo

lo tempore ab hujus auctoris lectione, ne pravam sermoni habitum induant. Alter in dictione latina affectator est *Barclajus*, in excessu peccans, ut *Lipsius* in defectu. Ut enim totum *Barclaji* argumentum, de quo scribit poëticum est, ita dictio tota est poetica, audacibus metaphoris, phrasibus nove confictis referta; etsi illustre plane in auctore hoc & argutum sit ingenium. debetur sane illis auctoribus laus sua & gloria; verum ad dictionem formandam in exemplum ponendi non sunt. Ubi autem dictio ad antiquitatis gustum semel excocta est: inservient ad elegantias, ad ornatum, & cultum Latinæ Linguæ, non tam ex linguâ ipsâ & è phrasibus, quam ex sententia depromendum.

CAP. VII.

De Distributione Auctorum, ratione characterum atque argumentorum.

§. I.

Vidimus quomodo auctores ratione ætatum distribuendi, unde dignoscitur latinitas, cujus illa monetæ sit, auræ an

aneæ. Debent & distinguī Auctores ratione characterum. Neque enim omnes semel simulque legi possunt; sed per gradus formanda est eloquentia, atque à simplici ad figuratam procedendum est, deinde & ratione argumentorum distinguī auctores debent. Neque enim omnia promiscuè argumenta ad eloquentiam formandam vel necessaria sunt vel idonea. Quorundam argumentorum scriptores vel ob solam nomenclaturam legendi.

§. 2.

In characteribus scriptorum simplices sunt Dialogistæ & Epistolici scriptores. In Dialogis præter *Terentium* è Latinis laudare non possumus, etsi alius præterea hujus character sit, comicus scilicet stilus, in quo tamen ille moderatior est: ut omnia *Terentiana* locum non in familiari solum, sed & in civili sermone inveniant, quem non habent *Plautina*. In epistolis *Cicero* regnat, è quibus simplices ad tyrocinia adhibendæ. Tertius character in ordine illo, qui ἀφελείαν quandam præ se fert, stylus est historicus: non quod ille ornari non possit & assurgere, (est enim ubi ad magnificentiam oratoriam pertingit) sed simplicior ille, quatenus in nuda narratione versatur, à nobis intelligitur: in quo verba civilis usus, neque nimium recondita, neque nimium usu

usu vulgi trita omne ferunt punctum. In his prima lineamenta ducat *Julius Caesar*, & *Cornelius Nepos* qui tamen illos simplicitatis terminos aliquantum egrediuntur.

§. 3.

Character amplus & sublimis tamdiu seponendus, quoad in stylo puro, simplici & plano, sed tamen grammaticè ornato (qui ornatus consistit in verborum amplificationibus, variationibus & synonymiis) fundamenta probe jecerimus, tum demum accedat ornatus, qui obtinetur tum membrorum dilatatione, tum à translatis ἐμφαζικωτέροις & à figuris Rhetoricis & omni circumductione periodica; ut ita sermo efformetur πεπλασμένος. Jam vero character ille non ad solam orationem alligatur, sed & dialogus & epistola & historia ornatum majorem admittit, sed sui tamen generis: cujus mensura tum ex argumento, tum ex ipsius characteris indole instituenda est. Ita dialogus uberioris ac copiosioris dictionis formari potest, quando in materia gravi, sublimi & civili versamur. ita invenias nonnunquam integras declamatiunculas in dialogis Ciceronianis, & eatenus aliquid ex oratione participat. Non enim brevibus & interruptis colloquiis res agitur: sed propositio aliqua per sua enthymemata confirmatur, quod oratorium est, ita ta-

men circumscriptum, ut figuris illis oratoriis vehementibus non exardeſcat. Similiter & in epiſtola tractari illuſtre argumentum poteſt. cui deducendo omnes rhetorum loculi ſunt excutiendi: quales multas apud Ciceronem invenias, in certo genere cauſæ verſantes, ubi ad probandam rem aliquam integer enthymematum apparatus proponitur. Exemplo poteſt eſſe illa, quam ad *Q. Fratrem* ſcripſit gratulatoria, de *Aſiæ* provincia oblata, & illa *Servii* ad *Ciceronem*, quem ob mortem *Tullie* conſolatur, & plurimæ aliæ. In hiſtoria, quæ ſimplicis narrationis limites excedit, apparatus oratorius omnino neceſſarius eſt: eſtque mira ſane in *Livio* ſublinitas, ſive in concionibus, ſive in deſcriptionibus locorum, perſonarum, rerum; ad menſuram tamen ſtyli hiſtorici adornata.

§. 4.

Oratorius itaque ſtylus meta eſt eloquentiæ omnis, qui ſummam illi coronidem imponit. omnia enim hic ſummo in gradu debent eſſe conſtituta. verba debent eſſe ſonora, electa, quantum fieri poteſt, polyſyllaba, aut brevია multa cumulata, & per commata quaſi conglobata: membra pro re nata & plura & magis dilatata, & periodi circumductiones: vocum inter ſe junctarum grandior quædam
meq.

mensura, characteres minores, quales *Hermogenes* descripsit, *varii*. jam enim dulcis debet esse oratio, jam aspera, jam brevis & intercisâ, jam longa & circumducta; jam celeritate quasi currit, jam lentore quodam tenditur, prout natura affectuum vel vehementiorum vel leniorum requirit. inprimis in contentioso dicendi genere illa varia est. Figuræ accedere debent ad sermonem variæ & multiplices. Figuratus enim sermo sequitur affectus. in his unicè triumphat inter latinos Cicero, cujus vestigia sequuntur quotquot sunt veterum & recentiorum. Quicquid enim tota valuit in hac arte Græcia, ille & in Græcorum academiis & continuis exercitiis & peregrinationibus per totam Asiam institutis, & exemplo ad optimos Græcorum auctores composito, totum exhaustit.

§. 5.

Character mediocris, qui medio modo se habet, inter oratoriam sublimitatem & humilem dictionem, consistit vel in Historia vel in alio quocunque gravi dicendi genere, quod regnat in subselliis consultantium, vel quo uti solemus in dissertationibus philosophicis scribendis. In his etiam Cicero pro exemplo intervenire poterit, quando scilicet philosophi-

ca, aut rhetorica tractat. gravis enim tum sermone est & ad διδαξιν compositus vitat copiosum dicendi genus, minusque figuratum est & sublime: sententiis interdum magis enitet. In orationibus deliberativis brevioribus huic characteri locus est, ut qui non tam verbis diffluit, quam rerum copia & sententiarum abundat. Eorum quasi ideam invenimus in concionibus illis, quæ apud historicos reperiuntur. *Curtius* in historia hujus characteris exemplum proponere videtur. Est enim stylus ejus mediocriter verbis ornatus & sententiis gravis. *Tacitus* quoque hic præluere poterit: si nimia illa brevitatis in verbis & membris & frequentatio sententiarum immoderata evitentur. In orationibus illis alioquin exempla congesta habemus à variis auctoribus, qui ex historicis græcis & latinis orationes has in unum corpus collegerunt, magno ad omnem civilem eloquentiam usui futuras. Etiam *Seneca* in his auctoribus commendari debet. cornu enim copiarum sententiarum est. sed illæ non ita constipandæ, & aptiore verborum vinculo coercendæ sunt: ut non de industria cumulata, sed è re ipsa nata esse videantur.

§. 6.

Character floridus, qui ad poetissimum proxime accedit, aliam habet indolem, cujus

cujus usus est in satyris sermone soluto scriptis, ac simili genere. In hoc aliquid comicæ dictionis repræsentatur, qualis in *Plauto* occurrit, qui ad has Veneres præcipue commendari debet. Nam dictio comica salibus, facetiis constat, ex ingenio personarum formata, & poëtismi aliquid secum vehit. Huic jungas in illo genere *Petronium*, cujus scribendi ratio florida & elegans est, ac poematibus nonnunquam intermixta. *Apulejus* e veteribus, qui ad hunc characterem pertinent, etiam est, verum ob incultam dictionem plane fugiendus. *Lepidus* tamen est in rebus fingendis, unde nonnunquam aliquid in tuos usus capere possis. E recentioribus *Barclajus* est, elegans in hoc genere scriptor, ubi latinitas ejus non infecta est. Nitidior est *Janus Nicius* in Eudemia sua, qui in hoc scribendi genere pulcherrimam dicendi rationem sectatus est.

§. 7.

Possunt & secundum argumenta dispesci Auctores. Si quis enim omnem philosophiam e Latinis scriptoribus discere velit, fontes etiam hic habebit, unde cum rerum argumentis simul stylum exerceat. In Grammaticis *Varronem* & *Festum* habemus, ne quid de ceteris dicam, quos uno volumine collegit *Dionysius Gothofredus* & *Elias Putschius*.

schius. In logicis habemus *Cicéronis Topica*, ex quibus magna accedit utilitas iis, qui ad usum rhetoricum hæc præcepta conferrent. Hujus enim gratia hos libros scripsit. In ætate ferrea extat *Boetius*, qui interpretres *Aristotelicus* latinus varia hujus argumenti scripsit, sed stylo paululum incultiori, etsi in libro de consolatione philosophiæ, qui prosa & ligata oratione alternatim scriptus & *Fitzmanni* Commentario illustratus, cultior & floridior videtur. In Rhetoricis præceptis, annon ipsum eloquentiæ Magistrum Ciceronem habemus variis in libris? Et *Quintilianum*, qui ipso *Cicerone* plenius hanc doctrinam tractavit? In quo etiam ratione styli nihil desideres. Non male enim, qui proxime post *Ciceronem* locandum esse existimant. Ejus quoque declamationes & suasoriæ ad gravem illam & politicam eloquentiam, de qua supra diximus, commendandæ.

§. 8.

Porro nulla pars philosophiæ est, quam non excoluere Latini: Metaphysica *Boetius* in scriptis suis aliqua proposuit: Historiam naturalem plenissimam pertexuit *Plinius*. Physicam Epicuream carmine expressit *Lucretius*. Mathematicam omnem in libris suis pene proposuit *Vitruvius*. Astronomiam *Manilius*, Musicam *Boetius*, Philosophiam mora-

moralem Stoicam perpetuis dissertationibus illustravit *Seneca*. Partes Philosophiæ moralis alii, ut *Cicero* doctrinam de officiis, de finibus bonorum & malorum & varia argumenta in Tusculanis quæstionibus. Civilem philosophiam idem *Cicero* libris de Republica illustraverat, qui nunc injuria temporum perierunt. Historia omnis non Romana solum sed & aliarum gentium latinis auctoribus scripta est, unde depromi possunt, quæ ad usus nostros erunt.

§. 9.

Lectio horum auctorum non debet esse tumultuaria, sed recte adornata. Præmittendi enim illi sunt, e quibus simplicem styllum formamus, purum tamen & ad genus Romanæ latinitatis. Itaque *Phædrus*, *Terentius*, *Ciceronis* epistolæ breviores, *Cornelius Nepos* inter primos esse debent. His succedant deinde epistolæ prolixiores ad familiares, & quæ in certo genere versantur. Orationes *Ciceronis* primum illæ quæ in demonstrativo & deliberativo genere versantur. Non sunt enim operosis adeo negotiorum circumstantiis implicatæ, ut orationes judiciales. In his sunt oratio pro *Archia*, pro lege *Manilia*, Oratio post reditum in *Senatu*, & ad *Quirites* habita & similes. Sunt enim facilioris imitationis, & argu-
mentis

mentis ac enthymematibus utuntur generalioribus, quæ cuivis in promptu sunt. Subjungantur postea orationes generis iudicialis & contentiosi, in quibus *Cicero* omnem suam eloquentiam exhaustit. Plenæ enim sunt figuris vehementibus; enthymemata pathetica, iisque subordinata verba & figuræ utramque implent paginam, unde demum fulminea illa eloquentiæ vis, quæ animos percellit, homines in invidiam adducit, facta exaggerat, misericordiam movet, quasi in theatro quodam proponitur. Et hæc ultima quasi meta est dictionis latinæ. Qua in palæstra ubi probe exercitatus fueris, ut jam modum in oratione & rebus ipsis tenere possis, & totum sermonem ad habitum prisce & genuini Latii composueris (quod ut facias quotidiana tibi erit industria adhibenda) tum demum evagari per omnes auctorum campos potes, & ex iis vel sententiosa vel ornamenta, imo & formulas congerere, ita tamen ut veteri illo orationis flore convestias. Tum legere aliquid poteris vel e *Plinio* vel e *Tacito*, vel e *Seneca*, imo & sequioris ætatis auctoribus, & facillimum tibi tum erit, characterum diversitates dignoscere, imo & si velis, imitari. Rectum enim mensura curvi est, & qui simplicem normam & mensuram Romanæ latinitatis sequutus est, statim iudicabit, ubi illa à via hac deflectat, &

& quibus in rebus illa diversitas consistat. Nam verborum vel multiplicatio vel junctura vel membrorum inter se proportio, totam tibi rem statim ob oculos ponit.

§. IO.

Quod in soluto sermone, idem in ligato procedit. Præmittendi hic sunt in lectione aureæ ætatis scriptores. In Heroico carmine *Virgilius* secundum Heroici carminis gradus. Simpliciores enim *Eclogæ* sunt, & primo loco legendæ, hinc *Georgica*, inde *Æneis*. Notanda est versuum mensura secundum pedes & periodos, earumque varia diversitas, translata poetica, quibus differt ab oratione soluta poësis, syntaxis peculiaris & similia, ut iis paulatim quoque adfuescamus & mature hanc differentiam dictionis & styli percipiamus. In elegia *Tibullus*, *Propertius*, *Ovidius* regnant. ex iis mensura elegiaci carminis & elegantiae peculiare addiscendæ. In epigrammatibus *Catullus* venustatem, *Martialis* acumen supeditabit. In Lyricis & Satyricis *Horatius* exprimendus. Eorum carminum mensura vehementer discrepat; translata & phrasæ sunt audaciores: quæ diligenter notandæ sunt: & ita quidem notari possunt, ut ad eorum imitationem nos ipsi interdum fingere nonnulla possimus: modo adversus linguæ

linguæ latinæ usum ne peccemus. Ea vero translata præcipue Satyrica, cum non tam ex usu latinæ linguæ, quam ex conceptu & phantasia dependeant: ingenio aliquid licet. ideoque ex argutiarum fontibus etiam illa translata maximam partem dependent: ut quilibet perspiciet, qui Satyram aliquam *Horatii* vel *Juvenalis* fugitivo oculo percurrat. Ubi ex illis genuinæ & spectatæ latinitatis scriptoribus formata poësis est: tum demum impune licebit per ceteros omnes vagari vel veteres vel recentiores: e quibus multi sunt, qui Poëtis sequioris ætatis antiquis sunt præponendi. Dictio ex antiquis aureæ ætatis est formanda: translata & ornamenta quæcunque poëtica, comparationes, descriptiones, figuræ, etiam e recentioribus comportari possunt: minus enim in his, ut jam supra dixi, infectionis periculum est.

PARS

PARS SECUNDA.
DE
EXCERPENDIS
AUCTORIBUS,

five

De Excerptis glossemat-
tis, Nominum, Verbo-
rum, Phrasium, Vo-
cularum.

§. I.

Cum in priori parte silvam quasi in-
dicaverimus: nunc hac parte usum
in digerendis materialibus ostendemus.
Nam cum tantum sciamus, quantum me-
moriam tenemus; memoria autem nostra
adminiculis quibusdam adjuvari debet;
(facile enim multitudo rerum obruitur)
prudens consilium instituendum est de
colligendis rerum lectarum thesauris, velut
in promptuaria & horrea quædam, unde
depromi possunt, quæ ad usus nostros fa-
ciunt. Atque hæc est velut mnemonica
quædam

quædam ars, qua locos quosdam certo ordine distributos, ita nobis accommodamus, ut facili negotio invenire possimus, quibus indigemus.

§. 2.

Est vero duplex cognitio, verborum & rerum. Res iterum dispesci possunt in scientias & facta: quorum hæc ad historica pertinent, quæ à scientiis separanda sunt. De his postea agemus, prout nos manu ducunt latini auctores. nam ultra illos non ibimus.

§. 3.

Primum igitur solliciti esse debemus de excerptis quæ ad orationem spectant. In oratione autem consideranda sunt tum materialia tum formalia. Materialia remota sunt vel proxima. remota sunt verba: proxima sunt loci Enthymematum, unde inveniuntur argumenta ad probandam propositionem vel sententiam. Formalia pertinent vel ad juncturam & variationem verborum, ac dici possunt Grammatica: vel ad positum & numerum verborum; ac dici possunt vel Harmonica vel Periodica, qualia in membris & periodis spectari debent: vel pertinent ad totum systema orationis.

Suntque

Iatque 1. Amplificatoria sententiarum particularium. 2. Methodica totius orationis, quibus colliguntur omnes illæ formulæ, quæ ad orationis partes maiores atque minores connectendas pertinent. 3. Enthymematica, quæ ad Enthymematum investigationem spectant; sive illa sint doctentia sine moventia & conciliantia. 4. Figurata: sub quibus comprehenduntur figuræ variæ. de singulis in sequentibus agemus.

§. 4.

Prima cura verborum erit, quæ ex Lexicographis petenda sunt. Quoniam vero in latina lingua non ita sunt omnia exculpta, ut uni lexico confidere possimus, jam à prima usque ætate observationes institui debent singulare latinæ linguæ, quæ apud Lexicographos non inveniuntur. Cum itaque sermo secundum Aristotelem vel sit *πεφυκώς* vel *πεπλασμένος*, vel natus scilicet vel formatus: nativæ & propriæ vocum significationes primo tenendæ. In illis addiscendis cum lexica, ut dixi, non sufficiant: ex usu, lectione, & collatione auctorum diligenti primum colligenda sunt talia excerpta, in quibus notentur 1.) vocum propriæ acceptiones. 2.) Variæ significationes. 3.) Translationes

nes, quas posteriores, si quis velit, ab his sejungere : & ad synonymorum excerpta referre potest. In his excerptis vero liberum unicuique esse potest pro fine & scopo suo, si quis ea quæ ad latinitatem qua talem, spectant, ab iis quæ mere critica & philologica videntur separare velit. Nam ad eloquentiam utilis est, si illa quæ puræ latinitati inserviunt, seorsim habeantur, ne laborem inquirentis gravent. Philologica vero & critica excerpta, quæ proprie glossemata vocare videtur *Quintilianus*, multa habent, *observatorum peregrinorum*, etiam de corruptis vocibus, barbarismis, etymologiis, observationibus ex aliis linguis, quæ si cum illis junguntur : mire omnia confundunt. Fundus horum excerptorum est, (1) in optimis classicisque auctoribus; quidquid ipsi observavimus, alique viri docti, illuc pertinet. Modus autem observandi præscribitur quam optimè à *Schoero* in præfatione phrasium Ciceronianarum. (2) Huc pertinent Commentarii criticorum, e quibus eligendi sunt, qui ad aureæ vel argenteæ ætatis scriptores notas scripserunt, & ad genuinum vocum usum præ cæteris respiciunt. Quidquid enim illi jam tum observarunt, velut in lucro deputandum est. Itaque illa tantum notentur quam brevissimè ac velut per indicem & remissive, si ipsos auctores habeamus.

Tales

Tales sunt ex Græcis singulares illæ locutiones, quas in Cicerone aliisque classicis auctoribus viri docti observarunt. Addi quoque ad hæc excerpta possunt singularia constructionum, parallelismi cum Græca vel Germanica lingua, quorum lineamenta duxerunt *Vechnerus*, *Henricus Stephanus*, *Vossius*. Adjici etiam possunt barbarissimi extantiores, in quibus colligendis post *Vossium*, *Borrichium*, *Titium*, operosus fuit *Christoph. Cellarius*, cujus *Antibarbarus* & cura posteriores secundum alphabeti & ætatum seriem hæc ab oculis ponunt; quibus adjici potest si quid novi occurrat. Neque enim acta agere, aut aliorum crambem recoquere necesse est: ne nobis inutiliter operas & labores augeamus. Observata singularium vocum & phrasium, si ipsi peculiares libros huic negotio destinare nolimus, poni possunt ad Lexici aliqujus marginem, aut ad grammatici perfecti operis, quale *Vossianum* est: ita & aliorum & nostra observata juncta habebimus. De Lexicis latinis alibi plenius dixi. Non est melius hætenus & locupletius, quam *Forum Romanum Roberti Stephani*, & quod ex illo congestum *Lexicon Basileense*. *Buchnerus* non pauca observata adjecit suo *Fabro*, verum in phraseologia omnino deficit. In verbis & vocabulis accurate colligendis non inutilem operam præstitit *Kamigius in*

Gazophylacio suo, in quo multa inveniunt vocabula, quæ in aliis Lexicographis frustra quæ siveris. Si ad solum Ciceronem resperzeris: *Schori Thesaurus* & phrases, tum & *Bartholomai Riccii apparatus latine lingue* multum prodesse possunt.

Exempla excerptorum glossematicorum.

Talia colligi possunt per seriem Alphabeti cujus pauca exempla velut in gustum nos daturi sumus.

Aretalogi) qui propriè sint videantur *Scaliger*: lection. *Ausonian.* l. 2. c. 5. *Germanice* reddas *Großsprecher.*

Amare & diligere) secundum gradus differunt. Cic. l. 9. Ep. 14. ad famil. *Tantum accessit, ut mihi nunc demum amare videar, ante dilexisse.*

Amor & caritas) quomodo differant, exprimit Cicero de Orat. column. 229. lit. D. *Sentimus amorem conciliari, si id velle videre, quod sit utile ipsis, apud quos agas, defendere; si aut pro bonis viris, aut certe pro iis, qui illis boni atque utiles sunt laborare. Namque hac res amorem magis conciliat, illa virtutis defensio caritatem.*

Ain tu) Formula est, quam dicere consuevimus de re aliqua interrogantes, quæ
ab

ab alio dicta, admiratione nos afficit. Cic. ep. 21. lib. 10. *Aintandem? insanire tibi videris, quod imitere verborum meorum fulmina?* & lib. 6. ep. 1. ad famil. *Ain tu? Scipio hic Metellus proavum suum nescit censorem non fuisse.*

Apparere) præsto alicui esse in officiis. Cic. l. 4. fam. ep. 8. in fine. *In quo scripto ille existimat, quod facile appareat; quod me colat & observet.*

Vere beatus) pro divite, pro magnifico, immo & pro mortuo apud antiquos auctores accipitur.

Cupido & amor) differunt. Cupido inconsiderata est necessitatis, amor judicii, Plaut. in Bacch.

Cupido te conficit, anne amor?

Commodus homo) cujus graphica descriptio apud Plautum est in Mil. A&. III. sc. 1. *Ein bequemer und diensthafter Mensch: Un homme conplaisant.*

Collatinus venter) i.e. magnus & turgidus, quia in eum omnia edulia conferuntur.

Carmen) pro verbis & effatis solemnibus; ita apud Livium Lex horrendi carminis.

Circumvenire) pro munire. Cæsar lib. 2. de bell. civ.

Curio vallo Uticam circumvenire instituit.

Canalicola) homines forenses pauperes, qui circa fori canalem consisterent. Vid. Lips. in electis cap. II. l. III. inde fortè *Canaille.*

Devotus & defixus) qui per maleficium impotens factus est, apud historiae augustae scriptores.

Domi doctus) quod Græci dicunt *αὐτοδίδακτος*. *Plantus* multis in locis.

Emimius) pro exemptus. *Terentius* in *Heav. Act. I. sc. 1. v. 9.* Ut eximium neminem habeam.

Evoçati milites) sunt emeriti qui deinde iterum à ducibus vocabantur, ob rei militaris scientiam. Multa sunt apud *Ciceronem* & *Cæsarem* loca.

Extollere) pro differre. *Plaut.* Res serias omnes extollere ex hoc die in alium diem.

Facile) pro vere vel sine controversia: ut facile primus. *Cicero* in *Ep. ad Quint. Frat.* Quo in fundo facile multa millia hominum versabuntur.

Frigus) pro odio vel tenui gratia. *Terentius.* Nimirum hic homines frigent, id est, non placent non valent gratia.

Homo factiosus) i. e. dives, nobilis, potens.

Factiosi lingua) largiloqui & dites ad promittendum vide *Muretum* var. lect. lib. X. cap. III.

Gliscere) i. e. augescere. *Plant.* Pulchre gliscit praelium, gliscit rabies.

Grandis) vox peculiaribus de frugibus & oleribus dicitur. Hinc *grandes fruges, grandia poma.*

Homi-

Homines) vocabantur qui pertinent ad domum alicujus Vid. Scalig. Lect. Aufon. l. i. Cap. 28. ita servi antiquis vocabantur. Cic. *Homines nostros vocat cives.*

Honos) significat (1) præmia, ut apud Cic. *honos Medico est habitus.* l. XVI. Ter. Eunu-
nuch. *Hic pro illo munere tibi honos est habitus.* Atque in hoc sensu semper honos non honor dicitur. (2) Significat Magistratum seu dignitatem, ut plurimum in numero plurali. (3) Significationem honoris extremam seu observantiam, quæ gloriam, potentiam, & divitias comitari solet.

Insanire) id est, magnificos sumptus in rem aliquam impendere citra necessitatem. Cic. *in Tusculano meo capi insanire.* Hoc sensu iuterpretandum est illud Plinii, *optimum est aliena insania frui*, id est, sumptuosa ædificia ab aliis magno labore extructa vili pretio inhabitare. Vid. Taubm. ad Plaut. mil. glor. act. 3. sc. 1. v. 159.

Infelicia ligna) dicuntur, quibus aliquis se suspendit. Ita Catullus vocat infelicia ligna, quæ essent ustura annales Volusi.

Ineptus) elegans apud latinos vox est, quam tota Græcia non exprimit, de qua voce integram orationem habuit Julius Cæsar Scaliger.

Latrare) pro poscere, usurpatur apud Lucretium: *Nihil aliud sibi naturam latrare.*

Leno) pro *Legato Justinus* : Præmissis lenonibus , qui hostibus legem indicerent. Mirum sane vocem lenonis flagitiosam in re honesta usurpari. vocem conciliator & conciliatrix per se honestas ad turpe Veneris ministerium applicari.

Lucrari peccata , Lucri facere injuriam) Cicerone et alii usurpant pro peccatum vel injuriam impune committere.

Malotuo) verus formula. Es stehe auf deine Verantwortung, auf deinen Kopff.

Manu omnia regere) id est , per vim.

Matrimonium) interdum significat bona materna , ut patrimonium bona paterna. Valerius Maximus, l. 7. c. 8.

Migrare) pro mutare usurpatur, ut migrare leges, jura.

Notarii) qui propriè dicebantur , vide Scaligerum notis ad epigr. 137. Ausonii, & Meibomium in Macenate.

Nox) pro concubitu usurpatur , ut noctem aliquam orare , polliceri noctem, spem noctis emere, testamenta mereri noctibus, apud Juvenalem; locare noctes, negare noctes , dare.

Nego me fecisse, latinè dicitur , non item: dico me non fecisse.

Orare) pro eo quod vulgo promovere dicitur.

Obnoxii) dicuntur 1) qui ob culpam alicui dantur & in ejus potentiam se tradunt.

2)

2) qui ob aliquod beneficium se alicui devinciunt.

Omnino) usurpatur pro illo, quod dicere solemus: in summa.

Officium) hæc vox varias acceptiones habet (1) pro curis funebribus & nuptialibus. (2) pro cura balneatoria; hinc *officiosus* dicitur qui vestimenta servat in balneis, ipsa lavatio *officium*, *ab officio* vero post lavationem. (3) Pro officiis vel aliis artibus & studiis, *Handthierung*, ut servorum officia fungere. (4) Pro beneficio, ut apud *Ca-tullum* lib. 4. dist. 43. ubi *officiperda* dicitur, in quem beneficia ingesta tanquam in do-lium rimosum effluunt. (5) Pro munere & functione. hinc vox illa pro persona ipsa sæpe usurpatur. (6) Pro eo quod fieri debet, ut Cicero de offic. scribit. Galli: *devoir*. (7) In re venerea, vid. *Erhardum* in *Petro-nium* p. 698.

Protelare) est abigere & longe propelle-re, vid. Comment. ad *Terentii Phormionem* Act. I. sc. 4.

Præcipere) *Borwegnehmen*, præcipere a-nimo, id est, conjectando assequi.

Pedes) vocantur servi apud *Martialem* Epigr. in *Zoil.* l. 3.

Reſte) formulam hanc usurpabant vete-res cum negare vellent, negationis tamen particulam exprimere nollent. *Ter. He-cyræ.* Act. 3. sc. 2. *Quid est tam tristis?*

Paneph. *Recte mater*. Ubi *Donatus*: sic loquimur, cum sine injuria interrogantis aliquid reticemus: eodem modo usurpatur *Bene*.

Revenire domum) id est, redire domum. *Plautus Amphit.* & *Cicero II. de orat.* cum miles domum revenisset.

Raptare pro moechno, proscelso, id est, conviciari. Usurpatur etiam absolute apud *Plautum*: quid me afflictas? quid me raptas?

Spurca vina) dicuntur quæ aqua sunt mixta. *Festus*:

Spurcare vinum) i. e. aqua infusa vitiare.

Studere) pro properea usurpatur passim apud bonos auctores: ita *Cæsar de Bello Civil.* l. I. c. 4. Rem ad arma deduci studebant. Frequens hæc locutio est apud *Cornelium Nepotem*.

Stata forma) nec nimis pulchra, nec nimis deformis, vid. *Gellium*, l. 5. c. 11.

Tempus) pro circumstantia omni ponitur sæpe. Ita *Cicero*: Quibus in omnibus quid tempora petant, aut quid personis dignum sit considerandum est; Et in officiis: Ea cum tempore commutantur.

Tanti est) Esist der Mühe wohl werth, sæpissime legitur apud *Ciceronem*.

Vara vibiam sequitur. de hujus proverbii sensu vide *Scaligeri* lectiones *Ausonianas* lib. I. cap. 18. Addatur *Lex, Fabro-Buchner*. in *Vibia*.

Vivum

Vivum Capital. Cicero pro Flacco Das de lucro, nihil detrabit de vivo; & in Verrem actione V. Erat aliquid de vivo refecandum. metaphorica est desumpta à sectione unguis, in quibus illud quod prominet siccum, quod carni junctum est vivum dicitur: vel etiam de arboribus.

Venilia, salacia, biduna, malina,) Priora vocabula significant accessum & recessum maris, Fluth und Ebbe. Atque hæc antiqua nomina sunt, quæ postea à Romanis in Germaniam verientibus mutata sunt in *malinam* & *bidunam*. Vid. Joseph. Scaliger, in appendice ad conjectanea in *Verronem*.

Vecordia) est animus pravus, malignus & inhumanus. Id enim propriè notat. Notat etiam quamvis amentiam.

Atque hoc quasi specimen est excerptorum Glossematicorum, & tenue quasi radimentum, verum longe plura sunt, quæ sub observationes cadunt, quam simplices illæ significationes vel propriæ vel translatae. Potest enim non vocum tantum, sed & particularum usus multis modis considerari, prout vel absolute ponitur vel subiecto jungitur: vel denique ad circumstantiam loci & temporis respicit; vel si ad totam enunciationem pertinet ut prædicatum, si affirmativo, si negativo sensu usurpatur. In his credi non potest, quid continua observatione notari possit, vel illa

illa melius ipso usu addiscentur, quam exemplorum multitudine.

Nos jam procedimus ad excerpta illa, quæ ad sermonem *πεπλασμενον* pertinent.

Variatio itaque vocum primus ad copiam gradus est, & ad hanc variationem obtinendam collectanea instituti possunt, quibus illa sermonis copia parari potest. Prima enim est verborum, hinc sensuum *ισοδυναμία*: & illa quidem hanc præcedit. Instituendus itaque est apparatus Synonymicus tum nominum, tum verborum & phrasium, tum particularum.

Synonymica nominum, seu verborum simplicium, primum dicentur in ipsis nomenclaturis, ac continebuntur sub illo titulo: non illa tamen tantum, quæ Synonyma sunt, sed etiam quæcunque cognata & affinia. Namque in varianda & amplificanda oratione magnus eorum usus est, proderitque si jam inde a pueris illa Synonyma simul posita habeamus, imo ediscamus: & succurrent illa memoriæ, quando in argumento simili versamur. Eo consilio *Joannes Benzius Nomenclatorem latinum* omniaque vocabula & verba in 76. locos divisit atque in singulis locis primo synonyma posuit, deinde cognata & affinia, adjuncta, actiones: ut itaque, si omnia simul oculis subjiciantur, promptior singulorum usus in oratione ipsa sit. Vocabulario

Iario enim simplici subiecit illud compendium puræ latinæ, ut vocat, alterum, in qua phraseologica omnia secundum hos locos disposuit: quod & in græca lingua fecit majori in forma libro Basileæ edito. Et hos quidem locos si quis a prima pueritia animo bene comprehenderit, quoniam illi semel in memoria hærent, successu temporis hos quasi perpetuos locos communes circumferet, & ubi ad argumentum tale aliquod de venerit, statim ipsi omnia hæc succurrent.

Habemus alioquin singulares libros, quibus colliguntur synonyma, id est, tales voces & phrasæ, quæ unum idemque significantes conjungi solent in oratione ad explendum numerum cujus specimen exhibuit *Stephanus Ubelius* in *Synonymis* Ciceronianis, habemus qui collegerint singularibus libris epitheta tam adjectiva, tum adverbialia, ut fecit in *Epithetis* Ciceronis, *Nunnesius* & *Hubertus*, *Susannaus* in *connubio adverbiorum Ciceronianorum*: denique & antitheta, quæ simul jungi solent in oratione, à *Gambarella* collecta sunt, quæ singularem in his excerpti rationem monstrant, & possunt illa vel singulis libris congeri vel junctim coacervari, ut fecit *Bentzius*; quamquam ille non posuit, ut ad jungendam orationem ordinantur, sed separatim, vel deni-

denique ad margines horum auctorum, qui de singulis separatim egerunt, adjici. Phraselogicæ collectiones multæ sunt a variis institutæ sub titulis universalibus & generalibus. Verum omnibus præferri debet *Schönsleder* in suo eloquentiæ apparatu. nam *Pareus*, qui *Calligraphiam* scripsit, eodem consilio & instituto, confusus valde & perturbatus est. Hunc itaque *Schönslederum* familiarem nobis reddamus, & ad ejus methodum colligamus, quæ illic non continentur, quod fiet vel libro separato, vel charta inscripta; longe enim plura inveniuntur apud Auctores quæ huc spectant. Præ cæteris vero ad translata nobis respiciendum est. illa extollunt orationem vehementer, ac enim si separato libro illa colligere nolimus, alio colore distinguere possumus.

Denique & *variatio particularum colligenda est*: ut sciamus quomodo particulis in connectenda periodo uti possimus, ita ut non eadem recurrant semper. In his utilissimam operam præstitit *Elias Major*, cujus extat liber postumus de *varianda oratione*, in quibus non particularum tantum sed & omnium orationis partium variationes ex optimis auctorebus per exempla collecta sunt: ad cujus exemplum nos etiam e bonis auctorebus colligemus vel ad marginem libri adscribemus.

Vi-

Vidimus de excerptis & collectaneis circa variationem Nominum, verborum, phrasium & particularum. sequuntur jam integræ sententiæ, quæ constant subiecto & prædicato. earum quoque variationes multæ sunt. Nam vel synonymice vel dialecticè ex locis scilicet circumstantiarum vel figuratè variantur. In quibus omnibus discrimen nunc non faciemus. Singulæ enim ad sermonem *πεπλασμένον* & orationem justam pertinent; & solent tales variationes plerumque periodo absolvi: nisi fortassis sententiæ illæ non sint natura periodicæ. Collectanea harum sententiarum amplificantium maximum in oratione usum præstant, cum ad enthy-memata argumentaque, tam moventia quam conciliantia adhibentur. Nemo hæctenus fuit, qui operam his impenderit: nisi quod *Nicasius Baxius* Jesuita tales sententias amplificantes exiguo libello è *Cicerone* collegerit: quibus infinita alia addi possunt. Si quis ordinem in illis sequi velit; neque fortuita hæc collectanea, prout ex auctoribus se offerunt: is locos illos *Benzii*, quos in simplicibus nomenclaturis & phraseologia usurpavit, sequi poterit.

§. II.

Aliæ sunt sententiarum variationes, quas
argu-

argutas dicere possumus, quæ singulari libello à prioribus separandæ sunt : quando nimirum sententia aliqua , per elegans aliquod Simile, Adagium aut adagiale effatum variari solet. Solent quidem sub certis titulis simplicibus adagia colligi , ut collecta habemus Erasimiana, quæ & *Langius*, separato libello ad locos Sturmiianos vel *Benzianos* redegit. Verum tituli illi non sufficiunt. Solent enim in adagio aliquo & subjectum & prædicatum involvi ; adeoque integra sententia exhiberi, quæ sub generalissimo titulo subjecta diffuse nimis quæritur , nisi velimus unum idemque adagium sub duplicem , imo interdum sub triplicem titulum referre. Nam vel ad subjectum enunciationis vel ad prædicatum referendum est , vel ad tertium aliquem conceptum , qui è connexionе subjecti & prædicati oritur. Ne itaque in vasta sylva quærere necessum sit , quod ad scopum nostrum facit : præstat titulos vel lemmata sententiosa formare , quæ integram sententiam exhibeant ; vel subjectum potest per additionem alicujus adjectivi ad certum aliquem & plenum sensum restringi. Ad hæc itaque collectanea referenda sunt (1) omnia adagia è Veteribus auctoribus. (2) omnia adagialia, & παροιμιῶν ex omnibus auctoribus cujuscunque ætatis aut linguæ, præcipue tamen græcæ &

& latinæ; quanquam & ceteræ linguæ maximam subministrant talium copiam: quæ sine ullo ordine collegerunt varii auctores. *Gruterus* in *Florilegio suo Ethico-Politico*, in 4to. qui ex omnibus linguis adagiorum corpus collegit. (3) Omnia Hemistichia vel versus Græci & Latini, qui argutiorem sensum habent. Qualia infinita sunt apud Poëtas Græcos & Latinos, præprimis apud Satyricos & Comicos, quorum usus in his omnibus longe est maximus; & qui sæpe de rebus conceptus formant, quos non temere apud alios quæsieris. Exemplum ejus suppeditare potest *Rothmarus* in *Centuriis proverbiorum Virgilianorum*.

§. 12.

Ut exemplum aliquod talium excerptorum exhibeamus: sumamus aliquas satyras Horatianas & ex illis notemus adagia ista, Sat. I. l. 1. agit de *μεμψιμοψία*, suæ sortis fastidio, querela de sorte sua sive fortuna, quod nemo sit sua sorte contentus: è qua hæc noster:

Cætera de genere hoc (video sunt multa,) loquacem

Delassare valent Fabium.

Referri potest sub titulum prolixitatis, vel si integrum lemma malis, *Res prolixa est.*

*Si quis Deus, en ego, dicat,
Jam faciam quod vultis.*

Potest sub titulo referri, quid si ita fiat, vel
natihabitionis.

*Quid cause est merito quin illis Juppiter
ambas*

Iratus buccas inflet.

Referri potest ad tit: Principum malam gra-
tiam referres.

Ridentem dicere verum quid vetat?

Tit: è jocis seria.

*Ut pueris olim dant crustula blandi
Doctores, elementa velint ut discere prima.*

Tit. blanditiæ utiles.

*Ore trahit, quicumque potest atque addit
acervo,*

Potes eleganter applicare ad hominem δω-
ροφάγον, rapacem & avarum, substituen-
do voci ore vocem ungue.

Non usquam prorepat;

Eleganter applicari potest ad hominem di-
ligentem, & in discendo & studiis con-
stantem, si leviter sic immutares:

*Non usquam prorepis & illis uteris ante
Quæstis sapiens; nam te neque fervidus
æstus*

*Demoveant studiis, neque hyems, ignis,
mare, ferrum.*

Nil

Nil obstat, tibi dum ne sit te doctior alter.

*Quid juvat immensum te argenti pondus &
auri*

Furtim defossa timidum deponere terra?

Tit. *Eraditio occulta.* potest etiam applicari ad L. L. C. C. collectores, opere ipso ignaros.

Quid habet pulchri constructus acervus?

Potest referri ad malos scriptores, non nisi locos communes cumulantes, exiguo vero judicio praeditos. Titulus esse potest collectio inutilis.

Cur tua plus laudas cameris granaria nostris?

Elegans adagium, quo contemnenti nostram inopiam respondere possimus. Cui quodammodo respondet illud Germanicum, *Ich halte meinen Pfeffer so gut, als du deinen Safran.* Quanquam hic ad copiam potius, quam ad qualitatem respicitur. Tit. *ausreichende* continentiae, *Bergnügbarkeit.*

Quia tanti quantum habeas sis.

Potest referri ad titulum *Divitiarum & auctoritatis*, so viel Guth, so viel Muth und Ansehen.

Quid facias illi? jubeas miseram esse libenter

Quatenus id facit.

Referri potest ad titulum *contemnendi vel permittendi*, permitte illum suo genio vivere.

G 2

Po.

Populus me sibilat: at mihi plaudo.

Solitariè accepta propositio, referri potest ad *hominem arrogantem*, qui iudicium populi de se contemnit, αὐθάδην sibi placentem, præfactum, contumacem.

tu tanquam parcere sacris

Cogeris, aut pictis tanquam gaudere tabellis.

Potest referri ad tit. avaritiæ, aut *inutilis parsimonia*, sive non uti rebus ad usum destinatis; pene convenit germanicum. Du siehest es an wie die Kuh das neue Thor, oder du verwahrest es wie ein Heiligthum.

Horum semper ego optarim pauperrimus esse bonorum.

Tit. *contemnendi ut bonum inutile.*

*Infelix operam perdas: ut si quis asellum,
In campo doceat parentem currere frenis.*

Potest referri ad varia, (1) ad tit. *frustranei laboris*, (2) ad tit. *institutio infelix*. Als wenn einer mit dem Esel nach dem Turnier reiten wollte.

pergis pugnantiæ secum

Frontibus adversis componere?

ad tit. *contradicis tibi ipsi.*

Est inter Tanain quiddam focerumque Visselli.

ad tit. *Differentia vel diversitatis vel medium eligendum est.*

Nemo

*Nemo se probet ac laudet diversa sequentes
potest refetri ad tit. Φιλαυτίας.*

Exaeto contentus tempore vita

Cedat uti conviva satur.

ad tit. Beata mortis.

CAP. II.

DE

EXCERPTIS RHE- TORICIS.

§. I.

Procedimus ad excerpta Rhetorica, quæ ad orationem justam formandam pertinent, & hæc quidem distribui possunt secundum suos characteres. alius enim simplex est: alius copiosior & ornatio. simplex dicendi genus est in Dialogis & Epistolis, & habent illi peculiarem aliquem genium atque indolem, secundum quam institui debent. Quod ad dialogos attinet, præcipuum hic est connectendi methodus, quæ consistit in formulis mutæ fermocinationis, quales colligi debent è

G 3

comi-

comicis & Dialogorum scriptoribus; ideoque tales formularum tituli concinnandi sunt: quales neminem hactenus conce-
pisse memini. in animo quidem habuit Star-
ckius. nam in appendice formularum epi-
stolarium promisit tales formularum locos
communes, qui vero in lucem hactenus non
prodierunt. Solus ille titulorum sylla-
bus, quanquam mancusest & imperfectus,
libello ejus de stylo subjunctus est: qui
quoniam non in omnium manibus versa-
tur, ex illo titulos excerpemus, ut usui
esse possint illis, qui talia collectanea in-
stituere nolunt: sunt vero isti.

LOCI COLLOQUIORUM.

I. In initio: Præparatio ad congressum
& colloquium.

Salutandi. Respondendi ad Saluta-
tionem.

Salutatio perversa & jocosa. Resp. ali-
ena ad salutationem.

Gratulandi de adventu: It. ad amicū
diu expectatum & desideratum. Resp.
ad gratulationem.

Quid agis? quomodo vales?

Bene valeo. Mediocriter valeo.

Gaudium de valetudine & prospero
statu.

Male

Male valeo.

Dolor de invaletudine it. de adverso alterius statu.

Cur es laetus? Cur es tristis?

Est, quod tecum loquar. Ut scias. Quid vis? quid est?

Non est mihi otium. Sine me ire.

Breviter dic. Attende: Tace. Resp. at-
tendo: dic.

Quærendi, interrogandi. Scire cupio.

Respondendi interroganti.

Responsio vel oratio perplexa, obliqua,
aliena, morosa. It.

Responsio ad orationem perplexam.

Respondendi pro alio.

Responsionis recusatio.

Audisne? Quid taces? Dic. instandi, ut
dicat. Audio.

Quid dicin? Tace, Vnde venis?

Quo tendis? Vbi fuisti? Quærendi, in-
vestigandi personam vel rem.

Respondendi quærenti.

Estne domi? Quid agis?

Quid incipis? Quæ causa?

Quid ita? Quæ tibi vis? esne sanus, an
insanus? Ad peregrinum vel insperatum.

Dic vere, noli mentiri.

Verum dico, non mentior.

Adventus opportunus, gratus. Adven-
tus importunus, ingratus. Nostin eum?

Novi. Colloquium arcanum. Cave, ne cuiquam dicas. Tacebo, nemini dicam. Divulgandi, patefaciendi, prodendi.

In medio Colloquiorum.

Propositio, Narratio, connexiones, transitiones,

Personæ commendatio,

Personæ commendatio Ironica,

Feminæ commendatio,

Personæ vituperatio,

Feminæ vituperatio,

Accusatio, objurgatio.

Defensio, purgatio, excusatio,

Facti approbatio, laus.

Dictorum approbatio.

Dictorum improbatio.

Repetitio, ταυτολογία, quoties dicam? millies audiui. satis scio.

Interpellandi.

Non intelligis?

Intelligo, manifestum.

Non intelligo, obscurum.

Scisne? scisne an?

Scio.

Nescio, ignoro

Certane hæc sunt?

Affirmandi. Certa vera sunt.

Negandi, falsa.

Dubitandi, incertum.

Cre.

Credere, fidem habere.

Diffidere, non credere.

Admirandi, mirum.

Titubatio in sermone, correctio.

Petendi pro se & aliis.

Respondendi ad petitionem affirmative.

Resp. ad petitionem negative.

Gratias agendi, prædicandi officia.

Responsio ad gratiarum actionem.

Extenuandi sua officia.

Pollicitatio amicitiae & officiorum.

Amicitiam & favorem alicujus petendi.

Respondendi ad petitionem amicitiae.

Mandatum.

Respondendi ad mandatum, obsequendi.

Consentiendi.

Repugnandi, dissentiendi.

Laudandi alicujus ingenium, virtutes, doctrinam.

Respondendi ad sui laudationem, extenuandi se.

Quærendi.

Condolendi.

Consolandi.

Respondendi ad Consolationem.

Gratulandi.

Respondendi ad gratulationem.

Formulae Jocorum & facetiarum promiscue.

Optandi, votum.

Imprecandi sibi.

Imprecandi aliis.
 Nunciandi læta.
 Respondendi ad lætum nuncium.
 Nunciandi tristia, adversa.
 Respondendi ad tristem nuncium.
 Præteritio, alias dicam.
 Comminandi.
 Comminationes jocosæ.
 Respondendi ad comminationes.
 Consilium petendi.
 Suadendi.
 Dissuadendi.
 Consilium approbandi.
 Consilium improbandi.
 Concedendi.

3. In fine Colloquiorum.

Conclusio.
 Abrumpendi colloquium formulæ promiscuæ.
 Abrumpendi colloquium formulæ speciales.
 1 Ne me diutius detine. Non diutius vacat.
 2 Tempus est abire.
 3 Res non indiget longiori sermone.
 4 Nunquid aliud me vis?
 Excusatio colloquii propter ténuitatem & moram.
 Responsio ad excusationem.

Pol-

Pollicendi in fine amorem & officia.

Respondendi ad pollicitationem.

Vota in digressu, discessu.

Redi ad me.

Petendi, ut sæpe nos visat.

Responsio ad petitionem accessus.

Mox redibo.

Valedicendi, dimittendi.

Responsio ad valedictionem & dimissionem.

Valedictionis repudiatio.

Valedictio iratorum & inimicorum.

Abi. Mane domi.

§. 2.

Sub his titulis formularum dialogistarum colligi possunt è Ciceronis dialogis, è Plauti, ex Terentii comœdiis, item ex aliis quibusdam recentioribus, qui Dialogos scripserunt, Formulæ. ita facilius erit Dialogorum concinnatio, de quorum conficiendorum ratione *Carolus Sigonius* singulari libro egit.

§. 3.

A dialogis procedimus ad Epistolas, quod alterum genus est dictionis simplicioris et si nonnunquam pro re nata stilus exaltari possit, si ad viros illustres scribamus,
&

& argumentum epistolæ ita efflagitet, ut in dedicatoriis, gratulatoriis. Collectanea in his duplicis generis formari possunt, materialia scilicet & formalia. Debent itaque sub titulis generum epistolicorum, ut petitoriorum, suaviorum, adhortatoriorum &c. colligi ex auctoribus argumenta, super quibus tales epistolæ scriptæ sunt. Qualia collectanea ex epistolis Ciceronis instituit BÜCHLERUS, quibus tamen nos jungere possumus alias ex bonis auctoribus, tam veteribus, quam recentioribus epistolas. Subjicere etiam possumus collectanea argumentorum & enthymematum, quæ in singulis epistolis tam *Ciceronis* quam aliorum adhibentur: ita tamen ut per indicem tantum excerpamus. Qua in re viam utiliter prævit *Melchior Junius* in Scholis Rhetoricis de conficiendis epistolis, qui liber magni ad contexendas epistolas, usus est Si enim e.g. consolatoriam scripturus es: invenies illic omnia argumenta, quæ in hoc genere usurpari possunt collecta: notatis semper locis, ubi illa in Ciceronis epistolis occurrant. Ita scripturus epistolam, & simili argumento usus, ex tot enthymematum exemplis, unum idemque sensum exprimantibus, facile imitationis beneficio tuæ quodammodo omnia propones, amputando, amplificando, condensando pro ut commodum tibi videbitur. Atque ita pri-

primum ego informari juvenes in epistolicis exercitiis velim, ubi rhetorices tyrocinia posuere. Neque ex solo Cicerone talia collectanea instituti possunt, sed ex aliis scriptoribus tum veteribus tum recentioribus.

Materialibus collectaneis subjicienda sunt formalia. Sub istis autem comprehendo omne illud, quod ad formulas pertinet, quod præcipuum pene in epistola est; adeo ut interdum solæ formulæ literas absolvant: præcipue si sint salutatoriæ sive *Complimenten-Schreiben* neque in certo aliquo genere versentur. & illæ quidem formulæ vel ad nexum partium in epistolis spectant, ut sunt formulæ exordiendi, connectendi, transeundi ab argumento ad argumentum & similes. vel sunt in se argumenta ethica & pathetica: quibus præcipue illa & Logica argumenta quasi investire solemus. Horum collectaneorum rationem accuratam instituit *Starckius* in thesauro suo epistolarum, ubi omne illud quod ad formulas spectat, sub certis suis titulis generalibus & specialibus repositum est: quibus addi etiam aliqui tituli possunt, qui forte in epistolis occurrunt: sed pauci illi erunt. Nam satis uberem ille apparatus suppeditavit. Formulæ tamen longe plures vel è solo Cicerone colligi possunt. nam multas ille prætermisit. E recentioribus scriptoribus, qui castam satis latini-

tinitatem servant, ut *Manutio*, *Paleario*, *Bunello*, *Balzacco*, aliisque auctoribus etiam Gallicis longe plura colligi possunt. Possunt & addi, quæ *Rupertus* in Mercurio suo epistolari è *Scaligero*, *Casaubono*, *Wovewio* aliisque collegit, etsi illa non sunt cum prioribus comparanda. Nitidior enim in illis dictio latina est; quanquam & hic non tam semper ad dictionem, quam ad sensum & argumenta respicere solemus.

Excerpta oratoria varia esse possunt: generatim (1) ad formam excerptorum disciplinarium, de quibus infra, instituti possunt, sed illa ad usum & elaborationem orationis non pertinent, atque iis tantum usui esse possunt, qui in Rhetoricis aliquid moliantur. Videbimus itaque illa quorum usus quotidianus est, & quidem (1) institui possunt Loci communes thesium, rerumque omnium, quæ quomodocunque ad orationes spectant, aut oratione proponi solent, cujuscunque generis. Institui vero illa collectio thesium secundum causarum genera potest. Cum enim Objectum rhetorices sit quæstio quælibet; præsertim civilis, illa verò duplex sit, infinita vel finita; Infinita vero thesis dicatur, finita hypothesis, & ab hac ad illam plerumque progrediatur orator, atque ex thesi argumenta desumat ad hypothesin suam probandam; consequens est, quo quis in thesibus

sibus earumque argumentis versatior fit, eo majorem inventionis copiam habiturum: ideoque mature talium thesium excerpta instituantur, quæ non in civilibus solum, sed etiam in ecclesiastici argumenti orationibus suam utilitatem exserent. Nam iidem fontes sunt sive ad virtutes civiles, sive ad sacras respiciamus; nisi quod illud discrimen observari debet, ut in thesibus civilibus enthymemata è prudentia morali & civili deprompta colligamus, in sacris & illa & inartificialia argumenta è dictis scripturæ petita. Vidit jam hujus rei utilitatem *Baco Verulamius* in libro suo de augmentis scientiarum, ubi specimen aliquod talium thesium & antithesium proponit. Idem quoque negotium *Schraderus* in commentario in *Rhet. Aristotelis* commendat. In demonstrativo genere colligemus ea, quæ vel laudantur vel vituperantur vel simpliciter vel comparate. Fundus earum rerum sit in omnibus orationibus vel dissertationibus, quomodocunque aliquid laudant vel reprehendunt. Possunt & in subsidium vocari poëtæ; nam ex iis & mutare potest orator. In genere deliberativo colligi possunt theses ad consultationem spectantes: ideoque hic excutienda sunt illa themata, quæ apud Oratores & historicos disceptantur. singulis illis subjici argumenta possunt. Exemplum horum locorum

com-

communium quadam ex parte subministrare potest *Melchior Junius* in resolutione orationum Ciceronis, ubi secundum tria causarum genera orationes Ciceronis disponit, & secundum partes oratorias, omnes ejusdem generis orationes examinat. sed ille ex solo Cicerone sua tantum congeffit, & partes orationis in fronte posuit, secundum quas collegit argumenta illa Ciceroniana.

Ejus itaque scopus potissimus est, docere quomodo partes & argumenta in quacunque oratione sint formanda & collocanda. pertinebit itaque potissimum labor iste ad formulas & argumentorum inventionem, de quibus collectaneis postea dicemus. In genere judiciali, eius hodie exiguus usus, aliqui tamen in argumentis affinibus, ut si expostulationes, exprobrationes &c. instituendæ sint. Colligemus varia genera criminum, de quibus institui exprobrationes vel accusationes solent, & notabimus sub illis varia argumenta, quæ ad illa probanda adhiberi solent. Locos communes defensionum colligere possumus, quorum magnus apud Ciceronem cumulus est; nunc quidem illorum non adeo magnus est usus, cum eloquentia forensis desierit, Jcti vero & Advocati non tam per eloquentiæ subsidia, quam per disputationes forenses omnia proponant. In ecclesiasticis non contemnendus

us his generis usus est, cum vitia reprehendimus, & vitiosos homines oratione nostra coarguimus: tum enim communia illa argumenta, quæ Oratori civili profunt, facili negotio in sacra convertere possunt: omnis enim illa doctrina statuum, qui in hoc genere occurrunt, mirifice inservire huic scopo potest. ut si proponam Adamum adversus mandatum Dei de vetita arbore comedentem, Cainum fratricidam, Judæos adversus Christum disputantes, imo totum illum Judæorum adversus Christum processum.

§. 6.

Subjungi his excerptis potest codex formularum oratoriarum, qui sane utilissimus est ad orationes scribendas. Nullum vero adhuc habemus, qui hac in re quicquam præstiterit. Est quidem *Meyfarti* aliqujus mellificium oratorium, sed cura tumultuaria è non optimæ notæ auctoribus congestum. Sunt formulæ connexionum transitionumque ab Ivaro Petro Adolpho *Clarkio* aliisque collectæ: verum postremus ille multa admisit pravi gustus & è lacunis hausta. Promiserat *Starkius* olim tales locos communes, quemadmodum conceperat epistolicos & dialogicos suos; sed isti lucem non viderunt:

H

fi

si quis autem illos instituire velit: titulos posset collocare primum generaliores partes orationis, deinde specialiores, quæ sub partibus illis continentur, & formulas ad illas speciales partes referre, quorum locorum communium rudimentum subministrare poterit *Melchior Junius* in modo laudata illa resolutione orationum Ciceronianarum: nam è lectione orationum concinnari debent. Ac videmus ipsum etiam Ciceronem talibus formularum collectaneis fuisse usum. Aperte enim de se ipso scribit, *se codicem habuisse*, quibus collegerat varias exordiorum formulas, ut cum orationi scribendæ accingeretur, inde quæ in suum essent usum depromeret. Testatur etiam Quintilianus, causarum Patronos tales in promptu habuisse formulas, quibus illi ut Delphico quodam gladio uterentur. Non immerito ab illo idcirco reprehensi, non quod his subsidiis, sed quod inepte uterentur, & in locis communibus subsisterent, cum specialiora argumenta requirerentur. Quod attinet ad connexiones: illarum usus frequentissimus est in oratione, ideoque suaferim illas seorsim esse colligendas, primum per particulas in membris minoribus vel majoribus; deinde per figuras: nam de formulis in codice formularum solliciti sumus, neque tam connexionem

xionem, quam transitionem facit formula. Particularum usum in connexionibus præ cæteris observare debemus. Nam latissime patet earum usus, & ex his, velut quibusdam characterismis notare genium linguæ possumus. De his agit *JACOBUS HUGUES* in artificio transitionum & connexionum; verum quod ad particulas attinet, distinctè magis & ordinatim *Elias Major* in libro *de varianda oratione*. Accurate itaque observandæ sunt particulae, quæ ad connexionem spectant, siue sint illativæ siue causales, siue conditionales, seu adversativæ; seu exceptivæ, seu explicativæ, &c. Nam variis illis affectionibus spectari potest oratio: & ex his connexio sermonis dependet. Qui itaque tales voculas vel aliis synonymis vel formulis idem significantibus variare novit, non contemnendum habet connectendæ orationis artificium: in quo sæpe solliciti sunt qui orationem scribunt. Distinguendi hic quoque sunt characteres. Nam aliæ connexiones poëticæ sunt, aliæ orationis contentiosæ, aliæ narrationum & historicæ: in quibus omnibus adhiberi oportet accuratum judicium. Poëma plane dedecent connexiones periodicæ, per quas in orbem volvitur oratio: ut quandoquidem, etsi, tametsi, veruntamen, siquidem, verum enim vero & plures aliæ; quales vo-

culæ omnes spectant ad rotundandam oratoriam periodum, qualis non occurrit in carmine; plerumque enim membratim illic procedit oratio, & per commata trahitur, sine aliquo in orbem reditu. Etsi *Virgilius* magis periodicus sit, quam cæteri; ita tamen ut ultra decorum poeticum non eat. Neque solum connexiones verbales, quæ consistunt in particulis & formulis, sed reales, quæ vicinitate rerum obtinentur, notandæ sunt. Ut enim perpetuus est inter se rerum analogismus; ita nihil inter se adeo diversum est, quin certa quadam ratione jungi possit. Possunt & formulæ illis misceri recentiorum auctorum Italicorum & Gallicorum formulæ; sed videndum ne Latinitatis genius corrumpatur. Alioquin fontes formularum sunt in argumentis Ethicis & Patheticis; quos si probe cognitos habemus; cognosci à nobis facile potest, unde formulæ tales sint petendæ. Porro ad excerpta Rhetorica referri debet codex characterum vel morum, quo colliguntur illæ sententiæ, quæ idoneæ sunt subministrare argumenta Ethica ad rem probandam necessaria, quorum copia colligi potest in codice Thesium.

Morata & pathetica argumenta per totam orationem sunt diffusâ, & maximam orationi conciliant gratiam. nulla enim pene

ne formula, nulla oratio familiaris, quæ recte iis utatur: quibus quo magis referta est oratio: eò illa vivacior & illustrior est. Implicantur vero nonnunquam illa argumenta ita verbis, ut una sæpe voce ac epitheto contineantur. Neque enim opus est magno cum apparatu illa proponere. Infinita talia occurrunt, non in oratoribus tantum, sed & Poëtis: præcipue apud comicos, qui, ut speculum vitæ humanæ omniumque actionum repræsentantur: ita pleni sunt talibus sententiis, quæ ex abdito eruntur, atque iterum aliis argumentis applicari possunt. Luculentum præ cæteris specimen dedit *Theophrastus* in characteribus suis, libello vere aureo, qui mores hominum secundum status & vitæ genera & naturæ inclinationes describit brevibus lineamentis, sed plus rei quam coloris ostendentibus, in quem extat pulcherrimus *Cassauboni* commentarius, qui sententias *Theophrasti* parallelis aliis illustrat. Fundamentum horum excerptorum ponendum est ex Art. Rhet. Lib. 2. c. 12. 13. 14. 15. 16. 17. quibus illa hominum mores describit secundum varios status. Hæc enim omnia pro fundamento sunt, & quæ hic occurrunt axiomata, pro titulis usurpanda, quibus titulis deinde subjungendæ sunt sententiæ vel similes ex auctoribus, vel specialiores. Præ in illorum excerptorum institu-

endorum dilucide satis ob oculos posuit *Schraderus* in commentario Rhetorico pag. 371. Inter Gnomologos non habemus, qui tali methodo collectanea sua instituerint. solus *Magiri* liber, qui πολυμνέμων inscribitur, aliqua ex parte prodesse nobis potest & ex illo non exigua sylvā propositionum moralium exsculpi. Nam summaria omnium illarum sententiarum, quas adducit, in frontispicio ponit, unde per synopsin haberi omnium sententiarum idem significantium sensus potest.

§. 8.

Ut codex morum, ita codex affectuum quoque instituendus est. argumenta enim pathetica pro movendo auditore inferenda sunt orationibus omnibus, præcipue iis, quæ in singulari aliquo affectu versantur. Doctrinam hanc de affectibus plenissime tractavit Aristoteles lib. 2. Rhet. à cap. 1. ad cap. 11. ubi legendus est diligentissimus ejus commentator *Schraderus*. Disponendus itaque hic liber est secundum affectus, qui titulos generalissimos repræsentat, sub singulis affectibus speciales tituli ponantur (1) qui tales (sc. affectus) habeant (2) ob quæ, id est ob quam causam tales affectus quis induat (3) adversus quos.

Subsidio hic esse possunt auctores, qui de affectibus egerunt, etiam *Physici* præ primis tamen *Morales*, ut: *De la Chambre* in lib,

lib. gall. de *characteribus passionum animæ*, *Carsesius*, *Willisus*. His titulis specialioribus subjungendæ sunt sententiæ huc spectantes apud auctores, imprimis Poëtas. *Codex exemplorum* huc quoque spectat, magnam enim exempla vim habent in populari oratione. Exempla autem illa specificari magis debent, quam in vulgaribus locorum communium libris.

Velim quoque Figurarum illustrium, excerpta fieri, quæ quidem ordinari velim, non secundum figuras tantum, sed & secundum argumenta ethica & pathetica. His enim præcipue subserviunt, & figuræ sunt affectibus omnibusque animi motibus subordinatæ. Quædam ad argumenta docentia tantum pertinent, ut figuræ sententiarum, sed & illæ tamen indirecte ad affectus & mores referri possunt, uti & omnes etiam figuræ ad amplificationem pertinentes. Quando itaque occurrit argumentum in oratione, quod pressius urgeri debet, notandum est quænam figuræ apud auctores illis subjungantur. Magno hoc usui esse potest in elaboratione orationum. Ut si quando in simili casu aliquid dicendum sit, simili modo informetur oratio.

CAP.

CAP. IV.

DE

EXCERPTIS PÖE-
TICIS.

§. I.

Venio ad Excerpta poëtica. Oratio enim ligata aliam curam requirit, quam soluta. Et hic quidem ita excerpta dispono, ut alia sint verborum, alia ornamentorum, alia rerum & inventionum. Notum est Poëtas alia quasi lingua loqui. Differt enim eorum oratio plane à pedestri, tam ratione syntaxeos & grammatices, quam ratione ipsius dictionis. Syntaxis illa quomodo differat ab ordinaria, elegant compendio ostendit in palæstra eloquentiæ ligatæ *Masenius*. Dictio quomodo parari debeat, non est adeo ab omnibus observatum. Hanc dictionem ut familiarem mihi reddam, instituenda sunt excerpta Metaphorarum poëticarum. In iis enim plerumque sublimitas dictionis. Vehementer autem illæ differunt à communibus, neque locum inveniunt in oratione soluta. Instituenda autem sunt excerpt-

cerpta illa secundum alphabeti ordinem, & subjungendus libro illi index est rerum vel subjectorum, de quibus dicuntur metaphorica illa prædicata. talia excerpta plus juvant quam omnia æraria & Flavissæ.

His Lexicis collectaneis subjungendæ sunt excerpta phrasium & formularum poetarum, quales congeffit in Parnasso suo poetico Nomesius, aut in *Flavissis* suis poetis *Baccherius*. Ponantur autem hic.

(1) Synonyma simplicia nominum & verborum, rum & periphrases: iis enim frequenter utuntur poetæ.

(2) Phrases, ubi notari velim phrases solutæ orationis, quales *Schönsledeus* congeffit. Vehementer enim ad carmen scribendum prodesse possunt.

(3) Formulæ variæ connectendi, comparandi, transeundi, Poëtis familiares, quarum specimen dedit *Jacobus Hugues* in artificio connexionum & transitionum, tum & *Laur. le Brun* in eloquentia sua poetica.

§. 3.

Ornamentorum collectanea consistunt vel in similitudinibus & comparisonibus, vel in idographiis, & prosopographiis, vel denique in exemplis fictis & fabulosis, quæ omnia utramque paginam faciunt in

mine & diligenter præ cœteris sunt colligenda. Nam quod attinet ad comparationes, earum pauculas quasdam collegit *Georgius Fabricius* in libris de Re Poëtica, plures nescio quo auctore edidit *Alexander Carolus Trognæsius* singulari libro Antwerpæ An. 1610. in 8vo. Brevem earum indicem dedit *Masenius* in palæstra eloquentiæ ligatæ sed imperfecta sunt omnia. longè enim plura tam ex veteribus quam recentioribus colligi possunt.

Ponantur itaque Tituli horum locorum, actiones aut virtutes cum alijs quibusdam rebus comparatæ, ac subjiciantur illis comparationes ipsæ; index denique collectaneis subjiciatur alphabeticus rerum quæ in comparisonem veniant, adjecto morali illo in quo comparantur.

Idolographiæ & Prosopographiæ frequentes sunt apud Poëtas, qui simili modo colligantur. Sunt vero illæ, vel cum virtutes vel vitia, ut personas introducimus, vel aliquem locum sive verum sive fictum describimus. Extat liber scriptus à *Cesare Ripa*, qui in germanicam linguam nunc versus est, sub titulo iconologiæ, cujus brevem aliquam epitomen habet *Zarsdörffer* in seinem poetischen Trichter. Ex illo quoque & alijs excerpfit *Masenius* in *Spec. imaginum veritatis* occurrit, sed utile tamen est, ipsas illas descri-

scriptiones poëticas notare, passim occurrentes, quod non faciunt citati auctores. Ponantur itaque tituli rerum, quarum descriptio notatur & subjiciatur index ipsarum imaginum.

Rerum & inventionum collectanea ordinentur secundum Alphabeti literas, vel tumultuario etiam ordine, qui in ordinem redigatur per accuratum indicem. Colligantur loca Poetarum, quibus aliquid vel laudatur vel vituperatur vel describitur separatis classibus. Nam tria illa potissimum sunt, quæ in carmine ratione rerum considerari debent. Integræ autem theses non tam ad poëticos, quam ad oratorios locos communes pertinent. Exempli gratia, cum aliquid suadetur, aut dissuadetur, accusatur vel defenditur, ac possunt tamen illa ad generales laudationum & vituperationum titulos referri. Suadentur & defenduntur bona: dissuadentur & accusantur mala. Raro in aliquo carminum genere versamur, quam encomiastico. Satyra, quæ tamen rarius scribitur, ex ipsis met fontibus argumenta sumit. In Poëmate Epico ad Historiæ similitudinem instituto, ut *Æneis* Virgilii, in comoediis & Tragoediis, in Eclogis nonnunquam thesibus locus est. Sæpe enim aliquid vel consultatur vel accusatur. Quoniam vero illa ex oratoriis fontibus haurienda sunt, ideo.

ideoque ad illos & excerpta rehorica hæc remittenda. Exempla talium collectio-
num nobis dedit *Laur. le Brun* in elo-
quentia sua poëtica : sed nimis operosus
est in describendis ipsis autorum locis :
sufficeret solus index. habentur autem ista
excerpta apud illum lib. 7. part. I. Scia-
graphiam talium locorum communium
dedit *Farnabius* in indice suo oratorio &
Poetico, sed qui augeri multis modis po-
test.

§. 8.

Loci communes inventionum ita ordi-
nari possunt. Tituli locentur secundum
causarum genera, exempli gratia in de-
monstrativo genere generalis titulus sit
Epithalamium: sub illo sint specialiores
tituli secundum circumstantias vulgares
distincti. Unde epithalamiis inventiones
petendæ sint, tradit præcipue *Dionysius
Halicarnassæus*: in arte sua rhetorica. Fon-
tes illi communes sunt & cuiusvis patent, è
quibus si quis materiam scribendi capere
velit secundum Rhetorica enthymenata,
vel deliberativi, vel demonstravi generis
ordinare speciales titulos potest. exempli
gratia. cum Epithalamium scribendum,
vel suadetur matrimonium in se specta-
tum vel certæ personæ, vel cum certa per-
sona, vel laudatur ipsum matrimonium vel
lau-

laudantur personæ. Et hæc quidem communissima sunt ; nec multo artificio indigent. Solent vero in minoribus illis poematibus tam operosa enthymemata non requiri : nisi cum quis poema aliquod justæ magnitudinis conficere velit ; tunc conquirenda sunt omnia tam Rhetorica enthymemata, quam artis poetiæ ornamenta. In minoribus vero illis sufficit instituere inventiones, secundum locos περιστατικὰς s. circumstantiales, cum in facto aliquo versamur, cujus circumstantiæ vel omnes vel singulæ aliquid subministrabunt, quod ad ornandum carmen facit. Ordinantur itaque tituli secundum hos locos. Ita ex circumstantia personæ conficiēs speciales titulos : Epithalamium Jcti, Theologi, Medici Mathematici &c. & notabis exempla insignium Poëtarum, & specialia ista vel enthymemata vel argutias, quæ rei præsentī accommodatæ sunt ab ipsis. similiter ex circumstantia temporis conficias titulos epithalamiorum æstate, vere, hyeme, nundinis &c. celebratorum, sub singulis notentur exempla aliorum, & quæ tu ipse inveneris ex analogismo tot auctorum inter se instituto. Similiter & procedendum in reliquis locis.

CAP. V.

DE

EXCERPTIS CRITICIS ET EXEGETICIS.

§. I.

Excerpta, de quibus hactenus egimus, pertinent ad orationem formandam, Quæ nunc subjungimus, non tam ad orationem pertinent, quam ad auctorum explanationem, & ad usum in interpretandis auctoribus, iisque inservire possunt, qui commentaria in Auctores parant, aut dissertationes super argumento aliquo philologico scribunt. In his primum locum obtinent Excerpta Critica, quæ quidem a Grammaticis differunt. Nam etsi supra mentionem fecimus glossematum & collectaneorum Lexicorum, alia tamen hæc ab illis sunt, & instituuntur ad sensus auctorum investigandos, quæ ego vocarim ad distinctionem cæterorum Excerpta Critico Exegetica. Adornari autem illa hoc modo possunt. Sensus accuratos in Auctoribus quærimus vel è variarum lectione.

tionum investigatione vel ex ipso verborum sensu. Quod ad varias lectiones attinet, illæ è manuscriptis codicibus consignari vel ad margines librorum possunt, vel libris separatis secundum auctorum paginas dispositis. Nam e collatione earum ad veros sensus locorum auctoris pervenimus.

Exegetica excerpta ita adornanda sunt. Adscribenda sunt ad margines auctorum loca illa, ubi explicantur hæc vel illa verba; vel separatus liber adornari potest secundum ordinem librorum auctoris. Illa excerpta si a prima juventute instituantur; nunquam deesse potest materia super auctores commentaturo, vel lectiones super illos instituturo. Habemus tot libros adversariorum, observationum, è quibus varia auctorum loca explicantur. Illa omnia referri ad has velut sedes suas possunt. Illustrantur nonnunquam data occasione in aliorum commentariis auctoris loca: etiam hæc referri illuc possunt. Non credat aliquis quanto usui talia excerpta sint. sic quoties occurrit aliquid ad *Virgilium*, illud ad marginem Virgilianorum operum scribatur. Ita fiet & in aliis. Subsidio hic esse possunt indices auctorum vel laudatorum vel emendatorum, qui subjungi solent libris criticis. Illi si in omnes auctores essent & accurate satis con-

conscripti: superfedere hoc colligendi labore poteramus. Verum cum in plurimis illi deficiant, ac tumultuariè sint conscripti, nec loca auctorum statim conspectui pateant: rectius ipsi tales excerptorum libros conficiemus. Reperiuntur quidem Indices in Tom. III. & IV. *Facis Critica Gruttriana*, in quibus accurate notata sunt auctorum loca ac verba ipsa, addito semper auctore, ubi explicatio invenienda. Sed in reliquis tomis labor ille desideratur, qui tamen tali opere, & quod ad illos usus concinnatum est, summe esset necessarius. Eum enim in finem *Gruterus* hos libros junctim edi curaverat. Eodem modo in legibus Romanis, vel in sacro codice excerpta Exegetica quis conficere poterit, magno futura usui, si labor cum ætate & annis creverit. Nam in explicatione Legum Romanarum vehementer vacillamus, essetque talium excerptorum ad explicationem Legum maximus usus, ipsis etiam JCrts non observatus. Plerique enim ex illis parum de interpretatione genuina legum Romanarum solliciti, ad auream praxin omnia conferunt, in qua solida Legum interpretatio, quæ ex his subsidiis petenda est, pro Scholasticis tricis & inutili labore habetur. Illud tamen certum est, infinita in his restare agenda, quæ talium excerptorum

rum

rum beneficio confici possunt, ut nunquam defutura sit materia. Iam, si novas commentationes scribere in leges velit, & quidem eruditus: cum vulgares illi commentatores non nisi cramben coctam centies recoquere soleant. Quantus eorum excerptorum in Theologicis usus, quilibet sane facile intelligit. Hinc sane Biblia critica ortum suum trahunt, in quibus illud fortassis desiderandum est, quod nimis concise omnia tractentur, & auctorum loca non satis accurate notentur. Ex his tamen magnum usum in Theologiam inferri, stupidus certe esset qui negaverit. neque adeo in Medicis talium excerptorum usus contemnendus est, etsi non tam auctoritacibus, quam rationibus illa consent: est tamen ubi *Hippocratis* & *Galeni* sensus aliam aliamque interpretationem admittunt: est ubi in nominibus morborum, in nominibus materiae medicae magnus philologiae usus est; quem aliqua ex parte demonstrarunt *Hoffmannus* in variis suis lectionibus Medicis, in officinalibus suis. *Jul. Caesar Scaliger* comment. in *Theophrastum* de plantis, *Rodens Stapel* alio in eundem auctorem commentatio; *Salmasius* commentario in *Polyhistora Solini*, qui & ipse opus vastum de materia medica præ manibus habuit: in quo ille mirifice Medicorum labores juvare potuisset, non latina solum & græca sed

& orientali nomenclatura rerum & lectione Auctorum instructissimus. Cujus defectum supplere nuper quoque potuisset *Hieronymus Velschius*, Vir ut in Medicina, ita & in græca atque orientali literatura consummata eruditionis.

Jungi his possunt *excerpta antiquaria*, quanquam enim illa ad Historicos pertinere videntur: nolim tamen misceri cum illis. Cum enim historica vel ad civilem usum congerantur, vel ut accuratior ipsa historia habeatur: nimis prolixum & tædiosum esset in isto cumulo illa quarere. Continent vero *Excerpta antiquaria* ritus variarum gentium, circa certa subiecta. Jam vero *Merhodus* colligendi illa varia esse potest, vel enim respicimus ritus illos secundum solennia actionum humanarum institutos, atque sic ordo talis adhibendus esset, qualis in antiquitatibus *Rosini* & *Dempsteri*. Sed præstat potius sequi ordinem rerum, illisque collectaneis deinde subnectere indicem rituum secundum varias in Republica actiones dispositorum. Placeat itaque mihi hic nude consignare Lemmata rituum, adjectis auctoribus, qui de illis agunt, nam exscribere nimis prolixum esset. Velim deinde Lemmata illa numerari, apposis in fronte numeris, si forte unum Lemma ad plures titulos pertineat: ut non opus sit integrum exscribi, sed tantum paginam al-

terius

terius tituli & Lemmatis numerum poni. *Josephus* in πολυμαθία suos libros & indices tales confecit secundum alphabeti seriem; sed non ille ordo observatus est, qui debebat; & paucula illa tantum sunt, possuntque longe plura illis addi. deinde neque Lemmata sunt numerata, neque sub titulis diversis repetita.

CAP. VI.

DE

EXCERPTIS QUÆ
AD FORMULAS SYSTEMATICAS SPECTANT.

(Ex Orat. pro Leg. Man.)

Formulas systematicas voco, quæ ad totam orationis dispositionem ac connexionem membrorum pertinent. Systema Exordii retextitur in collegio nostro Oratorio-Theoretico-practico cap. 18. Est enim optime formatum, & 4. suis partibus constat. Tota hujus Exordii Sciagraphia referenda est ad locum exordii circumstantialis. Periodus prima & secunda referenda ad titulum hunc, *Μαθήμεις ex hoc loco ver-*

ba non feci: quæ etsi ad sententias amplificatas etiam referri possunt, tamen ad systematicas formulas referri quoque debent. Ad connexiones periodicas minores referantur hæ formulæ:

Ira neque hic locus vacuus unquam fuit &c. Nunc cum auctoritatis in me tantum sit: atque illud inprimis jure mihi latandum esse video &c.

Ad formulas systematicas in Exordio pertinent etiam hæc. Commendandæ orationis argumentum à copia; *Atque illud inprimis - - - modus in dicendo quaerendus est.*

Modeste diligentiam suam & industriam commendare:

Nunc cum ex auctoritatis - - - censuerunt.

Formula transeundi ad narrationem vel confirmationem: *Atque ut inde oratio mea proficiatur. &c.*

Gonnexionis periodicæ narratoriæ, periodi pendulæ per infinitivos decurrentes, indicativis mistæ: *Bellum grave & periculosum - - - præterea neminem.*

Transeundi ad propositionem: *Causa quæ sit videtis: nunc quid agendum &c.*

Formulæ proponendi per partitionem: *Primum, deinde, tum.*

Generalis enthymematum complexio in propositione:

Genus est enim ejusmodi - - - consulendum.

Transeundi ad Confirmationem formula

la a re ipsa & enthymemate primario, & quoniam appetentes semper gloria &c.

Transcendi a parte argumenti ad aliam partem:

Sed pro vestri imperii dignitate atque gloria - - - suscipiendum putetis.

Rejicere aliquid in commodiorem occasionem; *Sed de Lucullo dicam alio loco - - - videatur.*

Argumentum a minori ad majus, elegans hic exemplum:

Majores ex levibus causis bella atrocia susceperunt;

E, & posteri gravioribus de causis.

Transcendi ab uno enthymemate ad aliud per particulas: *Quid, quod salus sociorum &c.*

Concludendi enthymema per interrogationem: *Putatisne nos illis rebus frui posse - - liberatis?*

Concludendi enthymema per adhortationem patheticam.

Videte ne ut illis pulcherrimum fuit - - - conservare non posse.

Transcendi ab enthymemate ad enthymema: *Ac ne illud quidem vobis negligendum est - - - diligenter.*

Concludendi enthymema: *Quare videte num dubitandum vobis sit - - - defendunt.*

Transcendi ab uno membro orationis ad aliud

aliud: quoniam de genere belli dixi - - -
videantur.

Formula qua narratio proponitur in medio Orationis:

Atque ut omnes intelligant me Lucio Lucullo (narratio ipsa incipit) Primum ex suo regno &c.

Per prolepsin argumentum aliquod proponere; Atque ut omnes intelligant - - -
requireretur fortasse nunc (ubi finitur) quemadmodum reliquum possit esse magnum bellum.

Attentionem excitare in singulari aliquo enthymemate:

Cognoscite Quirites: non enim sine causa queri videtur.

Per figuram præteritionis exprimere res luctuosas & graves:

Hic jam plura non dicam: item; finite hoc loco Quirites &c.

Præparandi animos ad attentionem in propositione singularis enthymematis per figuram *ἐὐχῆς* sive voti: Utinam, Quirites, Virorum fortium, ac innocentium tantum copiam dubium facere possit.

Connectendi partes enthymematis per interrogationem:

Quis igitur hoc homine scientior unquam &c.

Transcendi ab uno argumento ad aliud. Jam vero virtuti Cneji Pompeji quæ potest par oratio inveniri?

For-

Formula qua provocamus ad testimonio-
nia: *Testis est Italia.*

Digrediendi ab uno Exemplo ad aliud:
sed quid ego longinqua commemoro? fuit hic &c.

Recensere res gestas per varias figuras
interrogationis, præteritionis. ab illis ver-
bis: *Jam vero virtute Cneji Pompeji usque
media æstate confecit. ubi perpetua est fa-
ctorum Pompeji recensio, e circumstantiis
exaggeratio.*

Transeundi ab uno. enthymemate ad a-
liud per particulas connectendi & exclam-
ationem. *Ac primum, quanta innocentia
debeant esse Impi.*

Laudandi aliquem ex loco comparato-
rum, & quidem dissimilium:

*Summa omnia sunt Quirites - - questu re-
liquit. &c. Cætera quoque quæ sequun-
tur huc pertinent.*

Apostrophe inexpectata ad exaggera-
tionem rei: *Vestra admurmuratio facit
Quirites, ut agnoscere videamini.*

Transeundi ab uno membro ad aliud.
Age vero in ceteris &c.

Laudandi formulæ in singulari aliqua
excellencia:

*Itaque omnes quidem in his locis - - in il-
lis laborasset.*

Connectendi in enumeratione partium
per particulas; *Jam vero ita faciles aditus,
jam quantum consilio; fidem vero ejus*
inter-

inter Socios ; humanitate jam tanta est.

Concludendi enthymematis per Interrogationem. *Et quisquam dubitabit , - - natus esse videatur :*

Transcendi ab uno Enthymemate ad aliud. *Et quoniam auctoritas &c.*

Concludendi partem enthymematis. *Et quisquam dubitabit &c.*

Age vero illa res quantam declarat &c. Quid quod ? idem ipse &c.

Concludendi enthymema : *Potestis igitur jam constituere - - existimetis.*

Transcendi ab uno membrò ad aliud : *Reliquum est , ut de felicitate timide & pauca dicamus.*

Connectendi per verba ad facultatem aliquam intellectus pertinentia :

Ego non sic existimo - - commissor.

Connectendi per asseverationem ; *fuit enim profecto quibusdam summis viris.*

Laudandi oblique per præteritionem, & sub schemate ethico modestiæ :

De hujus hominis felicitate - - optare debetis.

Concludendi enthymema per ἀναίμακτον. *Quare cum hoc bellum ita necessarium sit &c. conferatis.*

Novum enthymema in ipsa conclusione

DE EXCERPENDIS AUCTORIBUS. 137

ne enthymematis primarii : *quæ si Romæ Cn. Pompejus - - amittimus.*

Transcendi ad confutationem per particulas & per laudem adversarii. *At enim Vir Clarissimus Reip. - - - exquirere possumus veritatem. Item: Quid igitur agit Hortensius?*

Refutandi aliquem per instantiam & præjudicium. Vid. totum loc.

Recensere adversarii sententiam per quandam *μίσαν* & reprehensionem. *Quid igitur ait Hortensius? Obsolevit jam ista oratio &c.*

Connectendi membra per formulas: *quo mihi etiam indignius videtur &c.*

Ostendendi fiduciam causæ: *Qui si dubitant, tunc gravabuntur - - considerabunt.*

Transcendi à confutatione unius sententiæ ad alteram; *Reliquum est, ut de Questione Catuli, &c.*

Refutandi sub specie elogii: *Etenim talis est Vir - - virtute.*

Respondendi ad objectiones, ut alia probes, alia rejicias, quædam accipiendo quædam declinando: *qui cum ex vobis quaereret - - hominis vita atque virtute.*

Particulæ, quibus proponitur objectio. *At enim nihil novi fiat, cujus exempla.*

Respondendi ad objectionem per præteritionem, ut majus aliquid inferas. *Non*

dico hoc loco Majores nostros &c. usque hoc uno homine.

Formulae variandi capita narrationis: *quid tam prater consuetudinem, quam &c. quid vero tam inauditum, quam &c. quid tam inusitatum, quam &c. quid tam singulare, quam: quid tam incredibile, quam &c.*

Opinione adversariorum apud auditores adducere in invidiam:

Quare videant, ne sit periniquum, & non ferendum &c. parendum esse videatur.

Formulae comparandi attentionem in re gravi & magna. *Difficile est dictu &c.*

Respondere ad Objectionem per communicationem cum Adversario: *Libenter hac coram cum Catulo & Hortensio disputarem &c. Noverunt enim &c. venisse.*

Concludendi enthymema. *Quare nolite dubitare venisse gaudeant auctoritates auctoritatibus opponendi.*

Formula confirmandi aliquid auctoritatibus: *quodsi auctoritatibus hanc causam confirmandam putabis &c.*

Concludendi argumentum ab auctoritate desumptum adversus adversarii auctoritatem.

Quare videte, ut horum auctoritatibus - - videantur.

Concludendi orationem formulae.

Conclusio simplex & sine apparatu rōi

π α γ

παρὼν : quæ cum ita sint &c. usque ad finem.


In Conclusionē laudandī sententiā nobiscum consentientis. *Primam istam - - dubitemus.*

Hortari ut in illa sententiā nobiscum persistant consentientes. *Deinde te hortor - - dubitemus.*

Polliceri suam constantiam in sententiā tuenda: *Ego autem quicquid in me est studii - - defero.*

Integritatem atque innocentiam in sua sententiā declarare per obtestationem, juramentum, asseverationem: *Testorque omnes Deos, & eos maxime &c.*

Ostendere honestatem, amorem suum erga Remp. *quamobrem quicquid in hac causa &c. usque ad finem.*



PARS

PARS TERTIA.
DE
**IMITANDIS
AUCTORIBUS.**

CAP. I.
DE
**IMITATIONE IN GE-
NERE.**

§. I.

PROcedimus ad Imitationem, tertiam nostri operis partem, quæ in effectum deducit, quod in prioribus partibus per præceptiones traditum est. Scilicet non sufficit legere, non excerpere, nisi ad usum transferantur, & sylva ista ex auctoribus collecta in ædificiū cujusdam structuram conferatur.

§. 2.

Imitari itaque nihil aliud est, quam quod in picturis fieri solet, ideam alicujus rei proponere, quam ipsi nostro penicillo exprima-

primamus, & in varias partes tributam, ita componamus, ut succipiens aliquod opus quod archetypo respondeat, inde efformetur.

§. 3.

Quemadmodum itaque Pictores rem instituere solent, ut

(1) Ichnographiam corporis exhibeant, & summa lineamenta ducant.

(2) Plenioribus quibusdam coloribus rem exprimant.

(3) Lumen addant & umbras, ut ita ad vivum omnia represententur: ita & in oratione fieri debet.

I. Enim ducenda Ichnographia totius sermonis, quasi *σχέλον* alicujus corporis. Hæc dispositio est Oeconomia totius orationis, juxta inter se partium *συμμετρία* constantis. II. Hinc caro & sanguis addendus est, florens aliqua orationis copia, & III. denique color vivus, quod & figuris constat. Figuræ enim vivificant orationem, atque omnis ille apparatus qui præter Ichnographiam ad commendandam orationem facit, quo continentur etiam argumenta Ethica & pathetica subinde sermoni inspersa.

§. 4.

In omni itaque oratione propositiones & enthymemata corpus ipsum representant,

tant, quod corpus duci potest ad ductum & indolem alterius cuiusdam corporis in simili genere formati: ideoque qui scripturus est epistolam commendatitiam in certo negotio vel persona, consulat similem Epistolam Ciceronis, videatque quomodo ille partes epistolæ formet, quibus enthymematibus utatur, atque eadem methodo sua in epistola procedat, si par sit negotii & rei conditio; quod si non sit, ex ingenio suo addat, quæ convenire iudicabit. Hinc ad verba se conferat & formulas, & quæ ipse breviter, ille diffusius explicet, per synonyma, antitheta, distributiones, enumerationes partium, omnesque locos *περίστυξες*, quibus res aliqua vel factum amplificari solet: imo figuras addat, si res non detrectet, adagia, similia. Ita ad alienum exemplum corpus orationis formabit, quod pro suo plane venditare poterit.

Non itaque imitatio consistit in nuda atque inani verborum & sententiarum *converruminatione*, quomodo aliqui ex recentioribus scriptoribus imitationes suas instituerunt, quam ob causam se illi ridiculos aliis prudentioribus dederunt, præsertim Itali illi, *Bembus*, *Longolius*, *Sadoletus*, qui suo tempore Ciceroniani vocati fuerunt. Non immerito hos exagitarunt *Erasmus*, *Lipsius*, *Taubmannus*, alique, quod in
pue.

puerili imitatione subsistentes, vigorem sermonis latini non attingerent. Non est imitari, phrasas & sententias à Cicerone excerpere, atque ex illarum centonibus corpus orationis formare, cum nullus in tali orationi spiritus & vigor; ipsæ quoque phrasas & sententiæ ineptæ sunt, & vivificum illud lumen amittunt, non recto ordine & cum judicio collocatæ: ut, si quis vivi corporis membra amputata in novum aliquod corpus compingere velit, quomocunque compingat, non nisi cadaver conficiet.

Hanc imitationem cum damno: non tamen improbo Ciceronis phrasas & sententias, quasi illarum usus non præcipue in oratione sit admittendus: sed id volo, ut earum usus totius orationis corpori serviat: ut non primo loco sint, & potissimum in oratione respiciantur; ita ut velim orationem non aliam nisi periodis & sententiis Ciceronis contextam. Phrasium usus manere debet, atque iste nobis familiaris sit: sententiæ etiam retineri possunt, ita tamen institutæ, ut non serviliter verbis insistatur, sed alia phrasi æque Ciceroniana esteratur, quod sententiosum vel figuratum alibi Cicero habet. Miserum enim est easdem semper eantare formulas, & eadem chorda oberrare, quod pueri quidem & tyrones faciunt, ineptum

vero existimant illi, qui jam copiam aliquam sermonis sunt consequuti.

Quod ad verba attinet in oratione, totumque sermonem, non ratione materialium, sed ratione formalium consideratum, in his imitatio ita institui debet, ut non facile appareat, nos verba ex alieno sumisse. Si enim verba & sententias retineamus, statim de plagio aliquo suspicio est; neque hoc imitari sed furari est. Sensus vero & conceptus cum sint communes ita regi possunt artificio rhetorico, ut nemo facile nos convincat alicujus plagii. Facile enim conceptus, qui uni in mentem veniunt, alteri quoque in mentem venire possunt.

Variis itaque modis imitatio regi potest. Quod ut fiat: eo studiosius, inprimis disci debent omnes variandi formæ Grammaticæ, Dialecticæ, Rhetoricæ, quas satis diligenter in collegio nostro amplificatorio explicuimus. Quod subsidium ubi ab ipsa juventute institutum, in consuetudinem paulatim cedit: nihil erit postea facilius, quam sermonis alicujus variatio, & per variationem imitatio. Quia in re cum se assidue exercuisset *Manutius*, dum formulas *Ciceronis* alia subinde ratione efferret, factum est, ut nemo felicior in expressione *Cicerone* fuerit, ceteros enim omnes superat.

In

In subsidium itaque hic vocandæ sunt,
 (1) figuræ Grammaticæ, cum per synonyma, epitheta, antitheta, variasque constructiones, sententia aliqua variatur.
 (2) Loci omnes dialectici ad amplificandum idonei, in quibus præcipue sunt generis & speciei, sub quo continetur figura distributionis, translatio theses ad hypotesin, & vice versa, quando ab indefinito ad definitum, a confuso ad distinctum, procedimus. Locus totus & partium, sub quo continetur congeries, enumeratio partium, & plures aliæ. Mirifice enim amplificatur sententia per has figuras, quod Poetæ imprimis norunt. Locus adjunctorum, qui diffusus admodum est, & res ex affectionibus amplificat. Locus antecedentium & consequentium. Loci omnes, περιστατικοί circumstantiarum, quæ rem quocunque modo afficiunt. In his omnibus itaque cum iudicio versandum est, ne ineptiamus, aut ταυτολογεῖν videamur. Horum insigne exemplum præbebunt formulæ amplificatoriæ Baccii, quas recudi nunc facimus. (Recusæ sunt Kilonii in 8. titulus est, Baccii formulæ amplificatoriæ.)

Ut in conceptibus, sermone & verbis, quædam imitatio est: ita & in formalibus externis. Nimirum in periodica sermonis mensura, ideoque discemus, quo-

K

modo

modo dilatandæ sint periodi, quomodo contrahendæ. ita ex una periodo Ciceronis interdum tres quatuorve formari possunt: si una periodus plures potentia contineat. Continere autem judicabitur si simplici sententiæ propius accedat, & subjectis & prædicatis generalibus constet, quæ diffundi in partes possint: ita brevior periodus quoque in longiorem diffundi potest: si subjecta & prædicata multiplicentur, circumstantiæ adjuncta addantur. Quæ omnia non possunt melius, quam ipso exercitio addisci. Usus enim hic optimus Magister est.

CAP. II.

DE

IMITATIONE EPISTOLARI.

§. I.

Epistola in Orationum generibus ut simplicius, ita primum locum obtinet. adeoque in exprimenda imitatione hac unice nobis præfigendus est *Cicero*, qui omnia Epistolarum genera in libris suis habet, & ea dictione exprimit epistolam, quæ archetypi instar esse possit. Dictionis puris-

purissima, periodus apta, enthymemata ad rem pertinentia, formulæ elegantes. Quibus omnibus nemo ipsum superat: ideoque in omni epistolæ parte ad imitationem proponi debet.

Quando itaque imitationem epistolarem suscipiemus: seligamus nobis epistolas illas, quas secundum omnium causarum genera cum responsoriis suis collegit *Melchior Junius*. In singulis attendamus (1) *Enthymemata*, videamusque, si in simili argumento scripturi sumus, an *Enthymemata* ista nostro loco convenient. Si plura possint adhiberi: suppeditabit ille idem *Melchior Junius*, in utilissimo suo libello cui titulus: *Schola Rhetoricæ de contexendis epistolis*, ubi ille sub singulis generibus petitoriarum, adhortatoriarum, consolatoriarum, &c. colligit, non partes solum, sed enthymemata, in hoc vel illo argumento a *Cicerone* usurpata, unde pro lubitu excerpere, quæ in rem suam erunt, eloquentiæ cultor. Si enim in illa epistola, quam sibi imitandam proponit, non inveniuntur enthymemata omnia sibi commoda: supplere ex aliis poterit: ita tamen, ut non verba, sed rem ipsam sectetur. In Tyronibus alia res est, qui & verba primum retinere possunt, ut stylo Ciceroniano adsuescant. (2) Formulas quibus continentur argumenta Ethica &

pathetica tum in exordio, tum in fine epistolæ occurrentia, illas vel iisdem argumentis retentis amplificabimus, vel novis quibusdam exornabimus: quæ alibi in similis generis epistolis usurpat *Cicero*, quæ investigare poterimus in *Melch. Junii Scholis rhetoricis* vel in *formulis Starckii*. (3) sunt verba & phrasæ, quibus nobis abstinendum est: ne transcribere videamur, ideoque plane alia verba usurpabimus & phrasæ, enunciationes breviores amplificabimus, periodos quoque in partes tribuemus, & ex illis partibus novas periodos conficiemus. Quæ illic simplicia sunt, nos per translata explicabimus, vel adagio aliquo ornabimus, aut simili illustrabimus, & vice versa, quæ illic translata sunt, nos simpliciter efferemus.

Ut exemplis clariora omnia sint, sumemus aliquam *Ciceronis* epistolam, & ad ejus imitationem aliam conficiamus. Quod si itaque consolatoriam scripturi sumus ad aliquem in adversa fortuna atque exilio viventem, proponamus nobis epistolam 17. 18. L. V. ad fam. ubi *Cicero* consolatur *Fabium*, sententia iniqua judicis damnatum & exulem. Hic exordium breve statim significationem doloris ostendit, & hoc argumento *Ethico* sibi *Fabium* conciliat, quod benevolentiam etiam misero exhibere velit. Quo exordio simul invol-

virur propositio brevis. Sequuntur enthymemata, tum communia, tum specialia. Communia petit è loco generis, è loco *περισπῆκῳ*, temporis in Republica & conditionis status publici. Specialia è loco speciali comparato, qui inter Aristotelicos est, *quod plura bona meliora sint bonis paucioribus*, quod hic conversum est: *quod pauciora & leviora mala meliora sint, pluribus & majoribus malis*; cui adjungit conversationem, quæ malum lenire possit, quod itidem inter bona est cum malis comparata. E loco inartificiali, testimonio scilicet & auctoritate Judicum, quæ cum brevissime & paucis verbis apud Ciceronem innuantur, in majus singula dilatari possunt. Conclusio brevis iterum *ἡθὺς* benevolentia & officii ostendit. Imitaberis vero in simili argumento hoc modo:

Si quis unquam ex amicorum calamitatibus doloris mihi sensus fuit, est sane maximus, quem ex incommodo tuo, quod à pessimorum hominum insidiis tibi illatum est, persentisco. Quare cum hoc malo te quasi subito fulmine consternatum existimarem: mearum esse partium duxi, ut vel literis meis erigerem animum tuum, vel si possem, re ipsa juvarem. Et si ipse eo loco sum, ut aliorum potius indigere consolatione videar, quem imi-

corum suorum casus æque ut sui affligunt. Verum ut virtutis & sapientiæ præsidia in omnibus calamitatibus robur animo meo subjecerunt: ita tu quoque nunc locum illis relinques, & ad hæc fortunæ tela Achillem quasi *πάνοπλον* ostendes, vel *Antei* instar e casu ipso novas vires resumes.

Huc usque Exordium, quod cum in *Ciceronis* Epistola unica periodo continetur, hic in quatuor diffusum est. In quot enim sententias illud resolvi potest, in tot periodos mutato etiam sententiarum ordine hoc convertitur. Prima sententia est; *ipse consolandus sum*, quæ hic in tertiam periodum rejicitur. Secunda: *gravissime tui incommodum tuum*, quæ hic incipit Exordium per figuram translationis theseos ad hypothesin. Tertia sententia est: *Ego te consolari cupio*, quæ secundam facit periodum, adjectis Metaphoris, & Synonymis Phrasæologicis. Quarta sententia est: *virum te præbeas*, quæ quarta periodo diffunditur, omis- sis enthymemaribus communibus, quæ *Cicero* in exordio involvit. Ornatus gratia additur imago *Achillis* & *Antei*.

Confirmatio. Quid enim est, quod te an- gere magnopere possit, qui meminisse po- tes & sane debes, hominem te esse natum, eaque conditione vivere, ut fortunæ vi- cissitudines, quas in hac vita sustinemus, subterfugere non possis. Imo si rem recte
putare

putare velis, non est quod fortunæ magnopere succenseas, quæ plura in te bona largissima manu cumulavit, ut leviori hoc malo illorum redimere invidiam posse videaris. Cum enim plerumque aliorum exemplo vel felices nos faciamus vel infelices (nam felicitate illa, quam animo suo possidet sapiens, nemo est contentus) ab utraque parte ejusdem vitæ fortunæque hominem circumspice, & te præ cæteris commodis illis ornatum videbis, qualia ne votis quidem suis homines tibi similes promittere sibi potuerunt. Florent illa virtutum tuarum præmia, & ita quidem florent, ut fructus earum nulla tibi invidia eripiat, nulla temporum calamitas intervertat. Hac itaque parte securus, si jacturam bonorum tuorum cumulo appenderis, ut illa te supra omnes constitutum, ita hac omnibus te inferiorem deprehendes. Percense enim modo animo, quot quantæque strages nobilissimorum hominum in Republica fuerint, quam illi vita, fama, salute, fortunis omnibus everfi, ne minimam quidem, si vita ipsis salva est, spem sibi reliquam sentiant. Rempublicam ipsam vide, nihil est profecto in illa, quod tenere bonos homines cuique similes possit, omnia flagitiis & sceleribus sunt oppressa, animam agit libertas, judicia & leges corrumpuntur, ipsa denique salus morientem civitatem

tem conservare non potest. Quid ergo est, quod te hic teneat? An quod cadaveri ejus velles immori, & communi cum vectoribus ejusdem navis perire naufragio? Itaque felicem te voco, qui ex hominum illorum consortio abis, non tam ab ipsis relegatus, quam ipsos à te, quod Diogenes faciebat, relegans. Vivere itaque tibi potes, & ad te bonamque mentem redire, postquam ab illis discesseris. venies & ad nos tui amantissimos, omnibusque officiis, omni necessitudine conjunctos: quorum domibus, amplexibus, animis, gratissimus hospes excipieris, quorum quotidiana colloquia facile omnem, quam animo concepisti, agritudinem, tibi abstergent. Denique & in hac calamitate te possunt honesta hominum solari judicia, qui injuriam tibi factam norunt non solum, sed & suis sententiis damnarunt. Ne quid de iis dicam, quæ solam potentioris tui hostis auctoritatem secuti, eam, quam ore protulerunt, sententiam, toto animo & pectore execrantur, eam publice, contrariaque sententia damnaturi, si, quod vere sentiunt, impune etiam in judicio efferre possent. Ne te itaque vel relinquere alios, vel desertum ab amicis putes, quorum ut aliqui clam tibi favent, ita multi palam tuas partes sequuntur. Me habebis, quem semper habuisti,

buiſti, omni officio, opera, tuum, qui te ſemper & obſervat & colit & diligit. Vale.

Quilibet hic & exordii imitatione & collatione ipſius epistolæ Ciceronis animadvertet, quam ſingula enthymemata, quæ aliquot verbis vel ſententiis apud Ciceronem continentur, integras hic periodos conſtituant, quam metaphoris, allegoriis & exemplis exornentur; & talis imitandi ratio omnium eſt optima, cum vigorem rerum attendimus, nec verbis tantum in hæremus, quæ rem præviſam facile ſequuntur, modo copia illorum è probatis auctoribus in promptu ſit.

CAP. III.

DE

DE IMITATIONE ORATORIA.

§. I.

Imitationis Oratoriæ non eſt alia ratio, quam epistolæ. non enim differt oratio ab epistola niſi ſola brevitate. Epistola eaſdem quoque partes habet, plerumque tamen pauciores, ut oratio quoque

K §

in-

interdum plures, interdum pauciores habet partes.

§. 2.

Id tamen singulare in oratione est, quod (1) periodo sit diffusior, (2) enthymematibus ordinatior, quæ in epistolis nonnunquam tumultuaria sunt (3) & in amplificationibus & figuris ornatior, quas si abstuleris orationi, exsangue corpus restare videbitur.

§. 3.

In omni itaque oratione primum spectanda sunt, quæ ad œconomiam illius & τὸ σῶμα τῆς πρὸς αὐτὴν spectant. Illud continetur propositione & enthymematibus. Quare ubi in argumento versatus fueris, quod simile videbitur tali, quod Cicero tractavit: videbis an enthymemata ex Ciceronis oratione tuis applicare possis. Si ve itaque in loco communi, si ve in hypothesis tua versetur oratio: vel ex primaria orationis alicujus propositione, vel ex secundariis & assumtis, quæ in rem tuam sunt, petere poteris.

§. 4.

Secundo notanda est in oratione consecutio partium & membrorum, connexiones,

nes, formulæ majores & minores. In his imitandis omnis ponenda est industria, & variatio præcipue tentanda, ne chorda eadem oberrare videamur. In singulis partibus attendenda est ordinatio periodorum; eæ expendendæ secundum quantitatem & terminationes, copiam vel paucitatem.

§. 5.

Tertio spectanda est in oratione *ἐξορῆς* seu ornatus, diligenterque notandum, quid (1) in Verbis (2) in sententiis amplificanti- (3) in argumentis ethicis & patheticis. (4) in figuris eximium sit. In singulis his partibus multa sane occurrunt & notatu & imitatione digna. Nam quod ad verba attinet, notari hic possunt voces & phrasæ singulares metaphoricæ, illustria Synonyma, epitheta, antitheta. Ad sententias pertinent enunciationes è variis locis amplificatæ, quas in promptu habere debemus, ut simili in casu ad hæc exempla nostram quoque rem instituamus.

§. 6.

Argumenta ethica & pathetica vel suis enthymematibus subjici possunt, si τὰ ἐνθυμηματικὸν præcipue in oratione spectes; ideoque ad integram orationis œconomiam illa referri possunt, vel scorsim possunt
inter

inter ornamenta considerari, quatenus hos vel illos mores, hunc vel illum affectum exprimunt. Atque tum locum inveniunt in codice morum & affectuum. Figuræ quoque vel junctim vel seorsim considerari possunt. Junctim scilicet, quatenus illæ certis argumentis subserviunt (sunt enim Enthymematum quasi quidam stimuli) vel seorsim considerabuntur, si illa separatim certo aliquo libro collegeris pro commodiore & faciliore usu: subjecti tamen, si fieri possit, causis quare in loco illo usurpatæ sint, aut quibus enthymematibus, quo in affectu subjectæ. Neque est quod opineris, multiplicari hac ratione labores. imo vero facilitantur illi, si consideraveris argumentum aliquod in omnes partes esse versandum, quod tractaturus es, ut objectum aliquod corpus ad varios situs & positus exigendum, quod penicillo expressurus es.

§. 7.

Ubi singula hæc in oratione consideraveris: eandem tibi ideam simili in argumento ob oculos pone, & è schedis & collectaneis tuis in aliquod corpus orationis efforma, ut Architecti facere solent: qui palatium aliquod vel ædes exstructuri, sylvam habent variarum formarum, quibus pala-

palatia exstructa sunt: deinde in omnium partium *suppetia* laborant, varia genera columnarum, ornamentorum, quibus conclavia, fastigia, parietes elaborari solent, singularibus libris collecta habent: quæ ubi tanquam exemplum aliquod inveniuntur, ædificium pro commoditate loci animo concipiunt: & postquam omnia accurate dimensi fuerint, exstruunt.

§. 8.

Nos, ut eo clarius pateat res, ipsa, exemplum ex oratione Ciceronis pro Lege Manilia dabimus.

§. 9.

Oratio hæc versatur partim in genere deliberativo, partim in demonstrativo: vel si genus deliberativum solum velis, demonstrativum quasi assumtum erit. Potest enim unum thema interdum ex alio genere caussarum argumenta assumere. Quæstio itaque hujus orationis est: „An bellum Asiaticum sit gerendum contra duos „Reges Tigranem & Mithridatem, & an belli istius Imperator constituendus sit Pompejus. Duæ itaque propositionis partes sunt, prima, bellum Asiaticum est gerendum: secundum, belli hujus Imperator constituendus est Pompejus. Vel etiam

etiam quæstio simplex constituti potest, utrum Pompejus ad bellum Asiaticum Imperator sit deligendus. Affirmationem Cicero probat duplici generali Enthymemate, quorum primum hoc est: Belli hujus Asiatici tanta est partim necessitas, partim magnitudo, ut præstantissimum Imperatorem sibi deposcat. Ergo Pompejus &c. Antecedentis duo membra separatim tractantur. Enthymema II. generale; Pompejus reliquis Imperatoribus omnibus excellit. E. His specialia deinde Enthymemata subjunguntur. Potest enim tota hæc oratio uni syllogismo perfectæ includi. Si tanta est hujus Asiatici belli partim necessitas, partim magnitudo, ut præstantissimum Imperatorem sibi deposcat, Pompejus Imperator est eligendus. Atqui, Ergo. Majoris connexio probatur hoc Prosyllogismo. Pompejus enim reliquis antecellit.

Tria vero sunt Enthymemata hujus orationis generalia.

1. Bellum hoc est vehementer necessarium.
2. Valde periculosum.
3. *Cnejus Pompejus* reliquis Imperatoribus unus excellit.

Hæc unico possunt includi Syllogismo: Si bellum hoc contra Mithridatem est ita necessarium, itaque periculosum, ut præstan-

stantissimum Imperatorem sibi deposcat; *Cnejus* autem *Pompejus* talis est Imperator: is, omnino præ cæteris huic bello est præficiendus. Atqui, E. Inna pars propositionis, quod bellum Asiaticum sit gerendum, confirmatur enthymematibus, peritis à *neccessario*. Hic vero locus speciatim apud *Aristotelem* non occurrit, nisi velimus ex loco *bonorum confessorum*, & ex loco communi *de difficili*, enthymemata illa repetere: proprie tamen distinctus est à cæteris *neccessarii* conceptus. *Neccessarium* enim est illud, quod debet fieri, & quod adeo non est in potestate nostra, utrum facere velimus, an omittere. Quare in collegio nostro oratorio locum *Neccessarii* à reliquis sejunximus, & si inter locos communes retulimus. Cum enim inter locos communes sit illud, quod potest fieri, illud quod factum è, illud quod futurum est, cur non etiam illud, quod debet fieri, eò referatur? Quare si axiomata, quæ illic reperiuntur præsentī instituto applicemus: videbimus ex quo proprio enthymemata illa deducenda. Spectat enim huc locus communis *de Magno*. id enim *Cicero* hic agit, ut demonstret, non solum *neccessarium* esse bellum, sed & magnum & grave. Verum nec hujus loci canones separatim posuit *Aristoteles*, verum ad locos comparatos de bono & malo nos remittit. *Enthymema* *primarium*, quo *Cicero*

uti-

utitur, hoc est: In bello Asiatico agitur gloria populi Romani, agitur salus civium, sociorum, aguntur vestigalia maxima, aguntur fortunæ multorum civium. E. bellum Asiaticum grave est & necessarium. Antecedens quot partes habet, tot novos quasi habet prosyllogismos & enthymemata, sibi subordinata, quæ tamen omnia petita sunt ex illo canone; *necessitas extrema est defendere res suas, patriam, amicos, bona quibus sustentamur &c.* Si locum Aristotelis de bonis confessis respexeris: ad hos canones hæc enthymemata retuleris: *quo presente bene se habet, vel, quo absente res male se habet &c.* Locis Boni comparati: *quo privari magnum malum est.* Verum hæc, uti dixi, indirectè huc referuntur.

§. 10.

Huic generali enthymemati subordinantur enthymemata specialia, ut, *in bello asiatico agitur gloria populi R. E. illud grave est & necessarium.* Conclusio interdum omittitur & subintelligitur, interdum per figuram aliquam subiungitur: probatur iterum antecedens à contrario, quia summum est dedecus populi Romani, non ulcisci bello Regem Mithridatem. Huic subiunguntur argumenta amplificantia, quod vel Mithridates nunquam superatus se hostibus Romano-

manorum associaverit. 2 à comparatione minorum. Populus Romanus minores injurias vehementibus ulius est, E. majores impunitas non poterit dimittere. Est vero secundum Aristotelem comm. 2 Cap. 14. l. 1. injuria major, quæ majus damnum dedit, cui jungi potest comm. 7. & octavum. Magnum est, quod quis solus, aut primus, aut non multorum exemplo admisit, magnum etiam est, in eadem re sæpe peccare, ideoque majorem injuriam commisit *Mitbridates*, qui primus id admisit quod non multi, & qui sæpius peccavit, cum in socios id criminis admisit, unde ex majori injuria crescit dedecus populi Romani. Hoc Enthymema elegantibus anthithetis illustratur. habet enim figura illa, quæ anthiteton dicitur, præcipue suum in tali argumento locum. Concludit argumento pathetico, quo pudorem illis incurit. vid. Comma secundum Lib. 2. Cap. 6. Rhet.

Ex hoc speciali argumento ille locus communis resultat, gloriam Majorum à posteris esse continuandam. Referatur itaque in codicem Thesium: *Gloria populi omnibus rebus præferenda est.*

Secunda pars Antecedentis hoc proponitur enthymemate: In hoc bello agitur, salus sociorum. E. hoc bellum persequi debemus. Antecedens probatur enumeratione sociorum, qui periclitantur. Pro-

L

po-

ponitur historia bellorum priorum & immiscetur simul per figuras aliquas orationi laus *Pompeji*. Incipit ab illis verbis: *Quid quod salus sociorum &c.* Figura quædam sermocinatonis est, cum ait: *hi vos tacite rogant, ut se quoque &c.* Subjungit amplificationis gratia argumentationem ab exemplo; quo concludit hoc ethymema speciale his verbis: *Quare, si propter socios &c.*

Locus hic communis notari potest, de sociis defendendis:

Tertium enthymema speciale hoc est: in hoc bello aguntur vectigalia maxima *E.* bellum Asiaticum &c. Antecedens probatur (1) a comparatione Asiæ cum reliquis provinciis. (2) Ex descriptione fertilitatis & proventuum Asiæ (3) ex loco effectorum contrariorum, damnorum scilicet, quæ consequuntur metum calamitatis. Graphice omnia depinguntur, & quasi per *ὑποτυπωσιν* ob oculos ponuntur. Initium est in illis verbis; *praesertim cum de vestris vectigalibus &c.* Conclusio hujus enthymematis per interrogationem formatur. *Potatisne vos iis rebus frui posse &c.* Locus Communis hic notetur. *Vectigalia publica bene custodienda & defendenda.*

Quartum Enthymema speciale est: In hoc bello aguntur fortunæ multorum civium. Transitus fit per formulam expressam transitionis: *Ac ne illud quidem vobis*

vobis negligendum est. Probatur Antecedens, quod multi cives Romani vectigalia conduxerint, atque illic negotientur, quibus nisi consulatur, totam rempublicam perire, necesse sit. Concludit primum hoc enthymema, quod tot specialia continet, collectione & ἀνακε-
 „Φαλαίσσει singulorum his verbis: Quare
 „videte, num omni studio &c. Locus com-
 „munis notari hic potest. *De civium com-
 meritiis & fortunis non turbandis vel defenden-
 dis.*

Tum procedit Cicero ad secundum caput propositionis, quod bellum hoc sit magnitudine periculosum. Enthymema vero ita sonat. Bellum Asiaticum & magnum est & periculosum Reipublicæ Romanæ, E. omni studio bellum gerendum est. Antecedens probat ex historia huius belli & è circumstantiis. Hoc bellum conjungunt duo Reges potentissimi, suscipiunt agitatae nationes, victo Lucullo & expulso vetere exercitu. E. bellum Asiaticum est magnitudine periculosum. Antecedens huius subordinati enthymematis explicatur per narrationem fusam: figuræ occurrunt: prolepsis, quod *Lucius Lucullus Mithridatem* vicerit, cui respondet eleganti comparatione *Mithridatis cum Medea*, quodque *Mithridates* ex ipsis ruinis suis plus augmenti acceperit, ut *Lucium*

Lucillum etiam prælio fugaret, cujus enarratione eleganti præteritionis formulâ utitur his verbis: Simile hoc loco Quirites, præterire etiam nostram calamitatem &c. Conclusio hujus enthymematis itidem fit per Figuram præteritionis. *Multa prætereo consulto &c.*

§. 15.

Loci communes hic possunt plures notari (1) Conjunctio multorum hostium periculosa est Reipublicæ (2) Hostis potentior non remisse debellandus est, ut qui ex clade accepta nova incrementa sumit (3) Noxium est Reipublicæ, victoriæ non insistere.

§. 16.

Procedit jam ad tertium caput propositionis Cicero, quod scilicet *Pompejus* Imperator huic bello sit præficiendus, idque per ordinariam transitionem. Satis mihi multa verba fecisse videor. Enthymema, quo probat Cicero *Pompejum* esse Imperatorem deligendum, hoc est. In Pompejo 4 illa sunt 1. Scientia rei militaris. 2. Virtus 3. Auctoritas. 4. Felicitas E. *Cn. Pompejus* est bonus Imperator. Hoc generale Enthymema, quod primum ita collectum exhibet Cicero, postea discerpit in partes, &

& è singulis antecedentis partibus, singula facit enthymemata.

Prima pars itaque scientia rei militaris prolixè describitur per enumerationem ætatis ac bellorum *Cnei Pompeji*. Incipit his verbis:

Quis igitur hoc homine aut scientior unquam fuit, aut esse debuit? Crebræ hic reperiuntur anthitheses & repetitiones.

Secunda pars antecedentis, scilicet Virtus militaris probatur rebus gestis Pompeji per distributionem, testimoniis provinciarum confirmatur, amplificatur adjunctis bellorum. Tota hic oratio ampla est & circumducta per varios locos *περιστρίξας*.

Virtus militaris amplificatur per *μερισμὸν*
 1. enim laudat innocentiam Pompeji, & amplificat ex loco comparatorum. Comparat enim ejus virtutes cum vitiis Imperatorum oppositis, ut innocentiam ejus cum cœterorum Imperatorum avaritia. Laudat,
 2. ejus temperantiam, quam amplificat ex loco Effectorum. è celeritate enim belli confecti argumentatur de ejus temperantia.
 3. Cœteras ejus virtutes quasi per præteritionem & complexionem recenset. Sequitur complexio hujus enthymematis, huic belli directionem esse committendam per figuram interrogationis.

§. 17.

Tertia pars antecedentis hæc est. *In Cn. Pompeja est Auctoritas. E. ille huic bello præsiciendus.*

Auctoritas *Cn. Pompeji* probatur multis argumentis:

1. Ex generali fama & omnium hominum opinione.

2. A speciali historia imminutæ per adventum ipsius annonæ, hostium retardatione, urbium, quæ ab ipso deditionem petierint. Enthymema hoc ex Aristotelis locis deducitur, *quod hostes nostri laudant.* Concludit hanc partem Enthymematis iterum per interrogationem. *Et quisquam dubitabit?* &c. Et tandem ultimo ita infert. *Potestis igitur jam constituere, Quirites, hanc auctoritatem.*

§. 18.

Ex his Enthymematibus inter Locos Communes referatur.

1. *Virtutes Imperatoris innocentia, temperantia, celeritas in consuecundo bello.*

2. *Auctoritas Imperatoris apud suos & hostes quantum valeat.*

§. 19.

Antecedentis 4ta pars hoc Enthymemate

mate concluditur: *Pompejus* magna felicitate præditus est, E. Imperator est eligendus.

Transitio aperta est: *reliquum est, ut de felicitate &c.* Antecedens hujus Enthymematis amplificetur per comparisonem cum fortuna aliorum Imperatorum, insinuatursimul ἡ 9ος Oratoris, ne arrogantius de se ipso videatur dicere, ea modestia invidiam declinans, & pietatem suam declarans. Adjicit complexionem cum ἀνακεφαλαιώσει, qua omnia argumenta pro eligendo hoc Imperatore brevissime repetantur. Adjicit præterea ad hanc complexionem aliud argumentum ab opportunitate rerum, loci, & temporum desumptum. Pompejus etiam in illa opportunitate positus, ut possit bellum hoc gerere E. ipsi committendum est, ad quod gerendum vel privatus esset designandus.

§. 20.

Inter Locos Communes referatur: *Imperatorem felicitate & fortuna ad res gerendas debere esse instructum.*

§. 21.

Post tria hæc propositionis capita subjicit Cicero confutationem contrariæ senten-

rentiæ adversus Quirites, *Catulum* & *Q. Hortensium*: quorum hic negabat omnia uni tribuenda: ille *Pompejum* ad bella mittendum negabat. 1. Quoniam ipso nitebatur tota spes populi Romani. 2. Quia sine exemplo fieret ut ad unum omnia deferrentur. Quod ad *Q. Hortensium* attinet, primum in genere ita refutat adversarios, ut accipiant utilia, quæ ipsi fateantur, nimirum bellum hoc grave esse & periculosum, & *Cn. Pompejum* magnum esse Imperatorem; ideoque & laudat eorum prudentiam & sapientiam, quo illos quasi demulcet, ne amplius obstant.

§ 22.

Hortensium refutat, qui negabat, uni omnia tribuenda, ex loco inartificiali, præjudicio scilicet *Caji Gabinii*, qui de eodem Imperatore adversus prædones constituendo legem promulgaverat, adversus eandem *Hortensii* sententiam. Proponit hoc argumentum omni ornatu oratorio; amplificat ex loco contrariorum, quod factum fuisset, si lex *Gabinia* non obtinuisset, & potius *Hortensii* sententia valuisset. Addit graphicam descriptionem miseriæ istorum temporum. Amplificat porro istas clades comparatione è loco majorum & parium: omnes populi potue-

tuerunt securos præstare portus suos: Romani ante legem Gabiniam non potuerunt
 2. Populus Romanos olim eos in obsequio tenere potuit, qui mari universo imperitabant. Ante legem vero Gabiniam par prædonibus esse non potuit.

§. 23.

Locus communis notetur de summa rerum ad unum deferenda. Subnectit huic loco digressionem de Aulo Gabinio, quod non missus fuerat *Cn. Pompejo* Legatus, cuius rei absurditatem aliis exemplis refutat, suadetque, etiam nunc illum comitem dandum *Pompejo*.

§. 24.

Ad *Q. Catuli* sententiam respondet, quæ hæc erat: 1. *Cn. Pompejo* niti totam spem populi Romani, ideoque non mittendum: 2. Esse contra exempla Majorum, ut ad unum omnia deferrentur. Ad 1. Respondet, accipiendo confessionem *Catuli*, quod in *Pompejo* omnis spes Romana posita sit. 2. Quod homine uti debeamus, dum floret fortuna & vita.

Ad secundum respondet, rebus & eventibus accommodanda esse consilia, quoties novi quid acciderit in Republica, toties novis & extraordinariis re-

mediis prospiciendum esse : Probat hoc exemplis : 1 Aliorum. 2 Ipsius Pompeji, in quo tot nova jam tum statuta sint. Elegantes figuræ passim insperguntur, subjectionis, ut quæ ad contentionem facit, per figuram repetitionis exempla allegat.

§. 25.

Generatim refutat adversarios, ac simul metum terroremq; illis iucutit, appellando ad iudicium populi; quod ipsis Sacro sanctum esse debeat. Loci communes hic notentur: *in rebus periculosis & novis extraordinaria sæpè capienda consilia.* Item: *Viri vnius auctoritas in bello efficaciter gerendo plus prodest, quam multorum consilia.*

§. 26.

Huic confutationi subjungit quasi per repetitionem alia quædam argumenta, quæ jam tum supra in medium produxerat; mittendum scilicet esse in Asiam Pompejum ob singularem ejus continentiam, amorem Asiaticorum erga illum & odium erga alios, quorum avaritiam graphice describit. Subjungit figuram communicationis, qua ipsis adversariis hanc rem expendendam relinquit.

§. 28.

Concludit tandem hanc refutationem
Apo-

Apostrophe ad populum, quem adhortatur, ut reclamante etiam *Catulo & Hortensio*, uni Pompejo omnia deferant. Et quoniam populus auctoritatibus regitur, duobus illis tot aliorum clarissimorum senatorum opponit sententias. Locus communis elegans hic *de continentia & innocentia Imperatoris*. quod avari Imperatores populi animos à se abalienent, neque feliciter rem gerere possint.

§. 28.

His omnibus tandem subjicitur Peroratio ad *Manilium* concepta, qua ipsum hortatur, ut in sententia sua permaneat, legemque ejus laudat. pollicetur dehinc operam suam pro *lege Manilia*, ita ut argumenta ethica passim inspergat, ostendendo amorem suum erga Rempublicam animique constantiam adversus invidiam. Brevis est illa, & quoniam in contentione validioribus argumentis pugnavit, in fine orationis leniter rem agendam esse existimavit.

§. 29.

Atque hæc nobis notanda visa fuere ex oratione *pro Lege Manilia*. quæ si quis imitando in suum usum convertere velit: argumentum totius orationis consideret, in quo

quo versetur. illi simile aliquod excogitandum est, ut si apud *Ciceronem* thesis est de bello Asiatico decernendo & Imperatore ipsi constituendo Pompeja: simili ratione aliud Thema instituamus. exempli gratia. De bello adversus Turcas continuando, & quis ipse Imperator sit. constituendus. Enthymemata pene eadem hic possunt adhiberi, mutatis tamen iis circumstantiis, quæ necessario mutandæ sunt, ex historia ipsius belli. Atque ita totius orationis argumentum imitando exprimere possimus. Possunt etiam imitationes per partes institui, ut, si altera orationis hujus pars, quæ hoc est; de Imperatore eligendo, applicetur ad Thema aliquod de Præside, de Magistratu, de Episcopo, de Rege &c. eligendo. Ac si nolis forma illa rem proponere: potest vel sub gratiarum actionis, vel sub gratulationis, vel sub cujuscunque encomiastici forma talis laudatio institui. Laudatur hic Imperator Pompejus à quatuor virtutibus primariis, ita ut demonstretur, summum illum & excellentissimum esse; laudabis itaque Tu Regem vel Magistratum, virum doctum & alium quemcunque non iisdem sed aliis virtutibus, iisdem figuris, eodem tenore argumentorum, iisdem formulis retentis, sed mutato verborum habitu. Nam si verba ipsa

retineamus: puerilis erit, non viro digna imitatio. Similiter prima orationis pars, quæ agit de bello gerendo, applicari potest ad rem quamcunque aliam, quæ cadere in deliberationem potest, ad quam suadendam adhiberi debeat argumentum extremæ necessitatis. Hoc enim præcipue hic utitur Cicero, & hoc per varias rerum & factorum circumstantias amplificat. Sic plane in contrariam thesin vertere poteris, pacem esse faciendam cum Turca. ut hoc conficias: urgebis periculum machinationum Gallicarum, unde ex Historia plurima excerpere poteris, quæ amplificare poterunt periculum belli intestini, enumeratis omnibus circumstantiis. Valebunt itaque hic omnia argumenta, quod agatur. (1) Gloria Germani nominis (2) Quod Socii eripiendi sint è periculis. (3) Quod vectigalia detrimentum capiant. (4) Quod fortunæ tot civium, & tot Imperii statuum agentur. Minores quædam orationis hujus partes, ut cum agitur de auctoritate, de felicitate Imperatoris, illæ mutatis mutandis ad virtutes & excellentiam viri docti, pii Ecclesiastæ, boni præfecti, & cæterorum applicari possunt. Quatuor enim illæ virtutes, scientia, Virtus, autoritas, & felicitas ad quemcunque Virum insignem, qui in munere publico vivit, & judiciali auctoritate

te pollet, transferi possunt. Theoriam enim & praxin, quæ duo omnia absolvunt, *proponunt.*

CAP. VI.

DE

IMITATIONE POËTICA.

§. I.

Non sunt aliæ Poëticæ Imitationis leges, quam oratoriæ, modo genium dictionis observes, omniaque illa, quibus ab oratoria illa discrepat, neque sunt frequentiora imitationis exempla, quam apud ipsos Poëtas veteres: in quibus alter alterum pressò pede imitatur. Quemadmodum scilicet Cicero ex Demosthenis orationibus in suum usum vertit, tum figuras, tum formulas, tum ipsa enthymemata, ut conferenti patebit: Ita veteres latini Poëtæ, græcos imitati sunt, quod in Virgilio, Horatio aliisque patet. Et Virgilius quidem adco pressè Græcos imitatus est,

est, ut nonnunquam integros versus è græcis in latinum converterit, ex Ennio quoque sæpe retinuerit. Nam qui ante se fuerunt, latinos Poëtas, Virgilius imitatus est, ut Virgilium imitati sunt posteriores. Imitationes ipsius è Græcis diligenter factis notavit *Fulvius Ursinus*, & *Valentinus Grellius* Commentario in Virgilii opera, quæ loca diligenter notanda sunt, cum imitationis artificium singulari ratione ob oculos ponant. Reperiuntur apud illum vestigia Homeri, Hesiodi, Theocriti; è cujus Idylliis Eclogas suas expressit, quas imitationes nemo luculentius ostendit, quam *Rapinus* in dissertatione de carmine pastoralis: ubi Theocriti Idyllia passim cum eclogis Virgilianis confert, ostenditque quibus ille vincat, quibus vincatur. In universum tamen omnia illa, quæ apud Virgilium transsumta sunt, vivis magis coloribus ac majori ingenio & judicio sunt expressa, quam apud auctores ipsos, quorum *πρωτότυπον* usus est, ut longo post se intervallo illos relinquat. Quod in Homericis fragmentis ita manifestum est; ut nemo, cui sanum modo sinciput est, negaturus sit. Si quis ea de re dubitet: hypercriticum *Julianum Casarem Scaligerum* adeat, ubi tot ejus rei exempla proponuntur, ut veritas per se pateat.

§. 2.

Imitationes poëticæ iisdem Locis dialecticis constant, quibus imitationes oratoriae. Nam quod simpliciter alibi dicitur, alibi fusius ampliatur ex locis illis, atque ita sermo instituitur, ut vix dijudicare possis, an imitatione, an verum inventione propria, carmen hoc scriptum sit. Notissimi & celebratissimi modi sunt.

- (1) Quando enunciationem generalem per *μερισμον* in multas speciales commuto, mutatis & multiplicatis subjectis & prædicatis. (2) Quando sententia aliqua, totum aliquod comprehendens, per enumerationem partium amplificatur. (3) Quando sententia confusa & obscura, ratione temporum, locorum, personarum, factorum, causarum, circumstantiarum, per alias clariores sententias explicatur. (4) Quando indefinita sententia per definitam explicatur. (5) Quando sententia per antecedentia & consequentia amplificatur. (6) Quando sententia per Adjuncta amplificatur. (7) Quando circumstantiæ temporis, modi, causarum, personarum adjiciuntur. (8) Quando enunciatio simplex per figuras rhetoricas effertur. (9) Quando una enunciatio, quæ potestate mul-

multiplex est, in plures periodos vel enumerationes, multiplicatis subjectis & prædicatis convertitur.

§. 2.

Et hi pene modi sunt, quibus imitatio Poëtica constat, ut vel sexcentis exemplis probari potest. Illustriora sunt, quæ ex ipsis vetustis Poëtis desumuntur, exempla, & hæc inter præcipuum, quod sup-
peditat nobis Horatius Epodâ 2. quæ agit de laudibus vitæ rusticæ, qua Locum communem Virgilianum eundem sub finem lib. 2. Georgicorum ita expressit, ut non possit elegantius exprimi. Totam illam imitationem vivis coloribus ob oculos posuit *Bernhardinus Parthenius Spielenbergius* commentario in illam odam Horatianam. Quod si paraphrasin hujus Odæ à *Jacobo Wallio* Heroico carmine scriptam, cum illa Oda contuleris, aliud exemplum &, me quidem judice, longe excellentioris imitationis conspices. adeo enim figuris sententiarum, dictionis, amplificationibus & Locis Dialecticis sententias variat, ut, si quis carmen hoc seorsim legat, ex Horatio desumtum vix suspicari possit. Ceteræ quoque paraphra-

M

ses

ses aliarum Horatii odarum apud Wallium & Carolum de la Rüe in poematibus suis optimo jure imitationis titulum merentur, omniumque rectissime quis faciet, si quis talia exempla sibi ob oculos ponat.

§. 4.

Si quis Virgilianam imitationem velit: non illustrius exemplum potest dari, quam quod Virgilius habet Lib. 4. *Æneid.* à v. 305. ubi, interjectis aliis, *tam Historia quam Dialogismis* querelam Ariadnæ à Theseo desertæ, quæ habetur apud Catullum in Epithalamio Pelii & Thetidos pene omnem transtulit, ita ut enthymemata sententias & figuras quoque retineret, verba & periodos mutaret. Querela Didonis ab Ænea desertæ, plane conveniebat cum hoc argumento, ut eleganter notavit Bartholomæus Riccius lib. 2. de imitatione pag. 42 & seqq. Ariadne apud Catullum statim ab affectu iracundiæ incipit v. 132. Siccine me patriis - - Theseo. Respondent versus Virgiliani 305. 306. Ariadne huic indignationi insistit versu 135 usque ad 140. Virgilius paucioribus versibus idem objicit Æneæ versu

su 307.308. Addit autem Dido argumentum a periculo. Virgilius v. 9. 10. 11. addit argumentum à loco incerto, quo appulsurus sit, vers. 311. 312. 313. quæ argumenta à Catullo omiſſa ſunt, quoniam non conveniebant. Dido apud Virgilium rursus ſe ad preces & lacrymas convertit, & cum Ariadne pactos hymenæos objicit: Dido per eos ipsos Æneam rogat, ac horum voluptate cum artiſcioſè tentat. Meritum quoque objicit, quæ pleraque apud Catullum, quanquam non illo ordine v. 314. 315. 319. Sequitur apud Catullum Locus communis de perfidia Virorum v. 141. usque 146. quem locum communem brevi ſententia complexus eſt Virgilius, ſed loco alio v. 373. Nusquam tuta fides: Poſt perfidiam objectam Ariadne ingratum ſuum animum accuſat, & nominatim præſtita officia exprobrat Catullus v. 147. usque 151. Id quod Virgilius expreſſit v. 373. 375. Ubi Ariadne fratris mortem, quam amatoris ſe maluiſſe dicit, ac pro tanta in eum fide ſe relictum eſſe avibus ferisque dilacerandam queritur. Dido Nomadum Regem ac Tyriæ gentis in ſe odium, deinde pudicitia violatum nomen, poſtremo mortem ipſam adjicit, Virgil. v. 320. 323. Apud Catullum Ariadne Theſeo objicit crudeles Natales v. 152. 155. I-

dem imitatur Virgilius v. 365. 367. Hætenus per negationes processit Virgilius, cum Catullus per interrogationes: jam etiam interrogationibus utitur Virgilius v. 368. 370. Apud Catullum Ariadna conqueritur, suum jam longe fugam arripuisse v. 165. Idem facit apud Virgilium Dido v. 582. 583. Apud Catullum Ariadna optat nunquam advenisse Thesea v. 167. 172. Dido id ipsum imitatur v. 657 & 658. Catullus Ariadnam desperabundam inducit v. 173 -- 183. Idem Dido apud Virgilium v. 544. usque 547. Catullus tandem Ariadnen ad diras & execrationes perducit 184 -- Hunc locum Virgilius copiosissime atque splendidissime imitatus est, Apostrophen faciens ad Solem & Hecaten, variasque execrationes adjiciens v. 617. 626.


§. 5.

Patet ex illis, quæ adduximus, quæ Virgilio fuerit in imitando ratio: adeo presso enim pede secutus est Catullum, ut harum literarum imperitum esse oporteat, qui hæc non sentiat. Mutavit interim ordinem, quem Catullus observavit, & Dialogismis cum ANNA Sorore inter-

terjectis, fufius traxit orationem Didonis. In Historia quoque recensenda largior est Virgilius, fed ita ille expreffit Catullum, ut qui Catulliana, poft hæc Virgiliana legat, jam non inveniatur, quod ipfi magnopere placeat, ille enim adjectione figurarum vivacium, argumentorum patheticorum, dictione quoque ipfa, quæ horridior paululum est apud Catullum, adeo omnes numeros absolvit, ut vix ab humano ingenio aliquid addi poffe videatur. Tenenda itaque hæc imitandi via eft, atque femper ob oculos ponenda, quæ ita his exemplis illustratur, ut inftar multorum elle poffint.

Nos his Lectionibus finem imponimus,
&, fi quæ restare videntur, ufu &
exercitio supplenda effe
exiftimamus.

Tantum.



THE HISTORY OF THE
CITY OF LONDON
FROM THE FOUNDATION
TO THE PRESENT
TIME
BY
JOHN STOW
1618





A.

N icol. Abrahami Commentar. in Orat.	
Ciceron.	8
- - Ex Aristotele Cicero sua hausit	p. 9
Adagia. 96. Eorum scriptores	ibid.
Ætas aurea lat. ling.	p. 3. it 6
- - in ea varii Sermonis characteres	ibid.
- - ferrea ænea & plumbea.	p. 6
Ætas prima circa proprietatem vocum & phrasium inprimis sollicita sit oportet.	p. 10
Ætatis argenteæ Scriptores	p. 24
Æneæ ætatis Scriptores	34
Ammianus Marcellinus.	53
Amplificatoria quomodo excerpenda	81
Analysis orationis pro Lege Manilia	157 sq.
Apicius.	52
Apulejus	48 73
Argumenta Ethica & Pathetica per totam orationem sunt diffusa. 110. uno sæpe epitheto continentur. 117 eorum usus in imitatione	155
Argutiæ orationis	p. 25. it. 34
Arnobius	53
N	10.

Jo. Auctorum lat. cognitione potissima pars eruditionis consistit.	p. 1
- - in iis legendis non recte omnes versantur	ibid.
- - ad eos manu ductio	ibid.
- - circa eos quomodo versandum, sti- lusque æque ac res inde petendæ	ibid.
- - in iis quæ observanda	p. 2
- - eorum ad notiam quod pertineat & quomodo dispescantur	ibid.
- - in iis sermonis cura prima esse de- bet	ibid.
- - deinde cum rebus in iis contentis eloquentiæ cura simul suscipienda	p. 3
- - non miscendi sunt in lectione	ibid.
Quinam Auctores legendi in prima ata- te.	p. 6
Auctores finium regundorum.	57
Auctores non simul omnes legendi.	68
- - quomodo ratione argumentorum legendi.	68

B.

Baccherii Flavissæ.	121
Baldei carmina.	65
Balzaccus.	110
Nic. Baxius.	95
Becanus.	66
Bembus.	142
Bentzii nomenclatura.	92 95
Biblia Critica unde ortum trahant	129
Boëtius.	74
Borrichii divisio latinæ linguæ	p. 5
Bo-	

Bosiana editio Cornelii	p. 12
Le Brun.	<u>121</u> <u>124</u>
Boxhornius.	ibid.
Brockhousius.	<u>66</u>
Buchananus.	<u>63</u> <u>64</u>
Buchlerus.	<u>108</u>
Buchnerus.	<u>62</u> <u>65</u>
Bullialdus in Manilium.	<u>21</u>
Bunellus.	<u>59</u> <u>110</u>

C.

Jul. Cæsar.	p. 12. sq.
Calphurnius	<u>51</u>
Corruptum eum esse queritur Lip- sius.	ibid.
- - Ejus phrasibus quomodo uten- dum.	ibid.
Joach. Camerarius.	<u>61</u>
Martian Capella.	<u>54</u>
Joh. Casa.	<u>61</u>
Casaubonus.	<u>110</u>
Cassiodorus.	<u>55</u>
Catullus.	p. 16 <u>77</u>
- - in eum Vossii Commentarius	ibid.
Celsus.	<u>32</u>
Censorinus.	<u>55</u>
Chabotius memoratur ut plagiarius	p. <u>19</u>
Characteres latinitatis in aureo sæculo	p. <u>3</u>
Character sermonis [totam orationem format ac moderatur.	p. <u>4</u>
Characteres varii scriptorum latinorum	<u>68</u>
Character mediocris.	<u>71</u>

N 2

Cha-

Character floridus.	72
Character amplus & sublimis.	69
Characteres minores.	71
Ciceronis Topica.	74
Ciceronis Epistolæ.	146
Ciceronis Epistolæ primum legendæ sunt	
pueris	79 75
Cicero laudatus.	ibid. & 68
- - Ejus orationi per gradus adfuescen-	
dum.	ibid.
- - Ejus orationes quomodo legen-	
dæ.	p. 8 75
- - Earum collectio Cellariana.	ibid.
- - In eas Commentarii.	ibid.
- - Cygne Analysis orat. Ciceron.	ibid.
Clarckius.	113
Claudianus.	49
Codex characterum vel morum.	116
Collectanea Epistolica.	108 109
- - ornamentorum.	121
- - rerum & inventionum.	123
Connexiones variæ.	114 115
Connexiones periodicæ poëma dede-	
cent.	110
Commenii colloquia.	ibid.
Cornelius Nepos laudatur.	p. 12
- - Quomodo legendus.	ibid.
- - medio modo inter Cæsarem & Li-	
vium se habet.	ibid.
Columella.	32
Commirius.	65
Curtius.	p. 28 it. 72
	Com.

Comparationes quomodo excerpendae. 122

Commentationes novas in leges scribendi materia non deest. 129

Commentatores vulgares legum. *ibid.*

D.

Demosthenes. 130

A Dialogis pueri initium facere debent. p. 6

Dialogi quinam pueris proponendi. *ibid.*

Distributio auctorum ratione characterum atque argumentorum. 67

Divisio cognitionis. 80

Divisio rerum. *ibid.*

Dialogisticarum formularum excerpta. 101 sq. 107

E.

Marcellus Empyricus. 57

Eurhymema quænam in minoribus & majoribus poematibus locum habent. 125

Eorum tituli quomodo ordinandi. *ibid.*

Eloquentia per gradus formanda. 68

Epistola in genere. 146

Epistola Ciceronis ad Q. Fratr. 70

In Epistolis Ciceronis legendis quomodo versandum. p. 7

De epistolis ejus ad Atticum judicium. p. 10

Erasmus.	89	142
Erythraus.	62	73
Excerpendi modus, necessitas, & ratio.		79
Excerpta Antiquaria.		130
Excerpta Glossematica.		84
Excerpta Critica.		126
- - quomodo differant a collectaneis		
Lexicis.		ibid.
Excerpta Exegetica.		127
- - quomodo facienda.		ibid.
Excerpta Rhetorica.		101
- - Epistolica.	107	108 seq.
- - Oratoria.		113
- - Connexionum seorsim instituen-		
da.		114
- - Morum & affectuum.	118	119
- - Figurarum illustrium.		
- - Poetica in specie.		120
Excerptorum poeticorum exempla.		p. 97
Excerptorum usus in Theologicis.		129
Excerptorum usus in Medicis.		ibid.
Exemplum imitandi epistolam Cicero-		
nis.	148.	seq.

F.

Faber.	83
Fabricii liber de re poetica.	122
Farnabius.	124
Ferrea ætatis scriptores.	46
Festus.	73
Fi-	

Figuræ vivificant orationem.	<u>141</u>
Figurata quomodo excerpenda.	<u>81</u>
Flitii commentarius in Gratium.	p. <u>21</u>
Florus.	<u>42</u>
Val. Flaccus.	<u>45</u>
Formulae orationis.	<u>80</u>
Formularum codex.	<u>113</u> <u>114</u>
- - Talem Cicero habuit.	ibid.
- - olim causarum patroni tali usi sunt.	ibid.
Formulae recentiorum auctorum Gallorum & Italorum etiam notandæ.	<u>116</u>
Freygii Ciceronianus laudatur.	p. <u>10</u>
Freinsheimii supplementa in Livium.	p. <u>16</u>
Francius.	<u>66</u>
Fürstenbergius.	<u>65</u>

G.

Gellius.	<u>48</u>
in Germania cultiora studia prodire coeperunt.	<u>61</u>
Giphanii edit. Lucretiana.	p. <u>15</u>
Gothi barbariem invexerunt.	<u>85</u>
Gratius.	p. <u>20</u>
Gronoviana editio Livii.	ibid.
Grævii Commentarii Ciceron. collecti.	p. <u>2</u>
Græci novam literis lucem accenderunt.	<u>58</u>
Grammatici veteres.	<u>97</u>
Gruteri florilegium.	<u>97</u>
- Fax Critica,	<u>128</u>

H.	
Dionys. Halicarnassens.	124
Heinsii.	65
Heinsius.	62
Historiæ Augustæ Scriptores.	49
Historici recentiores.	63
Historicus stilus qualis.	70
Hoffmanni variæ lectiones Medicæ.	
Horatius.	p. 18. 77
Hoscius.	66
Hugues artif. trans.	115
Hyginus.	p. 22

Imitatio qualis esse debeat in locis, quorum dubia lectio.	p. 13
Imitatio quam necessaria.	140
- - quid sit?	ibid. it. p. 142 143
- - comparatur cum pictoria arte.	141
- - Comparatur cum Architectura.	155
Imitatio Epistolica.	146
Imitatio Oratoria.	153
- - quomodo illa differat ab epistolari.	ibid.
Imitatores pravi.	142
Imitatio debet esse recta.	144
- - quomodo tegatur.	ibid. & 145
Insolentia vocis.	ibid.
Melch. Junii collect. epistol. Cic.	p. 8 108
Julius Cæsar.	112. 114. 147
	p. 12. seq. 69
Justi-	

Justinus.	p. 25
Juvenalis.	36 37

K.

Kockerti edit. Terent.	p. 11
Koenig Gazophylacium	84

L.

Lactantius.	53
Lagus vindicavit Barthium.	p. 21
Langius.	96
Latini scriptores omnes partes philosophiae pertractarunt.	74
Latinitatis maxima diversitas ratione ætatum & characterum.	ibid.
Latina lingua circa Ciceronis tempora effloruit, neque ultra unam hominis ætatem duravit.	5
Ejus ætates	ibid.
Ejus iuventus.	ibid.
Ejus infantia & virilis ætas	ibid.
Ei a metallis ætates imponuntur.	ibid.
Lectio auctorum non debet esse tumultuaria	p. 3 75
- - Talis lectio maxime ad stili nitorem obest.	ibid.
Ex Legibus Romanis Excerpta.	128
- - quomodo ordinanda.	ibid. it. 75. 77
Lexicographi.	81
Lexica	83
Linguarum omnium periodi.	4
O 5	Livius

Livius.	p. 15
Ejus conciones gravioris & civilis elo-	
quentiæ ideam præbent.	ibid.
Ejus editio Doujatiana.	ibid.
Lipsius.	66 142
- - ab ejus lectione arcendi adolescen-	
tes	ibid.
Loci Dialectici inserviunt imitationi	148
Longolius	60 142
Lucretius.	p. 14
- - non facit ad corpus eloquentiæ	
formandum	ibid.
Lucanus.	31 it. 34
- - nimis argutias sectatur	34

M.

Machiavellus plurima civilis prudentiæ	
arcana in Livio detexit.	p. 15
Majoragius.	62
Manilius.	p. 21
Elias Major.	94 115
Manutius.	59
Minutius Felix.	53
Masenius.	120 122
Martialis.	44 77
Mathematica discantibus Vitruvius com-	
mendatus.	p. 22
Materialia orationis.	80
Pomponius Mela.	32
Phil. Melanchton.	61
Menagius.	65
Methodica totius orationis quomodo ex-	
cerpenda.	81
	Ma-

Meyfarti mellificium.	113
Morhofii Collegium Oratorio-Practi- cum.	131
- - Amplificatorium.	144
<u>130</u> N.	
Cornelius Nepos.	69
Nunnesius.	93
O.	
Jul. Obsequens.	54
Observationes in stilo quomodo insti- tuenda.	82
Ovidius.	p. 19 77
Ejus carmina optime cum soluta ora- tione, possunt commutari.	p. 20
Heinsii edit, Ovidii commendatur.	ibid.
- - Sectatur argutias.	34
Oratorius stilus qualis.	70
P.	
Aonius Palcarius.	60 110
Palladius.	32
De Phœdro judicium.	p. 7. it. p. 11
Pareus.	94
Non omnes Phrasæ omni argumento conveniunt.	p. 3.
Papenius ostendit artificium in Orat.	
Ciceron.	p. 9
Particularum <u>observatio</u> .	91
Pedianus.	33
Pontani colloquia.	p. 6
Phœdri fabulæ habent prudentiam civi- lem reconditam.	p. 11
Ejus edit, Schefferiana optima,	ibid.
Ejus	

Ejus versio Gallica nitidissima.	ibid.
Plautus.	p. 14 73
- - Quando legendus	ibid.
- - in eo est penus latinæ linguæ	ibid.
Paræus compilerator est.	p. 15
- - Ejus Lexicon Lucretianum	ibid.
Persius.	p. 31
Propertius.	p. 16 77
Periodi quomodo dilatanda	146
- - in eum commentarius.	ibid.
Patavinitas Liviana allegatur.	p. 25
Petronius.	p. 29
Philologiæ usus in Medicis.	129
Philelphus notatur.	p. 35
Plinius.	p. 38 76
- - ejus opus de bellis Germanicis per-	
riit.	p. 38
- - Alterius Plinii epist. & panegyri-	
cus.	39
Prudentius.	51
Panegyrici Veteros.	52
Petrarcha	58
Politianus.	59
Perpinianus.	61
Petavius.	62
Poetæ recentiores.	64
Parallesmi in lat. ling. notandi.	83
- - quinam de iis scripserint.	ibid.

2.

Quintilianus.	35 74
	Rep.

R.

Respublica in omnibus rebus certos gra-
 dus & incrementa habet. 4

Reipublicæ vigor ratione potentia &
 eloquentia quam diuturnus fit. 5

Riccii notæ in orat. Cic. p. 8

Riccii apparatus. 84

Rhetorica præcepta unde haurienda. p. 2

Rapini observationes in Virgil. & Ho-
 ratium. p. 17

Carol. de Rue Idyllia. p. 18

Rappoltus in Horatium laudatur. p. 19

Redonis elegia. p. 23

Rapinus. 65

Ruæus. 65

Recentiores auctores, in his Lipsius quan-
 do & quo consilio legendi 67

Cæsar Ripa. 122

Rosinus. 130

S.

Sadoletus. 60 142

Salmasius. 129

Sammartanus. 64

Sannazarius. ibid.

Sangenefius. 55

Saint Aubin versio Gallica Phœdri. p. 11

Car. Sigonius. 107

Scaligeri edit. Varronis. p. 16

Scaliger in Theophrastum. 129

Satira acuit ingenium. p. 18

Schori Thesaurus. 94

Schraderus. 111

Scri-

Scribonius Largus.	
Scaliger.	110
Seneca Philosophus.	p. 2676
Seneca Tragicus.	p. 2776
Saxo Grammaticus.	58
Sermonis familiaris qualis forma.	p. 4
- - comici natura.	ibid.
- - Satyrici forma.	ibid.
- - in eo alia translata adhibenda.	ibid.
Sermo interdum a typo materiæ aliquid trahit.	p. 3
Simplicitas vel ἀφειλία in scribendo quomodo obtineatur.	p. 3
Stili inæqualitas quomodo vitanda.	ibid.
- - ejus puritati a primis annis studendum.	ibid.
- - ejus diversitas ratione ætatum.	ibid.
- - certi ejus characteres in ætate aurea ib.	ib.
Sermo simplex & elaboratus ubi locum habeat.	p. 6
- - πεπλασμένος sectandus.	35
- - qualis amfit?	ibid.
Sturmii collect. epist. Ciceron.	p. 7
Sallustius.	p. 13
- - non prima ætate legendus.	ibid.
- - Affectator vocum & phrasium.	ibid.
- - Thucydidem æmulatus est.	ibid.
Spielenbergius in Horatium.	p. 18
- - In Virgilium voluit commentari.	19
Severi scripta.	p. 23
Stapel in Theophr.	129
Starckius.	102 109 113 148
	Sti-

Stilus historicus.	68
Robertus Stephanus.	83
Silius Italicus.	45
Solinus.	45
Statius.	43
Sufannæus.	93
Suetonius.	37
Sulpitius Severus.	54
Symmachus.	56
Synonymica nominum quomodo excer- penda.	92
Sidonius Apollinaris.	56
Scriptores recentiores.	p. 58
Scaliger.	59
Siberus.	62
Sleidanus.	63
Fam. Strada.	63
Scioppius.	63

T.

De Terentio iudicium.	p. 7. p. 10 68
In illum commentator Riccius non sper- nendus.	ibid.
Plerique in eum commentar. nimium pompæ habeat.	ibid.
Ejus corrupta exemplaria.	p. 11
Ejus editiones.	ibid.
Taubmanni commentarius in Virgilium	P. 17 142
Tacitus.	40 72 76
Tertullianus.	54
Theophrasti liber de character.	117
Theses integræ quo pertineant.	122
Tibul-	

Tibullus. p. 16 77
Translatio stili poetici in prosam valde
utilis. p. 18

II.

Ufus in omnibus rebus optimus magister
præsertim imitando. 146
Ubelius de Synonymis. 93

V.

Varro. p. 16 73
Vossii commentarius in Catullum. ibid.
Virgilius. p. 17 77
In eum Riccii notæ non contemnendæ. ib.
Ejus Editio in usum Delphini. ibid.
Velscius. 130
Vitruvius. p. 22
Vellejus Paterculus. p. 25
- - Sectatur argutias. p. 34
Valerius Maximus. p. 27
Valerius Flaccus. 45
Verulamius. 111
Vegetius. 54
Valla. 57
Victorius. 59
Vavassor. 62. 65
Verbalia quænam & quomodo excer-
penda. 8
Variatio vocum quam utilis. 92. 94. 115
Variationes Sententiarum. 95

W.

Wallius laudatur. p. 18. 66



